

**NATIONAL ASSEMBLY OF
SEYCHELLES**

Friday 31st October 2025

The Assembly met at 09am

National Anthem

Moment of Reflection

Madam Speaker in the Chair

MADAM SPEAKER

Mon a dir bonzour tou bann Manm Onorab. Bonzour tou bann dimoun ki pe ekout nou osi. Nou ava komans nou program pou ozordi. E nou kontinyen avek bann Mosyon. Mon ava demann Onorab Lemiel, pou prezant son Mosyon pou ozordi bomaten.

HON SYLVANNE LEMIEL

Mersi Madanm Speaker. Bonzour Madanm Speaker. Bonzour tou mon bann koleg Manm Onorab, ek tou bann dimoun ki a lekout. Madanm Speaker, mon Mosyon i lir konm swivan;

In accordance with Articles 63(1) and 69(2) of the Constitution, this Assembly approves the proposed appointment by the President of

the Republic of Mr. David Claude PIERRE to the office of Minister. Thank you.

MADAM SPEAKER

Mersi Onorab Lemiel. En dimoun pou segonn Mosyon? Onorab Gill?

HON CHURCHILL GILL

Motion seconded. Mersi.

MADAM SPEAKER

Mersi. Nou ava aprezan al dan *Committee Stage*. E mon ava demann sekretarya pou fer Mr David Pierre antre dan *Chamber*. Bonzour Mr Pierre, si ou kapab par komanse avek donn en pti prezantasyon pou bann Manm.

MR DAVID PIERRE

Mersi Madanm Chair. Bonzour Chair. Bonzour tou bann Manm Onorab. Bonzour tou bann ki dan Galeri, e tou bann ki a lekout. Mon apel David, Claude Pierre. Mon reste Morne Blan, Port Glaud. Mon'n marye, 3 zanafan. Mon'n grandi Mont Buxton. Mon'n grandi Les Mamelles.

Mon'n al Lekol Primer Saint Jean Bosco, La Rosiere, Les Mamelles. Apre sa, parey bokou nou mon ti al NYS pou kontiny mon letid. Apre NYS mon'n al *Seychelles Polytechnic*,

kot mon'n swiv mon letid *O Level*. E pli tar apre *O Level* dan Matematik, Lasyans, Matematik, *Physics* avek *Chemistry*.

Ler mon'n fini mon *A Level*, mon'n pli tar briyevman fer lekòl Les Mamelles, mon'n *teach* Les Mamelles, mon'n *teach* Bel Ombre pandan ki mon ti pe esper mon *scholarship*.

E apre sa mon'n ganny mon *scholarship*, mon'n al fer mon letid, mon'n fer mon Degre dan Matematik e Lasyans mon'n fer sa *Perth, Western Australia*, dan *Edith Cowan University*, kot mon fyer mon ti sorti avek en Distenksyon.

Apre mon letid, apre mon 3an degre mon ti osi ganny sa loportinite pou fer en lannen adisyonnèl pou mwan aprofondi mon konesans dan ledikasyon. So, mon ti fer en *Post Graduate Certificate* dan ledikasyon ki ti anmenn mwan ziskan Desanm 1992 kot mon ti retoun dan mon pei Sesel pou mwan vin kontribye. Malgre ki mon ti ganny loportinite pou mwan reste e travay avek en liniversite Lostrali sa letan.

Letan ki mon'n desann, mon'n vini an Zanvye 93. Mon'n komans travay koman en ansennyan, e mon ti ansenny matematik. En pe Lasyans me

plito Matematik NYS. La mon'n bouze de la, mon'n sorti NYS mon'n vin fer lekòl Larivyer Anglaise. Larivyer Anglaise, mon'n transfer, mon'n al Mont Fleuri. Mont Fleuri mon'n komans ganny promosyon, mon'n vin *Head of mon Department* Matematik. Ki ti Matematik.

Apre Mont Fleuri, mon'n al Beau Vallon. Beau Vallon mon'n ganny ankor promosyon kot mon ti vin *Curriculum Coordinator*. Apre Beau Vallon, mon'n al Anse Royale. So, mon'n vreman *teach* en kantite zanfan Seselwa. E mon fyer, mon'n al Anse Royale. Sorti Anse Royale apre mon'n al dan Lasanble. Mon'n vin en Manm Parlman dan Lasanble Nasyonal.

So, mon'n kit mon karyer koman en ansennyan, mon'n antre dan Lasanble Nasyonal pou bokou lannen. E pandan ki mon'n dan Lasanble Nasyonal mon'n osi en Manm *Pan-African Parliament*. Savedir en Manm Parlman lo nivo Lafrik. Apre sa mon'n ganny apwente Anbasader letan mon'n sorti dan Parlman, mon'n ganny apwente Anbasader.

E koman Anbasader mon'n O-Komisyoner Sesel *Sri Lanka*. Apre sa mon'n Anbasader Sesel rezidan

Ethiopia. Mon'n osi Anbasader non-rezidan pou Sesel pou Kenya e Lezip. Sa ti anmenn mwan ziskan Novanm 2020. E 2020, mon ti kit mon pozisyon Anbasader Sesel pou mwan pran en lot pozisyon lo nivo kontinan kot mon ti Anbasader Linyon Afriken. Mon ti reprezantan permanan *for the Chairperson of the African Union Commission*.

E mon lofis ti baze Malawi, kot mon ti osi ganny akredite avek COMESA e SADC. E donk, bann pei COMESA mon ti lyez e travay ek bann pei COMESA ek SADC ki an tou ti annan 16 pei, enkli Sesel. sa i en pti pe mon parkour depi zanfán, e koman en profesyonnel. Madanm Chair, mon oule profit sa loportinite pou mwan remersye tou bann ki'n akote mwan dan mon parkour. Tou bann ki'n siport mwan, mon madanm, mon zanfán, mon bann frer, mon bann ser.

Me mon oule pli presizeman mon oule remersi mon manman ki li ozordi i pa vwar kler. Mon konnen i ti ava kontan e vwar son garson dan sa pozisyon la ozordi, pe gete, pe swiv. Me malerezman i pa vwar kler, me mon konnen i a lekout. Madanm Chair, mersi bokou.

MADAM SPEAKER

Mersi bokou. Nou ava aprezan pran kestyon. Onorab Trevor Louise.

HON TREVOR LOUISE

Mersi Madanm Chair. Bonzour Anbasader Pierre. Felisitasyon lo ou nominasyon. Mon annan 2 kestyon pou ou. Mon premye se, ki bann kalite ki ou santi ou prosede ki pou permet ou kapab delivre koman en Minis? E mon dezyenm kestyon se anvi ki ou'n pran plizyer rol nasyonalman ensi ki enternasyonalman, ki bann reform ki ou santi ou kapab kontribye dan ou pozisyon koman Minis si ou ganny aprouve? Mersi.

MR DAVID PIERRE

Mersi bokou pou ou kestyon. Nou pe koz lo reform. Mon krwar i enportan pou nou konpran ki *United Seychelles*, in vin avek en manifesto. En manifesto ki ekstrememan detaye, e ki dir avek son bann Minis vwala ki mon anvi ou anmenn pandan ki ou Minis dan ou Minister pou Sesel e pou Seselwa.

E pou mwan sa i pa difisil. Mon'n travay lokalman e mon'n travay enternasyonalman. E dan mon travay par egzans dan sa dernyen 5an, mon'n frot

zepol avek bann avek 55 Sefdeta lo Kontinan Lafrik. Mon'n dan bann renyon kot mon'n tann sa bann dimoun pe diskrit lo ki direksyon ki zot anvi anmenn zot pei.

E mon'n aprann en kantite e mon santi ki mon annan sa bagaz, sa leksperyans pou mwan pran okenn Minister ki Prezidan Larepublik Dokter Patrick Herminie i ava *assigned* mwan. Me i annan en keksoz, ki mon pou fer. Letan mon rantre, dan mon Minister mon pou anmenn *the 4Ps of Governance, the 4Ps of Leadership*.

E sa se *Purpose, People, Process, Performance*. Mon *believe* ki nou annan en *purpose*. E mon *believe* ki nou bezwen enspir nou bann dimoun, nou bann travayer dan nou Minister, fer zot konpran ki nou *purpose*. Fer zot *feel* ki zot *belongs to that purpose*. Fer zot *feel* ki zot *own* sa *purpose*. Donn zot *trust*, enspir konfyans pou fer sir ki zot *onboard*, zot ek mwan, zot konnen kote nou pe ale zot konn sa plan e zot konnen kote nou anvi arive.

Ler nou koz lo *people*, nou pe koz lo keksoz ki nou Prezidan i kontan dir "zonm o sant devlopman." Nou bezwen fer siny ki nou rekonnet ki nenport ki devlopman i ganny enspire e i ganny fer par zonm.

Nou bezwen tret zot zonm e fanm nou bezwen tret zot byen.

Nou bezwen enspir zot nou bezwen respekte zot. Nou bezwen donn zot konesans pou zot fer zot travay lo sa pli o nivo e pou zot delivre akòz dan sa 4 *Ps* i annan *performance oriented*. E en lot dan sa *P* se *process*. Mon pa pou koz bokou lo la, nou Prezidan i dir nou "*Trust the process*". Mersi.

MADAM SPEAKER

Onorab Athanase?

HON KENETH ATHANASE

Mersi Madanm Chair. Bonzour tou bann Manm Onorab. Bonzour tou bann zabitan bann dimoun ki pe ekoute, espesyalman zabitan Perseverance. Mon dir zot mersi pou zot sipor. Bonzour Mr Pierre.

Mon kestyon i al koumsa. Koman en anbasader, ou'n baze dan diferan pei. Sak pei i annan zot koutim, zot annan zot mantalite. Kwa ki ou'n aprann ki bon ki ou kapab partaz avek nou pei? Mersi.

MR DAVID PIERRE

Mersi bokou pou ou kestyon. Si i annan en keksoz ki mon'n aprann dan tou pei kot mon'n ale se ki Gouvernans dan sa bann pei, zabitan, sitwayen sa

bann pei i *strive* pou zot anmenn en keksoz pou zot pei. E zot ansanm dan tousala.

E sa se anmenn en pei byen entegre, en pei ki inifye, en pei ki prospere, en pei ki *peaceful*. E en pei ki dirize par son nasyon. En pei ki annan en lavwa for lo lasenn diplomatik enternasyonal. E mwan mon pou dir avek ou, si i annan en keksoz ki mwan mon anvi war pou mon pei se sa vizyon. E sa i reflekte vizyon ki Dokter Patrick Herminie ki Prezidan Sesel, Prezidan Larepiblik in met devan nou dan son manifesto. Mersi.

MADAM SPEAKER

Onorab Toussaint?

HON JEAN TOUSSAINT

Bonzour Madanm Speaker. Bonzour tou bann Manm Lasanble Nasyonal. Bonzour Mr Pierre. Mon ti a kontan osi dir en bonzour spesyal nou bann zabitan Anse Boileau zot in fer konfyans, e fer *US* konfyans.

Dabor mon ti a kontan felisit ou pou nominasyon pou pos Minis Mr Pierre. Mon ti a komans mon kestyon koumsa. Avek bagaz ki ou annan, mon petet tro dan pozisyon ministeryel posibleman ledikasyon posibleman

Relasyon Enternasyonal *Foreign Affairs*, nou pa konnen.

Si nou pou pran lo kote fer krwar mon tann mon pran tandans ver ledikasyon nou konnen ki poudir devlopman imen zenn sirtou mon konnen ki par egzant lo baz devlopman imen i toultan annan sa laspe ledikasyon fizik, i annan legzersis. E nou'n konstate ki tou dernyerman in annan en problem ase serye ki ouswa defayans dan sa kote lo kote ledikasyon.

Sa i montre par petet nivo performans dan serten levennman ouswa aktivite fizik sirtou *sports* lo nivo lekol, kot menm nou dernyen Sanpyonna Atletik nou pa'n vwar okenn bann rikord ganny etabli. Dan sa kote petet mon ti a kontan pete demann ou premyerman kwa ki ou ti annan primordyalman an ki ou ti kapab fer primordyalman pou nou kapab adres sa size.

Permet mwan en pti kestyon lo si lo kote diplomasi. Prenon kont nou annan bann Anbasader ki'n ganny apwente anba *previous* Gouvernman. Mon ti a kontan konn ou pozisyon lo zot apwentman an relasyon avek sa size. Mersi bokou.

MR DAVID PIERRE

Mersi bokou pou ou kestyon. Les mwan pran kote ledikasyon avan. Mon anvi get ledikasyon si zanmen mon ti pou vin Minis Ledikasyon. Mon anvi profite pou mwan get ledikasyon en pti gin an bref me dan son totalite, enkli sa kestyon ki ou'n demann mwan.

Nou manifesto i fer kler i dir nou poudir nou Sistenm Ledikasyon pou vin labaz lansman pou devlopman e progre personnel sitwayen Seselwa e la nasyon Seselwa an zeneral. Pou mwan i senp, en sistenm ki devret pe kapab idantifye talan tou zanfan Seselwa. E en sistenm ki kapab donn sa bann talan en loportinite pou zot devlope.

Savedir donn tou zanfan Seselwa en loportinite pou devlop son potansyel. Se sa, sa sistenm ki nou, nou anvi. Nou anvi ki en zanfan, mon a donn en legzanp. En zanfan ki ozordi i annan 8an, dan nou Sistenm Ledikasyon nou devret kapab donn li sa posibilite. Nou bezwen kapab donn nou bann ansennyan sa posibilite premyerman pou idantifye son talan, e donn li sa zanfan sa posibilite pou li devlop sa talan. Se sa talan ki pou donn li son lavenir demen.

Se sa talan, ki pou fer li prodiktiv dan lasosyete demen.

E se sa ki nou anvi fer. Nou anvi ki sa zanfan ki annan 8an ozordi, dan 20an ler in ganny li 18an e letan nou, nou'n pareyman ler nou pe *retire* nou dan lakour nou pe asize, sa zanfan i pe prodwir pou ed nou ganny *the best* lavi. E nou pa i dan distrik pe vin kas nou lakaz, pe vin teroriz nou. Vwala nou vizyon, i form parti nou vizyon sa.

Now, ki nou pou fer? Ledikasyon Fizik, nou bezwen revwar nou *curriculum*. Nou bezwen revwar, ki mannyer laprantisaz pe *take place* dan nou lekol. Nou bezwen revwar ki mannyer zanfan pe aprann. Ki lanvironnman, ki zouti ki nou pe donn zanfan ki nou pe donn bann ansennyan. Nou Prezidan in koz bokou lo *Artificial Intelligence* dan lekol par egzannp.

E mwan ozordi mon anvi fer keksoz ekstrememan kler. Mwan mon'n en ansennyan matematik. Mon'n fer, mon'n pas atraver lekol, mon'n aprann matematik. E mon konnen par egzannp poudir dan Matematik, i annan diferan fason pou rezourd en problem, *right*? E mon konnen ozordi Matematik i en size difisil dan nou lekol.

So, ki mannyer nou kapab servi *AI* pou nou kapab kas sa, pou nou kapab fer li pli fasil

pou nou bann zanfan. E mon konnen atraver mon parkour, mon konnen si par egzamp si ou pe pran en topik *Algebraic Equations* dizon ou pe get *Geometric Equation*, *calculus integration* konplike. Me nou kapab enkorpor *AI* pou fer en ansennyan pou donn en ansennyan diferan posibilite pou rezourd sa problem, pou montre marmay ki mannyer pou rezourd sa problem.

E bann marmay i ava annan en levantay, bann diferan lapros ede par *AI* lo ki fason zot pou *tackle* sa problem. E sa pou deblok en kantite zanfan ki ozordi i pe adapte petet en metod, e pe ganny bloke. Letan mon ti ansennyan, en keksoz ki mon ti kontan fer se rod 5/6 metod pou rezourd en problem. E mon dir sa ozordi akòz dan mon analiz *then* mon ti vwar poudir sa zanfan ki pa konpran sa metod pou sa menm problem i kapab konpran en lot metod fasilman pou sa menm problem. I ti bloke lo en metod, i debloke lo 2 metod.

So, nou anvi fer sa, *right*? Nou anvi met lanfaz lo disiplin. Me nou pa kapab annan en lanvironnman lekòl kot zanfan pa kapab aprann akòz mank disiplin par serten marmay. E nou pa kapab annan en

lanvironnman lekòl kot nou bann ansennyan i ganny terorize swa par zanfan, swa par paran. I en *issue* e nou bezwen dil avek. Nou bezwen rekonpans nou bann ansennyan. Nou bezwen valoriz nou bann ansennyan.

Nou bezwen met lanfaz lo *STEM*, lasyans, teknolozi, enzenyer, matematik. Nou bezwen met lanfaz, nou bezwen envestir dan *STVC*. Pou nou sa i en priyorite. Ledikasyon fizik dan lekòl, marmay i bezwen ganny sa lopòrtinite pou devlop zot talan sportif. E sa i ganny rekonnet dan lekòl. Me pa zis talan sportif, e zot lasante osi. Marmay i bezwen kapab fer legzersis.

So, nou pe vin revolisyonniz ledikasyon, lafason ki i ganny fer dan lekòl. *Now*, lo kote La Diplomasi. I pa... sa kestyon ki ou'n demann mwan i pa en keksoz ki difisil, me i responsabilite Prezidan Larepiblik pou li deside lekel ki i apwent Anbasader. E li ki finalman donn son laprouvasyon lo lekel ki pou ki bor. Me koman Minis, ou pou evalye performans sa bann Anbasader. E ou pou kapab fer en rekomandasyon avek ou Prezidan. Mersi.

MADAM SPEAKER

Onorab Uranie?

HON ROCKY URANIE

Mersi Madanm Speaker. Bonzour tou koleg Onorab. Tou zabitan Zil Pros ki a lekout. Bonzour pou Mr Pierre. Mon byen kontan ou nominasyon.

MR DAVID PIERRE

Mersi.

HON ROCKY URANIE

Mon kestyon i al en pti pe dan laliny ki Onorab in fek demande, anvi ki mon war ou annan bokou bagaz dan ledikasyon. E mon vreman apresye ki ou'n koz lo matematik. Akoz sa i enn bann size ki vreman nou war ki performans in desann bokou. E mon apresye ki ou'n dir ki i annan plizyer fason fer pou ariv lo en solisyon dan matematik. Sa osi ti enn mon pwen for, e teknik ki mwan mon ti servi.

Alors, mon pou al dan sa laliny, me selman anvi ki ou annan bagaz dan ledikasyon mon mazine petet si an ka ou ganny mete koman Minis pou Ledikasyon i annan kestyon ki en pe spesifik. Ou'n koz lo *training*, me selman mwan i annan en nouvo devlopman dan ledikasyon kot mon annan pou fer avek *grooming*.

Par egzantp nou'n vwar poudir ki i annan en nouvo Polisi ki'n sorti oubyen ki'n ganny tire ki prezan ou kapab les zanfand vini avek seve ki mannyer i oule. E mwan mon'n war sa in vin en nespes kalite dezord. Mon konnen ou dir nou pa bezwen seve pou ou vreman aprann. Me selman mon konnen *grooming* i enportan.

So, petet mon ti a kontan konnen petet ou ki ou mazine lo la? E petet ou si ou ganny sans vin Minis, kwa ki reform ou kapab anmennen pou fer ki nou fer keksoz dan en lot fason? Mersi.

MR DAVID PIERRE

Mersi bokou pou ou kestyon. Enn bann keksoz ki mon senserman *believe* ladan, se si Prezidan i deside donn mwan sa portfolyo. Enn bann premye keksoz ki mon pou fer, mon pou demann en *base review* lo kote egzakteman nou ete pou nou kapab pli mye enkorpor bann lide ki nou pe vin avek, bann nouvo lide ki nou pe vin avek dan Ledikasyon.

I annan en koz ki dir ou, ou pa kapab kas en keksoz ki pe marse me nou aranz en keksoz ki pa pe marse. Mon'n fek koz lo disiplin. Dan mon lopinyon personnel disiplin, *grooming* i form parti ladan. E

mwan mon pou kontan vwar en Sistenn Ledikasyon kot nou bann zanfan i vin lekòl dan zot *uniform* byen prop, byen zoli, byen reprezantativ of en etidyan lo sa nivo.

So, mon krwar sa i en konversasyon ki nou pou bezwen fer. I en size ki nou pou bezwen *tackle*. E dan mon lapros, ler nou *tackle* sa size nou pou enkorpor tou bann *stakeholders* pou fer sir ki tou bann desizyon i ganny pran dan sa desizyon i ganny pran lo sa size, *everybody is on board*. Tou bann *stakeholders* i *onboard*. Minister, *teachers*, paran, e lakominote an zeneral. Mersi.

MADAM SPEAKER

Onorab Gabriel?

HON CONRAD GABRIEL

Mersi Madanm Chair. Mon a dir tou dimoun bonzour, tou dimoun a lekout. Bonzour Mr Pierre. *First of all, congratulation...*

MR DAVID PIERRE

Mersi.

HON CONRAD GABRIEL

...pou ou nominasyon. Mon'n pas lo ou CV, mon'n vwar ki in plen. En bon reprezantasyon ou'n fer aletranze. Mon ti a kontan demann ou sa kestyon.

Yer mon ti demann en Minis an partikilye. Ki mannyer ou vwar nou relasyon avek bann pei vwazen. E si ou ganny apwente koman Minis, kwa ki ou santi nou devret fer pou nou kontinyen agrandi sa relasyon avek nou bann pei vwazen avek dan lemonn antye?

E dezyennman, petet si ou ganny donnen sa portfolyo Ledikasyon, ki petet bann premye keksoz ki ou pou fer pou elev sa nivo laprantisaz sirtou dan sa size matematik? Mersi.

MR DAVID PIERRE

Mersi bokou. Mon a pran sa kestyon lo size relasyon avek bann pei vwazen. Sesel, e sa nou Prezidan in fer tre kler. Sesel i pozisyonn li enternasyonalman koman en pei ki zanmi avek tou. E lennmi avek personn. Me selman nou konnen nou poudir nou annan, i annan bann pei ki nou bezwen etabli bann relasyon diplomatik ki for, ki solid. Par egzanp bann pei dan larezyon, nou en Manm Linyon Afriken.

So, nou relasyon avek sa lorganizasyon i bezwen for e solid. E nou bezwen fer sir ki nou annan en respe mityel dan sa relasyon kwa i bilateral, oubyen i en relasyon lo baz miltilateral. So, sa respe mityel

i ekstrememan enportan. Nou bezwen vwar kote nou lentere i ete, e fer tou pou protez e defann sa bann lentere ki nou annan pou Sesel e pou Seselwa.

E nou bezwen vwar ki mannyer nou kapab servi nou bann zanmi pou ed nou arrive akonplir sa ki nou, nou anvi koman en Gouvernman pou Sesel, e pou Seselwa. Lo nivo matematik sa i vreman pre avek mon leker. I annan en kantite keksoz ki nou kapab fer. Premyerman nou kapab reviz nou *curriculum*. Dezyenmman enkorpor AI parey mon'n dir taler pou ed laprantisaz, pou siport nou bann ansennyan.

Me i annan en keksoz fondamantal ki nou pa bezwen zanmen bliye. E sa i pa mars zis pou matematik, i mars pou tou size. Nou bezwen valoriz nou bann ansennyan. Nou bezwen donn zot tou zouti posib. Nou bezwen donn zot tou sipor posib. Nou bezwen donn zot rekonpans, rekonpans pou travay dir. E nou bezwen donn zot as *much as possible* lantrennman pou zot kapab bouze dan zot karyer, pou zot kapab devlope dan zot karyer.

E nou bezwen rekonnet, e fer sir ki i annan en *clear career path* pou nou bann ansennyan. E fer sir ki napa diskriminasyon. E fer sir sa ki

merite i gannnen. Sa ki devret arrive, i arrive. En konbinezon tou sa bann keksoz pou ed Sesel pou ed nou Sistenn Ledikasyon epanouir bouze, sorti lo sa standar kot i ete e bouz lo sa lot standar.

E Onorab mon pou dir ou pou dir nou kapab fer li arrive, nou kapab fer li arrive si zanmen mon ganny sa loportinite. E sa i *self-belief* en. Mon annan *belief* dan mon konpetans, dan mon leksperyans. E i annan en keksoz ki Onorab Georges ti dir an 2020. E ki mwan mon alinyen avek sa ki Onorab Georges ti dir. I dir aköz nou pa kapab pran en manifesto vwar ki i annan ladan, e fer li arrive. E se sa ki mon anvizaze fer.

Nenport ki portfolyo ki Prezidan i donn mwan, mon pou get nou manifesto. Mon *believe* dan mon kapasite, mon *believe* dan mon abilite. E mon pou fer li arrive pou Sesel e pou Seselwa. Mersi.

MADAM SPEAKER

Onorab David?

HON ROBERT DAVID

Mersi Madanm Speaker. Bonzour tou Manm Onorab. Osi bonzour tou bann dimoun ki pe swiv nou travay ozordi. Bonzour Mr Pierre, e mon ti a kontan

felisit ou pou ou nominasyon koman Minis.

Si Lasanble Nasyonal i aprouv ou nominasyon koman Minis, Koman en paran Mr Pierre mon ti a kontan demann ou ki mannyer ou pou servi ou pozisyon koman en Minis pou ede soulaz e amelyor sityasyon lavi bann paran tousel sirtou bann ki pe fer fas avek difikilte lavi? Mersi Madanm Speaker.

MR DAVID PIERRE

Mersi bokou. Konnen, enn bann keksoz ki tre pros avek mon leker se pou fer sir ki tou zanfan Seselwa, i ganny en loportinite dan lavi pou li bouze e pou li avanse. Mon ti ekout prezidan Larepiblik dir e keksoz dan ledikasyon.

I ti dir poudir in pas dan serten landrwa in vwar bann zanfan pe fer zot leson ater. E in mete dan manifesto in dir pou dir nou bezwen ed bann paran dezavantaze ki annan bann zanfan talante pou fer sir ki zot zanfan i arive, *right*? Mon get sityasyon Sesel koumsa. E vwala ki mon pou donn lanmen fer.

Nou anvi vwar i enkli mwan, mon anvi vwar en Sesel ki kre en lanvironnman ekonomik ki pou permet Seselwa, tou Seselwa ki anvi partisip dan devlopman

ekonomik son pei, kre larises pou sa pei, san viktimizasyon, san diskriminasyon. Letan nou pou elarzi, e mwan mon pou donn lanmen fer sa mwan. Letan nou pou elarzi sa baz ekonomik, kre plis larises. Sesel pou dan en pozisyon anba *United Seychelles* pou li prezan pran sa kantite larises ki'n kre par travay dir son pep e distribye li dan en fason *fair*, zis e ekitab.

E sa i vedir siport bann ki mwen fortinen dan sosyete. Nou bezwen koman en Gouvernman, koman en pep tonm dakor ki nou pou siport bann dimoun ki mwen fortinen dan sosyete. Me nou pou bezwen egalman fer sir ki napa labi, sa i ganny fer drwat, prop san anmenn politik pou tou Seselwa. Mersi.

MADAM SPEAKER

Onorab Herminie.

HON WILBERT HERMINIE

Bon. Mersi madanm Speaker. Bonzour Madanm Speaker. Bonzour tou Manm Onorab. Bonzour tou dimoun ki pe a lekout. E bonzour pou Mr Pierre. Avan mon al lo mon kestyon Madanm Speaker, les mwan premyerman remersi ou pou lafason ki ou pe diriz Lasanble pou sa dernyen 2

zour. Akoz mon pe ganny bokou *call* avek mesaz pou pas ou en mesaz felisitasyon. Ou pe fer li en vre Lasanble.

Mr Pierre, ler mon pe get ou CV, mon war ou annan bokou bagaz dan Ledikasyon, ou en matematisyen. Ou menm en diplomat. Me selman mon kestyon pou ou vi ki mon pa konnen ki portfolyo ou pe al ganny *assigned*. Me koman en Manm dan *Cabinet* koman en Manm ki pe reprezant Lepep Seselwa dan *Cabinet of Ministers*, nou konnen deor i annan bann *issues* ki bokou Seselwa pe koz lo la.

Enn kekfwa mon ava met devan ou, parey nou annan sa *issue Travizory*...

MR DAVID PIERRE

Issue lekel?

HON WILBERT HERMINIE

Travizory.

MR DAVID PIERRE

Anr, *ok*.

HON WILBERT HERMINIE

Ki en pli gran ka koripsyon ki'n deza arive dan sa dernyen 5an. E bokou dimoun ep esper en lanket endepandan fer lo sa size. E ou koman en Manm *Cabinet*, ki ou pou fer pou pouse ki sa lenvestigasyon i

ganny fer pandan sa premye 100 zour? Mersi Madanm Speaker.

MR DAVID PIERRE

Mersi Onorab. Onorab mwan mon en dimoun ki natirelman *believe* dan lazistis, me dan en fason ki *fair*, dan en fason ki *fair*. Mon krwar si i annan okenn levidans. E la mon pe dir levidans syantifik en, ki in annan. Pa spekilasyon, me levidans mon pou natirelman siport nou Prezidan, siport *Cabinet* dan son demars pou anmenn lazistis.

Me mon repete, mon anvi vwar en Sistenn Lazistis ki aktyelman zis. E ki donn Seselwa lazistis parey Seselwa i merite. Mersi.

MADAM SPEAKER

Onorab Claudette Louise?

HON CLAUDETTE LOUISE

Bonzour Madanm Speaker. Bonzour tou bann Manm Onorab. Tou dimoun a lekout. Mr Pierre, bonzour e felisitasyon pou ou nominasyon dan pos Minis.

MR DAVID PIERRE

Mersi.

HON CLAUDETTE LOUISE

Mon lentervansyon i lo bout lo ou CV koman en edikater, *ok*. Nou konnen pou en pep byen edike, enformen nou bezwen annan bann lan stratezik e pratik bann zouti lenfrastruktir osi ki dan larealite. Mon pe demande petet ki ou lapros si zanmen ou ganny mete dan koman Minis pou petet Ledikasyon. Ki ou pe mazine lo kote lotonomi lekol? En pti pe dan revwar *School Council*, son lefikasite e osi petet en pti pe *welfare* bann *teachers*. Nou konnen konmela *teachers* i pa zis edike, zot osi travayer sosyal, *ok*. Petet si ou kapab fer en pti komantr lo la silvouple. Mersi.

MR DAVID PIERRE

Mersi. Mersi bokou. Onorab, mon pou vreman, vreman pouse pou nou investir. Premyerman mon'n dir taler, me selman mon pou repete pou met li dan konteks. Mon'n dir taler poudir mon pou anvi en *base review* pou nou vwar kote nou sitye pou nou kapab anmenn sa reform e revolisyonniz ledikasyon parey nou anvi fer li.

Me enn bann keksoz pli fondamantal ki mon konnen pou bezwen arive, se investisman dan ledikasyon. Dan diferan seksyon dan

ledikasyon. Nou bezwen investir dan lansennyman matematik anmenn *AI* par egzant. Mon'n dir taler, mon'n koz lo *STVC*, en sant pou vokasyonnel en *Technical and Vocational Center*, *right*?

So, mon *believes* dan tou bann *areas* kot nou santi nou feb e nou bezwen investir dan bann *areas*, dan bann *curriculum* kot nou santi nou bezwen sanze, nou bezwen pare pou fer sa bann sanzman. Lo kote lotonomi lekol. *Go back in history*, ou pou war poudir dan mon bann letan mon ti pe ansennyen. Mon ti enn bann dimoun ki ti pe pouse pou lekol kapab fer serten desizyon lo zot menm.

E mwan mon dir si nou *carefully craft* en *mechanism*, ki pou kapab permet lekol annan serten lotonomi *and in parallel to that* demande ki zot delivre. Nou annan lotonomi, me ou bezwen delivre. Mon oule performans. Mon krwar poudir sa pou enn bann mekanizm ki nou kapab servi pou lev lekol, pou lev standar.

School Council, i enportan e lafason ki i zwe son rol osi i bezwen ganny revwar, modernize e fer sir ki i performan e i donn rezilta. *Now, welfare*. Ou dir mwan *welfare* bann *teacher*, *right*? Pros avek

mon leker. Mon'n en ansennyan, mon konnen ki savedir ansennyan. Mon konn travay ki en ansennyan i fer. E enn bann keksoz ki mon ti pou kontan fer si zanmen mon vin dan ledikasyon se zisteman vwar ki mannyer nou kapab *improve welfare* bann ansennyan. Ki mannyer nou kapab donn zot bann pti *incentives* ki pou fer zot reste.

Nou anvi rod kalite ansennyan. Me pa zis rod kalite ansennyan, nou anvi gard nou bann ansennyan pou ki nou bann etidyan i benefisye i maksimonm avek kalite ansennyan ki nou annan dan sosyete. E la i fer mwan retourn *back to* en kestyon ki'n ganny demande boner. Ki nou pou fer? Ki mannyer mon pou donn lanmen anmenn sa Sesel lo sa nivo? Pou mwan labaz se devlopman ekonomik Sesel. Kre larises, e partaz sa larises dan en fason zis e dan en fason fer.

Envestir sa larises dan sa bann sekter parey Ledikasyon, parey Lasante, parey sosyal pou nou annan en nasyon ki for e en nasyon ki fyer zot bann Seselwa. Mersi.

MADAM SPEAKER

Onorab Sandra Sultan?

HON SANDRA SULTAN

Bonzour Madanm Speaker. Mersi. Bonzour Mr Pierre. E bonzour bann zabitan Anse Aux Pins. Mr Pierre parey mon pe get ou CV, mon war poudir ou annan potansyel dan sa bout ledikasyon e mon krwar bokou dimoun la deor pe ekspekte ki pou zer sa Minister. E mon kestyon i se ki nou konnen poudir Sesel tou dernyerman lanfaz in ganny mete plis lo *teachers* etranze ki Seselwa.

E mon ti a kontan konnen ki ou pou fer pou re anmenn nou bann *teachers* Seselwa dan sa profesyon. E pou minimiz lakantite etranze ki nou annan dan sa profesyon. Mersi.

MR DAVID PIERRE

Mersi bokou Onorab pou ou kestyon. Enn bann keksoz ki mon'n toultan fer *having be* en ansennyan mwan menm en. Mon'n toultan kot mon pase letan mon zwenn en ansennyan, pa zis la depi avan mon'n kontan koz ek zot. E ansennyan lamazorite 99.99 poursan zot kontan zot vokasyon.

Ler ou war zot ale la, zot pa anvi ale zot. Me zot ale pou en kantite rezon. Parmi se zot kondisyon travay, e lanvironnman laprantisaz dan lekol. Taler mon'n dir en keksoz, ki mannyer nou kapab

aksepte koman en sosyete ki en paran i sorti se li i vin lekol e agres en ansennyan. En ansennyan ki pe donn son zanfán formasyon. Konpran?

So, nou, nou bezwen fer sir ki nou get lansennyman dan son totalite. Letan nou fer sa, nou pou kapab dousman, dousman redres tou bann *impediments* ki fer li difisil pou en ansennyan reste oubyen fer li dekourazan pou en ansennyan reste dan lansennyman. E nou pou fer sir ki nou *as much as possible*, nou adres sa bann *impediments*. Nou bezwen valoriz nou ansennyan.

E nou bezwen onn nou ansennyan sa nivo lenportans ki pou fer dimoun an deor dan kominote respekté nou bann ansennyan. Lontan letan i dir ou mis pe vini, tou zanfán i trankil, bonzour mis eksetera. Ler en mis i al dan kominote, lakominote i *look up to* sa *teacher*. Akòz nou pa kapab retourn sa? Se nou ki bezwen donn sipor, e kre sa lanvironnman pou fer li arive. E nou pou fer li arive. Mersi.

MADAM SPEAKER

Onorab Grandcourt?

HON ALVIN GRANDCOURT

Bonzour Madanm Chair. Bonzour tou mon bann koleg. E

bonzour tou bann zabitan Grand Anse Praslin. Mon kestyon Mr David Pierre i *comme toujours* annan relasyon avek Grand Anse Praslin, Praslin e bann zil.

Etdonnen ki bokou bann kestyon ki mon bann koleg pe pase i baze lo Ledikasyon, mon pou swiv lo sa menm laliny. Ki si ou vin Minis avek portfolyo Ledikasyon, ki ou ti a kontan oubyen ou ti a voudre vwar ganny fer lo nivo ledikasyon pou bann zil, akòz parey ou konnen pa Mahe i annan bokou defi pou bann zanfán, e pou bann ansennyan lo bann Zil Pros? Mersi.

MR DAVID PIERRE

Mersi bokou. Praslin e La Digue i sertenman teritwar Sesel. E napa naryen ki nou pou fer lo *main island* pou nou bann ansennyan, pou lekol e pou ledikasyon ki nou pa pou fer pou Praslin avek La Digue. En ansennyan Praslin i egalman oubyen i egal avek en ansennyan La Digue. E i egal avek en ansennyan lo Mahe. En lakour lekol Praslin i parey en lakour lekol lo La Digue. E i parey en lakour lekol lo Mahe.

Sipor e lenvestisman ki nou fer lo bann lekol Mahe pou nou elev standar i bezwen osi ganny fer dan nou lekol Praslin,

dan nou Lekol La Digue. Mon krwar i annan en keksoz ki enportan pou nou konpran. Ler pou mwan si mon vin dan sa Minister, letan mon pe get ledikasyon mon pe get li dan son *entirety*. Mon pe get ledikasyon pou zanfan Mahe, pou zanfan La Digue e pou zanfan Praslin. E se pou sa rezon ki mon'n dir en keksoz taler ki petet nou pa pou petet pe reflesir lo son lenportans.

E mon ava *reiterates* akòz i absoliman enportan. Mon'n koz lo en *base review*, akòz mon pou fer li dizon dan ledikasyon si mon vin Minis Ledikasyon. Se akòz mon anvi etabli klerman kote bann *loophole* ti ete, kote bann *issues* i ete. Kote bann problem i ete pou mwan zisteman servi nou manifesto, e aziste *accordingly* pou nou donn Sesel e Seselwa sa ki nou'n promet Lepep Seselwa vizavi ledikasyon dan nou manifesto. Mersi.

MADAM SPEAKER

Onorab Lepathy?

HON NELSIA LEPATHY

Mersi Madanm Chair. Bonzour Madanm Chair. Bonzour tou Manm Onorab. E bonzour Mr Pierre. Mon rekonnet ki si ou ganny apwente koman Minis, ou pou enn osi parmi bann ki'n

vini yer ki'n byen formen. Ou annan leksperyans koman en edikater, ansennyan kot ou'n ansenny NYS, segonder e menm ou'n osi lo nivo *leadership* lekol. E ou'n menm en Anbasader, e ou'n okip plizyer lezot pozisyon ki mon vwar i aparan lo ou CV. Koman en ansyen Anbasader, ki mannyer ou pou adapte ou avek lafason travay koman en Minis isi Sesel, akòz nou konnen ki sa fason travay i pou konpletman diferan avek sa ki ou ti pe fer avan.

E koman en Minis ou pou bezwen en Minis teren, akòz mon konnen i sa ki bann ansennyan pou ekspekte de ou la deor. Akòz nou bann ansenyan nou ekspekte en Minis ki reste konekte avek bann ansennyan e menm *staff* lekol? E ki kontribisyon ou anvizaze anmennen osi anver sa Minister? Mersi Madanm Chair.

MR DAVID PIERRE

Mersi bokou pou ou kestyon Onorab. Wi, sertenman mon pa anvizaze vin en Minis ki pou reste zis dan lofis. Mon krwar enn bann keksoz enportan koman en Minis, se pou enspir ou bann dimoun ki travay avek ou pou zot donn *the best*. Ou konnen *leadership*, i *about* ou kapasite pou enspir ou bann

travayer pou zot donn zot mye. Akoz mazine se zot ki lo teren dan laklas pe delivre. E ou, ou devret sa lenspirasyon pou zot, ou devret pe enspir zot.

E enn bann keksoz ki mon pou fer si mon vin Minis Ledikasyon, se konnekte *as much as possible* avek mon bann lekol e konekte avek mon bann ansennyan. Donn zot sa loportinite pou zot menm vwar mwan dan zot lekol. Ou konnen mon ti pe mazin en keksoz, mon dir si mon vin Minis Ledikasyon en *beau jour* mon kapab *teach* lo nivo primer, mon kapab *teach* li nivo segonder. Mon kapab *teach* lo nivo *polytechnic as well*, lo nivo *A Level*. Mon'n *teach A Level actually* dan mon karyer.

So, mon dir *why not*. *Why not* en zour bann *teachers* i vwar mwan dan en laklas. En zour mon vini mon pe ansenny nou bann etidyan matematik, kekfw pou en period kekfw *for 40 minutes*, kekfw *for 30 minutes* ankouraz zot fer zot konnen, fer zot santi poudir zot annan en Minis ki avek zot e ki la akote zot. Sa i enn bann keksoz ki mon ti ava ki mon ti ava kontan fer.

Me selman Onorab *to be short and sweet*, wi. I diferan, i diferan mon pou lo teren mon pou vizit mon bann lekol, mon

pou kominike, mon pou konstate e mon pou fer sir ki nou en tim. En tim ki pe anmenn Ledikasyon lo sa pli o standar dan sa 5an ki pe vini. Mersi.

MADAM SPEAKER

Mersi Mr Pierre. Si napa okenn lezot kestyon, nou ava prezan dir Mr Pierre mersi. Nou ava eskiz li dan *Chamber*.

MR DAVID PIERRE

Mersi Madanm chair. Mersi tou Manm Onorab.

MADAM SPEAKER

Nou ava aprezan sorti dan Staz Komite. Deba i aprezan ouver lo Mosyon. Okenn entervenans? Onorab Aglae.

HON EGBERT AGLAE

Mersi Madanm Speaker. mon a dir bonzour tou Manm Onorab. E bonzour tou nou bann dimoun ki pe swiv deliberasyon, bann laprouvasyon Minis ozordi.

Madanm Speaker, Mr David Pierre, ki enn mon zabitan Port Glaud. Mon pa fek konn Mr Pierre yer, mon'n ganny sans dan bann parkour politik menm letan mon ti pe lekol mon'n swiv en pe bann travay ki Mr Pierre in fer menm si sa bann moman letan i ti pe

swiv prensip avek en lot parti politik.

Me ozordi mon krwar nou'n ariv dan en moman letan dan Sesel kot si nou pe koz Sesel pou tou son zanfan, nou bezwen aksepte ki tou son zanfan i kapab kontribye anver devlopman son pei. Pe enport kote i ti sorti, e pe enport kote in arive. E mwan mon partaz sa prensip aköz nouvo *United Seychelles* pe pran en lot direksyon. E Prezidan Patrick Herminie, dan son kapasite koman Prezidan i pe swazir son *Cabinet of Ministers* avek mon kapab dir sa pli o lentegrite, lentelizans e lasazes pou anmenn le meyer pou anmenn travayer.

E si la nou'n arive, vwar Mr Pierre devan se aköz nou'n kapab dan en fason ou en lot montre son kapasite koman sa zonm ki'n defann pei dan en fason lo nivo enternasyonal lo nivo reprezantatif. E ki la in retourn lo son later natal pou vin kontribye, menm parey nou'n vwar avek Mr Laporte pou vin kontribye.

E napa naryen mal ek sa, i en keksoz ki normal. Mon osi oule partaz ouswa dir li koumsa ki nenport ki demen ki Prezidan i santi i annan kapasite, menm si i pa ti apartenir a nou parti *US* pou met dan bann pozisyon

pou fer fonksyonnen pei si i annan son abilite mwan mon pou siporte pe enport. Aköz Sesel i bezwen vwar li transformen e geri dan en fason ou en lot ki nou anpes annan sa divizyon politik dan en fason.

E pou annan son moman letan ki i annan konpanny politik. E apre konpanny politik i fini eleksyon nou bezwen travay ansanm. Nou bezwen bouz pei, sansan nou pou war nou dan bann sityasyon parey nou pe vwar dan nou pei vwazen ki pe arive *Madagascar*, *Latanzani*, *Kenya*. So, nou bezwen *mindful* tousala lo kwa ki nou anvi, san ki nou met bann lanbisyon personnel avan.

Mon'n komans koumsa Madanm Speaker, aköz mon santi nou bezwen parfwa adres size. E ziska *maintenant*, kot i konsern kestyon mon pa'n war nou lot kote latab demann okenn kestyon petet zot annan zot rezon. Mon pa la pou ziz sa mwan. Me selman i zot drwa, i zot drwa si zot anvi kestyonnen *or not*.

Mr Pierre in montre mwan dan son CV i annan 2 forte, sa i konsern lo nivo Ledikasyon e osi lo nivo La Diplomasi. Lo kote Ledikasyon sa ki mon annan pou dir, si demen Prezidan i apwent li dan sa portfolyo. Nou

Sistenn Ledikasyon ozordi i en sistenn ki annan tou labaz, *ok*. Nou'n krwar dan en prensip en ledikasyon ki depi lakres, la ozordi nou annan Pti Lanfans IECD ziskan ou fini ou pos-segonder kot ou swiv en ledikasyon ki nou kapab dir *funded par taxpayers money*.

Me lo en fason ou en lot i gratwit pou en fanmir en paran anvoy son zanfan lekòl. Me ki nou pe war ozordi avek nou Sistenn Ledikasyon, i annan plizyer defi ki bezwen ganny adrese. I annan sa konteks global ki annan bann diferan *trends* ki normal. Me selman i mank serten lankadremman pou adres bann malez ki pe antre dan nou Sistenn Ledikasyon ki pe detourn *the purpose* parey Mr Pierre in dir pou en etidyan ki ler i antre dan en lenstitisyon skoler bomaten i konn son lobzektif ki i pe al fer.

Ou sipoze pe al aprann, ki ou *end product* se ou kalifye pou ganny en sertifika ouswa pli avanse bann diferan degre pou antre dan en lemonn travay. E *now* ou sipoze pe *give back* ou pei atraver sa ledikasyon gratwit mon kapab dir ou'n gannyen pandan *all these years*. E pou mwan sa i en keksoz enportan ki nou bezwen re enkilke en *mindset* pou kapab re donn *the purpose*.

Osi kot i konsern *welfare* bann *staff*, la mon pa koz zis *teachers*, tou *staff* bann *ancillary*, bann *core staff* ki Minister Ledikasyon zot bezwen ganny revwar zot osi. Akoz zot osi zot en mayon dan sa travay. E osi mon ti ava lans en lapel kot i konsern *the head office of* Minister Ledikasyon i konsernen fodre i annan serten travay transformasyon ki arive.

Nou pa kapab annan sa mwan mon dir li koumsa, *the head office* i ganny gete koman *the supreme* ki byen ki administrativ kot zot parfwa tant pou dekonekte avek bann diferan lekòl ek rezyon bann diferan ladministrasyon sa bann lekòl rezyon i pa ganny ekoute osi. Sa mon krwar i bezwen annan sa sinerzi koneksyon ki ganny etabli.

E osi bann *Code of Conduct*, bann *Code of Conduite* pou asir disiplin i ganny met an mars e enplimante kot i ganny ledan pou li morde pou enplimante. Dan lot konteks si demen Prezidan i deside met Mr Pierre koman en Minis pou *Foreign Affairs* avek son talan, son bagaz ki i annan, bann koneksyon ki'n etabli lo nivo rezyon akòz Sesel i annan en bon relasyon.

I osi enportan pou revwar ki mannyer nou kapab osi

benefisye dan nou Program *Socioeconomic* an term bann lesanz ekonomik ki larezyon i deza annan ki nou pa pe neserman *tap into*. Gran potansyel i annan, nou pe *reply* tou kou lo bann pei ki pli lwen pou fer komers ki i annan bann kou adisyonnèl kot i konsèrn komers, transportasyon ki si ou ti etabli bann lyen rezyonal ki ti pou sov pei plizyè milyon dolar.

E ti ava ede osi pou fer desann *the cost of living* akòz en konponan ki fer kou monte se kou sa ki nou apel bann *CIF* (*Cost, Freight, Insurance*) letan i konsèrn akòz nou pa prodwi preski naryen nou bezwen enport plizyè komodite. E sa i ava ede osi. An menm tan, mon pa swete ki nou bann relasyon diplomasi, bilateral ouswa multilateral ki'n egziste i ganny menase.

Nou'n vwar serten menas ki'n arive. Moris, bann komantr ki parfw bann dirizan i fer ki met anko relasyon ant pei. Nou annan bann lenterferans ki'n arive avek bann pei, nou'n vwar dan *Red Sea* parfw nou'n al *align* nou avek serten pei ki pa neserman popiler dan en fason avek bann rezon konfli diplomasi. So nou bezwen parfw *be careful* parfw ouswa

letan nou bezwen ganny bann bon *advice* osi avek bann ki annan sa bann leksptiz pou ki nou fer, ki direksyon nou pran akòz ou met an menas.

En dimoun i kapab met an menas en pei, en nasyon par zis serten parol, serten aksyon nou bezwen konsyan sa. So, Madanm Speaker, Mr Pierre i annan sa abilite e in demontre poudir i annan son abilite koman en zanfàn Sesel mwan mon dir nou bezwen parfw met le pase a kote e bouz devan koman en nasyon ki anvi progrese e vin sa model mondyal. Mersi.

MADAM SPEAKER

Onorab Arissol.

HON SANDY ARISSOL

Mersi Madanm Speaker. Bonzour tou dimoun ki a lekout. Bann Manm Lasanble Nasyonal osi parey.

Madanm Speaker, mon ti a kontan mon osi de lapar *LDS Caucus*, felisit ou pour lafason ki ou pe diriz Lasanble Nasyonal.

E mon kontan lafason ki ou pe pran, parske ozordi ou napa en *Leader* Lopozisyon ki pe kriy avek ou. Ou napa en *Leader* Lopozisyon ki pe maltret tou dimoun ki vin isi devan.

Me nou tou lo sa kote latab nou pe konport nou koman bann Lopozisyon, responsab e serye, kot nou kapab enterakte avek ou konman Speaker.

Nou koz byen, nou lev nou lanmen e nou demann keston. Zis parey la nou pa'n anvi demann keston. I nou drwa pour nou pa demann keston. Me i osi nou drwa pour nou kapab enterakte avek ou.

Alor, lo nou kote osi nou anvi felisit ou pour ou travay ki ou pe fer, e lafason ki ou pe enterakte avek bann Manm lo sa kote latab.

(APPLAUSE)

HON SANDY ARISSOL

Mon anvi osi prezant en kondoleans Madanm Speaker, lo lapar Onorab Gervais Henrie enn nou frer. In perdi enn son frer yer swar 2er bomaten, *ICU*.

E nou lo sa kote latab nou prezant li tou nou sener kondoleans e nou swete ki li avek son fanmir zot a kapab dousman, dousman rekipere e ganny kouraz pour zot fer demars pou zot kapab okip zot defen e ki zot reste ansanm koman en frer.

Alor Onorab Henrie kot ou ete, nou prezant ou nou

kondoleans ki ou pa'n kapab avek nou ozordi kot Lasanble Nasyonal.

Madanm Speaker, David Pierre in vin devan nou Lasanble parske in ganny prononse nominen parey nou dir, Patrick Herminie konman Prezidan Larepublik Sesel pour li vin en Minis dan Gouvernman.

E bann Manm ki'n sey demann keston, zot tou zot in say lo kote Ledikasyon, si ou pou vin Minis Ledikasyon? Si ou kapab vin Minis Ledikasyon?

E tou parol lendikasyon deor se i pou vin Minis Ledikasyon, ki zot pa pe neserman dir nou direktman me sakenn i sey say kontour an relasyon avek sa. Be sa i ava reste avek zot pour zot deside ki Minister zot met li ladan.

Me letan bann lalis in sorti, nou get bann reaksyon dimoun laba deor e David li Seselwa in dekrir li konman en zida. Pour ki rezon? Mon pa konnen. Me selman letan lo rezo sosyal i annan sa e zis parey lo rezo sosyal ozordi ler nou pe koze la, i annan en dokiman ki'n ganny sinyen par zisteman Mr Barry Faure ki ti dan nou Lasanble Nasyonal yer,

ki'n *deny* i pa'n siny okenn dokiman.

La i annan en dokiman ki li in sinyen, zisteman an relasyon avek sa baz militer ki in dir nou i pour *Coast Guard* Sesel ki pou pti, pti. Me selman letan nou'n get sa grander *runway* ki i annan lo sa dokiman, ki li in sinyen, mon pa tro krwar i ti pe koz menm langaz avek sa papye ki li in sinyen, sa dokiman kekfw i pa tro rapel.

Me mon kontan letan Mr David Pierre in vin dan nou Lasanble e Onorab Aglae in fer sa kler, in dir i enn son rezidan ki reste Morne Blanc, ki mon konnen kote i reste.

Be i annan en keksoz ki'n bliye dir ek nou, poudir i ti deza annan en bout later anler Anse Royale *landbank* apre li menm li i ti ganny en la - gro propriyete anler La Louise. Apre i ti ganny en propriyete anler Le Niole dan distrik Bel Ombre.

E la mon kontan, li menm li, sa menm zonm, sa Seselwa, pour 4enm fwa i ganny li en propriyete Morne Blanc. Me par kont nou annan bann lezot Seselwa ki siport *US*, ki li i ankor pe esper en propriyete, en bout later pour li kapab aste li osi, pour li kapab anmas son fanmir li osi, zisteman parey Mr

David Pierre in fer nou konnen kot i pe reste ozordi.

E tousala se bann *popoyote ki li in annan e ozordi finalman in ganny enn pour li.

I osi annan zot a rapel David Pierre ti deza en Manm *SNP*, alors en zour apre i ti vin *PDM*. I ti vin dan Lasanble Nasyonal anba en bannyer *PDM*. E nou tou nou rapel lekel ki ti kree *PDM*.

Sete Mr Danny Faure ki ti kree *PDM* avek parti *SPPF* sa letan parske ti napa Lopozisyon dan Lasanble Nasyonal. Dimoun ti desann an gran mazorite pou *boycott* eleksyon sa zour. Alor, *PDM* ti ganny kree.

E nou kontan ki ti annan sa swadizan Lopozisyon ki ti reprezant zot sa letan, ler zot ti an gran mazorite dan Lasanble Nasyonal kot nou ti annan - kot li David Pierre, sa zour dan Lasanble Nasyonal i ti propoz son lekor, i ti segonn son lekor e i ti vot pour son lekor koman *Leader* Lopozisyon sa letan.

E mon kontan letan Onorab Aglae in vini in dir ek nou, 'annou pa mazin zis lepase, annou bouz en pe lo devan, annou aksepte tou bann zanfann Sesel'.

Mon kontan sa *statement* ki nouvo Depite Speaker in fer. Mon swete ki sa *statement* ki in

fer, i reste osi pour bann Seselwa laba deor ki pe travay dan bann Departman Gouvernman ozordi, ki'n vin anba nouvo Ladministrasyon Parti Lepep.

Kot tou bann Seselwa ki annan son performans, parey zot in dir David Pierre i annan, zot abilite, zot kapasite, zot osi zot ganny sa posibilite parey Onorab Aglae in *remind* nou, pou zot servi zot pei parey zot pe donn David Pierre sa posibilite pou servi son pei.

Ti ava byen nou komans isi kot Lasanble Nasyonal, kot personn pa perdi zot plas travay e tou dan bann Minister Gouvernman kot tou Seselwa, parey David Pierre, zot in dir zot osi zot a ganny posibilite menm zot lopinyon politik pa parey.

Annou kit tou bann keksoz deryer nouvo Depite Speaker in dir nou, annou pa mazin zis politik, be annou rode ki mannyer ansanm nou kapab ankadre nou bann profesyonnèl Seselwa, pour zot kapab reste dan zot landrwa travay kot zot ete ozordi.

E mon kontan letan li Onorab David Pierre in ganny rekonpanse an relasyon avek travay ki in fer pou US. Nou ti aprann ki li ki pe fer konpanyi Mont Buxton, li ki'n fer

konpanyi Grand Anse Mahe. E bann rekonpans ozordi.

E mon konpran ozordi in vin - i ava vin Minis anba Ladministrasyon, parske in byen travay, in byen fer konpanyi pour US. Zis parey sa enn ki ti pe marse Lari Bazar avek *bodyguard* akòz li osi in ti'n byen fer son travay lo rezo sosyal.

E la nou aprann poudir en bann in ganny 625mil, 235mil, 115mil, 80mil me tousala i bann rekonpans ki bann dimoun ki'n byen travay dan Parti US in gannye.

Alor mon swete, ou sa siporter osi ki'n desann, ki'n ranpli laplenn, ki'n ranpli *pickup*, zot in kriye for, zot osi zot a ganny en 625mil, en 235mil en 115mil, en 80mil pou asire ki tou dimoun zot osi zot a ganny rekonpanse parey Mr David Pierre, i pe ganny rekonpanse pou vin en Minis anba nouvo Ladministrasyon Mr Patrick Herminie konman Prezidan.

Pour nou pa nanryen nouvo. Parey mon'n dir, David Pierre anba PDM, se zot ki ti kree li e alors zot ki pou donn li son rekonpans ozordi avek mazorite ki zot annan, anba zot ladministrasyon.

Me mon swete Madanm Speaker, ki tou bann travayer

Seselwa zot ganny menm tretman parey Mr Pierre pe gannyen ozordi, avek *statement* ki nou nouvo Depite Speaker in fer resorti.

E David Pierrre in koz lo 4 ‘P’, Performans, *Process* avek Progre apre mon mazine *payment* i vin *the last ‘P’* ki i pa’n dir nou. Mersi bokou.

(APPLAUSE)

MADAM SPEAKER

Avan mon pas laparol lot Manm, Onorab Arissol, mon ti a voudre lo mon lapar e lo lapar Lasanble Nasyonal pou *express* mon *sympathies* pour Onorab Henrie. *Tragic news*.

I pa zanmen fasil. I en keksoz vreman difisil perdi en dimoun ki nou *close* avek. Onorab Georges?

HON BERNARD GEORGES

Mersi Madanm Speaker. Bonzour tou bann Manm Onorab, tou dimoun ki pe ekout nou. Mersi Madanm Speaker pou donn mwan laparol bomaten. Mon ti a oule osi pas nou senpati avek Onorab Arissol, *Chief Whip LDS* aköz li osi son madanm in perdi enn son pros. Alor, lo nou kote Onorab Arissol nou ti a kontan pas nou kondoleans avek ou. E

demann ou pou pas sa avek ou Madanm Silvouple.

Madanm Speaker, Mr David Pierre nou tou nou konn li tre byen, in asiz lo menm kote latab avek mwan e serten parmi nou isi dan Parti SNP dan Lasanble Nasyonal pandan bokou lannen. E nou napa okenn dout lo son konpetans lo son *training* lo son parkour edikasyonnel, e koman Anbasader. Mon pa isi ozordi pou mwan kritik okenn son bann konpetans, se en zanfan Sesel ki annan son konpetans.

E ozordi in ganny swazir pou li al deservi en o fonksyon dan parti US, sa se son sans. Par kont mon anvi adres mon bann koleg lo lot kote latab. Parey mon ti fer yer an koneksyon avek sa nominasyon ki zot pou al aprouve taler 18 zot pou vot an faver. E mon anvi demann zot, eski zot in fer en bon refleksyon? Eski zot in mazin byen ki si sa ki zot pe fer ler zot pe aprouv oubyen ler zot pou aprouv taler nominasyon Mr Pierre?

Prezidan Herminie in ganny li 34 ekek mil vot. Tir lanmwatye ladan aköz zot zenn. Tir 24 mil, dan sa 10 mil ki reste zot pa’n kapab trouv en lot dimoun ki’n siport zot parti depi 1964 pou li vin Minis Ledikasyon demen. Eski zot in

kit tou sa bann dimoun ki'n vot pou zot al rod en dimoun dan en lot pase politik pou zot apwent koman Minis Ledikasyon?

Mon demann zot sa kestyon aköz zot siporter laba deor pe demann zot sa kestyon. E zot isi anndan zot pe zwe sourd lo zot siporter tou sa 34 mil dimoun ki'n desann pou vot pou zot la, zot pe zwe sourd lo la. Madanm Speaker, Mr Pierre parey mon'n dir i en dimoun ki nou konn li byen. E son parkour politik ki ti en parkour egzampler ziska 2010, ti ava kapab fer ozordi ki nou pa ti pou pe vot kont son nominasyon.

Me lanbisyon ek larzan malerezman in gat sa dimoun. I en zanfann Les Mamelles. Me se en zonn ki ganny ki tou son aksyon i ganny determinen lo lanbisyon avek larzan. E mwan mon konn sa tre byen. E mon konnen aköz Mr David Pierre pa'n vin, pa'n reste nou Parti SNP se aköz i ti anvi vin kandida Vis-Prezidansyel. I ti anvi sot bar devan par egzannp Jean-Francois Ferrari, Roger Mancienne, Bernard Georges bann dimoun ki ti'n la depi avan. I ti anvi li ganny konsidere koman kandida Vis-Prezidansyel, sa mon konn li tre byen.

E ler in fer sa, *anyway* mwan zanmen mon'n annan sa laspirasyon. Me zis pou dir, zis pou dir ki ti annan lezot dimoun ki ti'n la avan li e pli lontan. E pou li kapab arive triyange, in ariv la kot in arive parey nou konnen son parkour politik in form en parti politik. In ganny anvoy dan Lasanble Nasyonal atraver en zizman Lakour Dapel par atraver vot dan bwat vote aköz in ganny apepre mil vot.

In vin *Leader* Lopoziyon apepre mil vot. I pa'n annan sa limilite pou dir ki i ti *Leader* Lopoziyon dan Lasanble Nasyonal, son CV i devan mwan la. E in apel son lekor *Leader* Lopoziyon. Alor, nou tou nou ti konnen ki *Leader* Lopoziyon i ti en boug ki apel Wavel Ramkalawan, e ki ti pe *lead* Lopoziyon dan pei.

Ou war si sa bann keksoz sa bann lanbisyon, si sa bann kontan annan tit se sa bann kontan annan gro propriyete bann keksoz koumsa ki fer mwan demann en kestyon lo eski zot pa'n kapab trouv en lot dimoun ki ti pli senser dan son lavi ki ti mwen anbisye e ki ti a kapab fer sa travay koman Minis Ledikasyon *or whatever* Minister ki i pou al ladan.

Me i pli pir ki sa Madanm Speaker. Aköz? E sa mon ti a kontan ki zot mazin sa byen ler

zot dan zot lili tanto. Se aköz sa ki'n arive an 2010, ler Mr David Pierre i deside deköste li avek SNP, zet SNP anba bis isi dan Lasanble Nasyonal. Se sa ki'n fer ki 15 lo 10 in arive, e ki zot, zot in bezwen reste dan en peryod koabitasyon dan Lopozisyon pou 10an.

Konpran byen enn bann rezon prensipal ki sa in arive se aköz sa traizon Mr Pierre an 2010. E la ozordi zot pe koz li labous plen. Zot pe koz li labous plen konmkwa napa en lot dimoun ki zot in kapab al trouve laba deor pou vin Minis Ledikasyon. Madanm Speaker, Mr Pierre in zwe son rol ekstrememan byen. E zot Prezidan, zot Prezidan Michel in tonm dan son latrap in fer li vin *Leader* Lopozisyon. In fer li vin Anbasader.

E la ozordi enn son sikseser pe fer li vin Minis. Dan tousala mwan mon dir *well done* Mr Pierre. Ou'n zwe ou cannot byen, e ou pe al ganny sa rekonpans ki ou ti pe rode. Se zot mon bann zanmi lo lot kote latab se zot ki'n trai sa 34mil dimoun ki'n vot pou zot. Se zot ozordi ki pou bezwen al rann kont avek Lepep Seselwa ki'n met zot la, aköz zot pa'n kapab al trouv en meyer dimoun pou zot kapab fer vin Minis Ledikasyon.

Alor Madanm Speaker, mon letan pe fini. Annefe, nou'n sot nou letan par 1 minit. Mon ti a kontan ozordi dir avek Lepep Seselwa ki pe ekout, regard byen sa ki zot vre Lasanble pe fer atraver sa bann lapwentman Minis. Konsider kisisa ki zot ti fer le 9, 10, 11 Oktob sa lannen. Kalkil byen kisisa ki zot pe fer atraver sa bann vot 18 Manm ki zot pe fer dan sa Lasanble Nasyonal.

Kalkil byen e demann zot lekor eski sa bann dimoun ki'n vin dan sa Lasanble Nasyonal la, sa 18 Manm ki zot in met la, eski zot pe vin travay pou kre en bon Lasanble? Oubyen eski parey mon'n dir yer mon pou repete, zot in vin en Lasanble *rubber-stamp* ki pou stanp tou sa ki Egzekitiv pou anvoy devan zot. E zot pou fer pase san okenn diskisyon? Mon poz sa la, zot ava reponn zot kestyon zot menm. Mersi Madanm Speaker.

MADAM SPEAKER

Nou a pran en dernyen entervenans, Onorab Gill. Apre Onorab Lemiel i ava *close*.

HON CHURCHILL GILL

Mersi Madanm Speaker. Bonzour tou Manm e tou dimoun ki pe ekout nou. Madanm Speaker, ler mon'n

ekout dernyen entervenin in koz avek Seselwa deor in dir get byen ki Manm *US* pe fer. Me sa Manm i bezwen konpran sa menm Seselwa ki i pe dir ekoute la, sa bann Seselwa in fini ekoute in pran desizyon in met li kot i ete. Napa naryen pou sa bann dimoun ekoute.

Ki sa bann dimoun in fer, se zot in pran zot desizyon e zot in elekte Dr Patrick Herminie koman Prezidan Sesel dan en legzersis demokratik. Zot in donn li manda pou li fer marse sa pei. E i anvoy son bann Minis, son bann propozisyon Minis dan Lasanble aköz fodre pa nou bliye ler eleksyon i fer lo *ballot paper* i annan Prezidan apre i annan bann Manm Lasanble.

E se sa ler zot vot Prezidan zot donn li sa manda pou li pran bann desizyon. E ler i apwent sa bann Minis i form par dan bann desizyon ki i bezwen pran pou li ganny son *Cabinet*, parey Prezidan ki ti ganny elekte 2020 ti fer. Napa naryen ki mal avek sa ki pe ganny fer. Lo kote bann Minis, ozordi nou'n vwar 5enm Minis ki'n vin dan nou Lasanble.

I kler ki i annan en levantay lentelizans, en levantay konnesans. E sa i anliny avek ki Manifesto *United Seychelles* pe dir ki Seselwa in

tonm dakor avek se zot le vwar en nouvo Sesel. E pou nou vwar en nouvo Sesel, nou bezwen annan bann dimoun konpetan pou kapab delivre lo sa promes ki'n ganny fer. E i toutafe normal ki nou bezwen annan bann dimoun ki pa neserman Lopozisyon i bezwen dakor avek. Apre tou i nou desizyon lo sa kote latap pou pran desizyon pou nou Gouvernman.

E avek sa Madanm Speaker, mon krwar sa propozisyon ki ti la ozordi avek nou, sa dimoun i annan son bagaz, i annan son konesans. E in demontre son kapasite dan plizyer landrwa enternasyonal avek lokal. E nou, nou pa war okenn naryen mal pou nou donn sipor nou Gouvernman pou nou apwent li koman en Minis. Mersi Madanm Speaker.

(APPLAUSE)

MADAM SPEAKER

Onorab Lemiel?

HON SYLVANNE LEMIEL

Mersi Madanm Speaker. Madanm Speaker, premyerman mon ti a kontan remersi tou bann Manm lo kote *United Seychelles* ki'n demann kestyon Mr Pierre. E tou bann lezot Manm ki'n entervenir lo Mosyon.

Madanm Speaker, letan Mr Pierre in vin isi devan nou mon'n vwar e konstate ki i en dimoun ki annan bokou bagaz, i en dimoun konpetan. En dimoun kapab pou pran pozisyon koman Minis. E Mr Pierre in en *teacher* tre kalifye, tre kalib. In fer lekòl bokou nou bann zenn. E petet i annan l ki'n pas dan son lanmen. In en *MNA*, in *Leader* Lopozisyon, menm si i annan pa'n kontan pou dir. I Anbasader pou Sesel.

In Lanbasader kot Linyon Afriken. E byento i pou vini en Minis. mon santi ki lafason ki nou progrese ozordi la petet en ler, sanmenm sa nou dir i byen nou annan respe parfwa pou dimoun, *ok*. Ozordi pa'n kapab demann li keston selman nou vwar zot in kritik li par deryer son ledò. Zot pa'n annan kouraz pou zot *face* li la letan in devan nou Madanm Speaker, pou zot kapab demann li sa bann keston pete ki zot in fer kritik dan zot Mosyon deryer son ledò.

E mon santi ki parfwa osi letan atraver ou Madanm Speaker, avek respe pou Onorab *LOTO*, Onorab Georges. Ou konnen lafason ki in koze ozordi, mon santi ki i krwar ki petet i kapab diviz *United Seychelles*. Me i pa pou arive sa, pa fasil pou divize *United Seychelles*.

(APPLAUSE)

HON SYLVANNE LEMIEL

Kot nou'n arive la Madanm Speaker, nou pe bouz devan, nou pe fonsè. E 2030 osi nou pou pran ankòr.

(APPLAUSE)

HON SYLVANNE LEMIEL

Madanm Speaker, pou nou apwent en Minis la i pa bezwen sorti dan okenn parti lot li. Konmsi i ti kapab en dimoun sorti dan *LDS* ki nou, nou ti ava anvi apwente koman Minis. As *long* ki i annan son kapasite, i annan son kapabilite e abilite pou li kapab fer sa travay. Ou konnen Madanm Speaker, ou war parfwa petet *LDS* pa'n zanmen onnet li dan sa zafer Sesel pou tou son zanfàn. Ou konnen akòz? Mon pe get zis ozordi la lafason ki mannyer zot pe fer.

En Minis nou dir i bezwen ganny apwente lo son abilite. Ozordi i pa moman pou nou vin koz lepase Madanm Speaker. Zot in fer sa pandan 5an, get kot zot in arive ozordi, zot dan Lopozisyon Madanm Speaker.

(APPLAUSE)

HON SYLVANNE LEMIEL

Annou get sa dimoun. Annou get sa dimoun ki vin devan nou koman en frer, koman en ser koman en Seselwa. E donn zot, zot sans Madanm Speaker pou zot prouv zot lekor. In pli ski ler pou nou aret montre ledwa. Avan mon fini Madanm Speaker, Onorab Georges li ki pou von donn nou leson ozordi pou vin dir nou lekel, lekel ki nou, nou devret mete dan nou *Cabinet*.

Madanm Speaker, letan zot ti rod tou sa bann Minis ki ti'n ariv laz retret la zot ti met dan *Cabinet*. Eski zot ti reflesir? Eski zot ti konsider sa 30 ekek mil dimoun ki an 2020 ti vot pou zot? Zot pa ti konsidere bann zenn dan sa 30 ekek mil ki ti vot pou zot pou zot mete koman Minis. So, zis Devika ek Hassan zot pou nonmen. Me larestan tou lamazorite ti retrete.

So Madanm Speaker, pa *LDS* ki pou dir nou lekel ki nou pou mete koman Minis, lekel ki nou pa pou mete. E mon redir ankor, i ti a kapab en dimoun ki ti sorti dan *LDS* menm, dan *SUM* or dan en lot. Nou tret zot koman en frer e en ser Seselwa. E mon ti a kontan demann Lasanble pou nou tou kapab aprouv Mr David Pierre koman Minis dan *Cabinet*. Mersi.

(APPLAUSE)

MADAM SPEAKER

Mersi Onorab. Nou ava aprezan pas lo vot pou Mosyon.

In accordance with Article 63(1) and 69(2) of the Constitution, this Assembly approves the proposed appointment by the President of the Republic of Mr David Claude PIERRE to the office of Minister.

Bann Manm ki vot pou Mosyon? Mersi. Okenn Manm ki vot kont? Mersi. E alors ki Mosyon in pase avek 17 vot pour, avek 14 kont. Nou ava aprezan pran en *break* ziska 11er 10.

(BREAK)

MADAM SPEAKER

Bon nou ava rebran travay pou la bomaten. Mon ava demann Onorab Lemiel pou prezant son lot Mosyon *please*.

HON SYLVANNE LEMIEL

Mersi Madanm Speaker. Lot Mosyon i lir konm swivan.

In accordance with Article 63(1) and 69(2) of the Constitution, this Assembly approves the proposed appointment by the President of the Republic of Dr. Marvin Nolan FANNY to the office of Minister. Thank you.

MADAM SPEAKER

Mersi. Mosyon i ava ganny segonde? Onorab Gill?

HON CHURCHILL GILL

Mosyon i segonde. Mersi.

MADAM SPEAKER

Mersi. Nou ava aprezan konstitye nou dan *Committee Stage*. E nou a demann sekretarya pou fer Dr Fanny antre dan *Chamber please*.

Bonzour Dr Fanny. Si ou kapab donn bann Manm en prezantasyon silvouple.

MR MARVIN FANNY

Mersi Madanm Chair. Madanm Chair. *Leader* Zafer Gouvernman dan Lasanble Nasyonal, Onorab Sylvanne Lemiel. *Leader* Lopozisyon dan Lasanble Nasyonal Onorab Bernard Georges. Tou Manm Onorab, dan Lasanble Nasyonal piblik an zeneral espesyalman bann zenn e mon bann koleg dan Minister Lasante Bonzour.

Mon asize devan zot ozordi avek loner, imilite apre mon nominasyon pou servi nou pei Sesel, dan kapasite koman en Minis. Mon apel Dr Marvin Fanny, mon annan 45an e mon annan 2 fiy zimel.

Mon'n viv en lanfans vreman senp e *humble*, e grandi dan distrik Plaisance. Mon ti al

lekol Plaisance Primer, e answit Plaisance Segonder kot apre mon'n al 1an Servis Nasyonal Lazenés NYS e fer mon letid *Polytechnic* kot mon'n fer mon *O Levels* ek mon *A Levels*, kot apre mon ti kalifye pou en labours pou al fer mon letid *medicine* an 2002.

Mwan mon ti premye Seselwa ki ti al etidye dan sa *Twinning Programme* kot bann Seselwa ti anvi fer letid *medicine* ti kapab al dan Lenn pou 2an edmi e answit 2an edmi Malezi.

Sa 5an letid Dan Lenn, e Malezi ti enn ki'n karakteriz mon karakter koman en dokter. I ti en letan mon'n akerir bokou leksperyans ki'n fer mwan vin sa Profesyonnel Lasante ki mon ete ozordi.

Apre premye staz mon letid an 2007-2009, mon ti ganny sa sans pou fer mon *internship* an Malezi, kot la mon ti ganny sans pou eksperyans diferan domenn medikal ki enkli tou spesyalite dan Lasante depi dan donn nesans pti baba, *emergency*, *pediatric* e lezot ankor.

An 2010, mon ti retourn Sesel kot mon ti zwenn Departman Sirizik. Malgre ki mon ti'n ganny ofer en Kontra 3an pou travay, e loportinite pou spesyalize an Malezi. Me

koman en Seselwa en patriyot mon ti swazir pou mwan retournen, e vin travay pou mon pei.

Ler mon ti vini, mon ti vreman sirprann ki preski tou Seselwa ki ti'n ganny anvoye pou etidye *medicine* peye par Gouvernman, pa ti'n swazir pou retourn Sesel.

An 2013, mon ti ganny sa loportinite pou al fer mon spesyalizasyon koman en sirizyen pou bann zanfan an Sid Lafrik apre en parkour vreman difisil kot mon'n aprann bokou atraver 4 diferan lopital an *Pretoria*, e *Johannesburg* mon ti reisi akonplir sa misyon.

Swivan sa, mon'n retourn Sesel e komans travay pou fer en diferans dan lavi bann zanfan Seselwa. Parey mon'n dir, mon parkour lavi in annan en keksoz ki'n toultan reste konsistan e kler.

Mon lanvi, e devosyon pou deservi dimoun avek lentegrite, lanmour e konpasyon. Se la ki mon'n aprann ki savedir vreman servi lezot, espesyalman ler sitwayen pe rod lespwar, larepons ek solisyon pou zot problem.

Sa bann moman in fer mwan devlop bann valer ki mon krwar ladan disiplin, responsabilite, konpasyon ek rezilyans.

Mon parkour profesyonnel in osi baze lo serten pozisyon ki mon'n okipe an deor tretman pasyan. Mon'n *Chair* Komite pour revwar e drafte nouvo polisi pour Proteksyon Zanfan dan Minister Lasante. Mon ti Depite *Chair* dan *Seychelles Medical and Dental Council*, kot mon'n toultan egzize ki nou travay pou ogmant standar profesyonnel, ranforsi bon gouvernans e promouvwar etik dan nou sistenm lasante.

Koman Vis-Prezidan Parti *United Seychelles* mon'n fer mon kontribisyon anver transformasyon nou parti pou vin sa ki i ete ozordi, kot bokou nou bann sitwayen, espesyalman bann zenn in annan sa lanvi pou asosye avek nou.

Mon ti a kontan azoute ki ler mon ti zwenn *United Seychelles*, pa ti zanmen mon lentansyon pou vin en Minis. Mon vreman *humble* ki dan nou Prezidan in vwar dan mwan sa potansyel pou al dan en tel pozisyon.

Madanm Chair, Servis Piblik ozordi i bezwen plis ki en dimoun avek pasyon. I bezwen en dimoun ek konesans, kouraz ek vizyon. Se pou sa rezon ki mon'n agrandi mon konpetans an deor Lasante, par fer letid dan politik, dan zesyon piblik,

public management ek dan Lalwa ek Gouvernans Lasante Global, *Global Health Law and Governance*.

Sa bann konesans pou donn mwan kapasite pou dirize pou pans stratezikman, konpran, e devlop bann polisi dan Minister kot mon pou ganny apwente.

Mon'n osi partisip dan resers ek piblikasyon dan bann zournal akademik enternasyonal, ki'n ede kontribye dan amelyorasyon pratik medikal ek desizyon baze lo levidans.

Resers in montre mwan ki en bon dirizan i bezwen ganny gide par lenformasyon konkret, inovasyon, latransparans, e reste touzour konnekte avek son bann travayer. Bann prensip fondamantal pou bon gouvernans.

Madanm Chair, nou pei ozordi pe pas dan en letan kot i annan bokou defi. Mwan mon annan en prensip kler, kot lezot i vwar difikilte mwan mon war loportinite e mon touzour lager, e travay dir pou anmenn rezilta.

Si mon ganny sa privelez pou servi koman Minis, mon pou annan 3 langazman kler avek Lepep Seselwa. Mon stil dirize pou enn ki pou konsantre otour dimoun. Sanzman, e polisi dan mon Gouvernman i

devret fer lavi nou sitwayen vin pli meyer.

Mon pou govern avek latransparans ek responsabilite, mon pou *empower* e motiv bann travayer dan mon Minister.

Madanm Chair, mon pa pe pretann ki mon konn tou keksoz me mon pe aport imilite pou ekoute, kouraz pou azir ek determinasyon pou delivre. Mon pare pou travay ansanm avek tou lede kote sa Lasanble, aköz mon devwar i pa pou deservi mon prop lentere me pou servi lepep ki'n met nou la.

Si mon ganny sa responsabilite mon pou deservi avek lentegrite, lazistis, linite ek lanmour senser pou lavenir Sesel.

Annou lev par lao divizyon, annou anbras sanzman, e donn Lepep Seselwa en rezon pou krwar dan demen.

Pou terminen, mon ti a kontan remersye mon fanmir, mon bann zanmi pros, e tou dimoun ki'n deryer mwan, ankouraz mwan, e donn mon sipor pou ariv kot mon'n arive ozordi. Mersi.

MADAM SPEAKER

Mersi Dr Fanny. Nou ava komans bann kestyon prezan. Onorab Trevor Louise.

HON TREVOR LOUISE

Mersi Madanm Chair. Felisitasyon Dokter Fanny, lo ou nominasyon. Mon kestyon i enn ki bokou Seselwa pe koze an se moman.

Ou sel *Pediatric Surgeon* ki annan koman en Seselwa e bokou pe demande ki avek ou apwentman, si i pa pou en *brain drain*, kot ou petet ou pa pou ganny sans pou ou performen koman en *surgeon*?

E mon dezyenm kestyon se, i annan en kous popilasyon ki toultan dan en sans i ganny pou ganny neglize ouswa kit deryer, sa se nou bann dimoun ki otreman kapab, e bann lezot ki annan bann *special needs*.

Ki bann mekanizm ki ou pou vin avek koman en zenn dan sa pozisyon koman Minis, ki pou asire ki sa bann dimoun i ganny byen gete? Mersi.

MR MARVIN FANNY

Mersi Onorab pou ou kestyon. Mwan koman en *Pediatric Surgeon*, sa i mon forte, sa i mon premye mon profesyon mon kapab dir. E rezon ki mon'n pran sa profesyon or sa profesyon in swazir mwan, se pou mwan kapab ede deservi bann zanfan Seselwa.

E menm si mon pou dan pos Minis, mon pou fer letan

pou mwan kapab pran ka avek nou bann zanfan, mon pa pou kre en *void* kot pou annan serten kondisyon or serten letan kot nou zanfan pa pou ganny *taken care of*.

So, mon pou kontinyen opere en fwa mwan, mon pou kontinyen fer klinik e an se moman, ki mannyer nou sistenm Lasante i marse, letan ou en spesyalis ou plizoumwenn ganny konsilte.

So, i annan toultan bann dokter ki pli *junior* ki ou, ki plizoumwenn lo *floor* zot war bann pasyan o premye, zot konsilte ou koman en spesyalis swa ou donn lenstriksyon lo telefonn, e kan nesese ou desann ou ale ou al war sa bann pasyan.

E mon annan plan osi pou osi annan *recruitment*. Akoz an se moman, dan en striktir parey Minister Lasante i annan serten sikonstans kot wi, en sel dimoun i kapab fer en travay. Be i annan letan kot sa dimoun swa i tonm malad, swa i pran konze so, i pou toultan byen ki ou annan en segon ki la, ki pou pran ka avek sa spesyalite.

E i annan Seselwa osi ki en zenn fiy ki annan lentere pou vin en *Pediatric Surgeon* e an se moman, i pe fer son demars pou li osi al etidye an Sid Lafrik. So, byento nou pou annan en lot

Seselwa ki pou vin en *Pediatric Surgeon*. E i pou en madanm. Mersi.

MADAM SPEAKER

Onorab -

MR MARVIN FANNY

Lot kestyon-

MADAM SPEAKER

Sorry.

MR MARVIN FANNY

An term, otreman kapab bann *special needs*. Dan nou Polisi Minister Lasante, i annan sa - i annan sa lankadremman pou pran ka avek bann ki otreman kapab.

Nou bezwen kree bann polisi kler, nou bezwen kre bann loportinite kler ki pou sonn zot sa sans pou zot osi epanouir, e donn sa ki zot kapab pou zot pei aköz Sesel i annan en pti gin nou, i annan en pti gin nou pou kapab fer marse nou pei.

So, nou bezwen tou nou dimoun so, nou bezwen fer sir ki nou donn loportinite egal pour tou nou sitwayen. Mersi.

MADAM SPEAKER

Onorab Naidu.

HON SATHYA NAIDU

Mersi Madanm Chair. Bonzour Dr Fanny. Felisitasyon pou ariv dan sa sez kot ou'n arive. Ou'n byen zwe ou kart.

An relasyon avek plan 100 zour. An relasyon avek Plan 100 zour, i annan en lamannman Konstitisyon ki pe ganny propoze pou kre en Lofis Direkter Prosekisyon Piblik koman en lazans endepandan ki separe avek Biro *Attorney Zeneral*.

Eski ou kapab donn nou rezondet par deryer sa propozisyon ki kot zot pou bezwen 2 tyer Lasanble Nasyonal, kot zot pou bezwen sipor Lopozisyon dizour, ki Lepep Seselwa in konfirm nou avek 15 syez pou nou kapab ganny en konprenezon vizavi sa propozisyon?

Deza, nou annan Biro *Attorney Zeneral*. Ozordi zour nou bann Avoka ki pe travay dan Biro *Attorney Zeneral* pa pe ganny byen renimere, sa i en fe an konparezon avek sekter prive.

Ki mannyer, eski sa desizyon ki zot pe pran ozordi pou annan lenpak vizavi desizyon ki zot, zot anvizaze fer?

Mon pe poz sa kestyon aköz dan ou CV ou'n fer resorti poudir ou osi Vis-Prezidan Parti *United Seychelles* e alors menm si i annan serten ki pe konplent

vizavi kestyon ki mon pe poze, mon pe poz li koman Manm Elekte pou St Louis.

Dezyenm pwen, vi ki ou annan leksptiz dan domenn Lasante. Dan okenn lenstans ki i annan ka *medical negligence*, dir avek Lepep Seselwa ki prosedir ki en dimoun i kapab swiv pou kapab ganny en rekour? Mersi.

MR MARVIN FANNY

Mersi Onorab, pou ou kestyon. Onorab, mon ti a kontan adres sa premye komanter.

Mwan koman en paran mon annan 2 zanfan ki pe grandi mon pa konnen si ou annan zanfan, mon konnen en bon pe nou la anndan i annan zanfan.

Pou pas en komanter pou dir letan en dimoun i devlope dan lavi in zwe son kart, mon krwar pa si i en bon legzanp pou zanfan.

E mwan i pa sa kalite legzanp ki mwan mon edik mon zanfan, mon edik mon zanfan pou fer pli byen posib ki zot kapab, e mon edik lezot zanfan ki dan nenport ki sa ki zot fer, zot fer li byen e si demen zot ariv kot zot sipoze arive tre byen. Akoz nou, nou viv lo en prensip, *'be what you want to be'* e si mon'n ariv la, so mon'n ariv la akoz *I wanted to be*.

(APPLAUSE)

MR MARVIN FANNY

Mersi Bokou. So, mon pou al lo ou kestyon. Premye kestyon se ki wi, nou napa en mazorite absolli dan sa Lasanble Nasyonal e sa i demontre ki nou demokrasi i vivan.

E si ou ti a kontan ki bann travayer dan *AG's Office* i ganny zot en kondisyon vreman pli, pli byen. Akoz nou konnen zot *overwhelmed*, nou konnen zot *overload* avek bokou travay.

E nou, nou pe vin avek en fason en sanzman pou fer keksoz bokou pli fasil pou zot, ki zot ava konsantre plizoumwon lo serten konponan kot nou desantraliz serten keksoz ki zot pe fer.

E si ou annan byennet pou sa bann travayer, mon ti a kontan anvoy lapel ek ou ki letan nou vin devan, ki ou donn nou koudmen pou fer pase lamannman pou ed zot.

E ou dezyenm pwen, lo ou dezyenm kestyon, lo kote negligans medikal. I annan bann striktir dan Minister Lasante kot si i annan *suspected medical negligence*. So, sa dimoun ki'n santi li *or* ganny afekte i kapab *file* en *case*.

E letan sa *case* i ganny *filed*, i annan sa *internal investigation* ki ganny fer. E letan sa *internal investigation* i ganny fer depandan lo ki rezilta sa *investigation*, *then* sa i ganny kominike avek sa dimoun ki'n ganny afekte.

Si i prouve ki i annan *negligence*, *then Medical Council* i ganny enformen. E i annan sa prosesis kot prezan nou pou bezwen diskit *about whether* nou *settle this out of court* or i al devan en Lakour. Se sa prosesis. Mersi.

MADAM SPEAKER

Onorab Grandcourt.

HON ALVIN GRANDCOURT

Mersi Madanm Speaker. Bonzour Dokter Fanny. Mon kestyon i baze lo Lasante, vi ki ou en profesyonnel lasante, nou pa konnen kote ou pou ete dan Minister me selman *as a member of next Cabinet*. Mon kestyon i pertinan avek Praslin, e servis lasante Praslin.

Parey nou konnen Lasante i enn sa bann Minister ki vreman sansib, e nou'n annan defayans dan sistenm lasante sirtou pou Zil Pros, ou menm ou'n vizit nou tou le mwan koman en spesyalis e ou konn bann defi ki bann zil i rankontre.

Alor, koman en Manm prosen *Cabinet*, ki mannyer ou pou rektifye sa bann problem e ki ou bann rekomandasyon si ou annan ki pou fer keksoz lemeyer. Mersi.

MR MARVIN FANNY

Ok. Mersi Onorab pou ou kestyon. Wi, mon fer klinik Praslin pandan lannen, detrwa fwa pandan lannen. E mon konstate ki plizoumwenn Lopital Baie Ste Anne Praslin.

So, mon konstate ki i annan defi dan sa lopital. E letan mon vwar pou mwan menm, e letan mon kominik avek bann travayer mon realize poudir i annan bokou ki nou pou bezwen fer.

Premyerman, pour mwan sa lopital mon santi i bezwen ganny swa *renovate*, swa elarzi akòz i annan bokou servis ki nou pe ofer nou bann pasyan isi Mahe, ki mon santi ki ti kapab ganny ofer Praslin.

Par egzanp, Minister Lasante i Minister ki son Bidze i plis kot i konsern *consumables*. E dan san *consumables* i pa zis sa ki pe ganny servi, be kou transportasyon.

E mwan mon santi i annan serten par egzanp, mwan koman en sirizyen i annan serten prosedir ki si nou

ti kapab amelyor sa lopital, ti kapab ganny fer Praslin akòz si i pa pe ganny fer Praslin premyerman, i annan depans pou transport sa zanfan, son paran isi Mahe, e sa i tonm lo Leta.

Be i ti pou kout bokou pli bonmarse si en lekip i al Praslin, i a pas detrwa zour i rann sa servis, e apre i retournen.

So, wi i annan bokou pou fer si mon ganny sa portfolyo definitivman mon pou annan, mon pou fer bann *meeting* konsiltatif avek bann travayer. Akòz pour mwan, zot ki pli konn problem, e zot ki annan solisyon pou problem e koman en Minis, ou bezwen kapab aprann ekoute, kapab pran sa bann solisyon an kont, e avek polisi nou Gouvernman atraver ki nou manifesto, mon enplimante pou fer keksoz bokou pli meyer. Mersi.

(interruption)

MADAM SPEAKER

Pardon, eskize?

HON JOHAN LOZE

Mon annan en *point of order* anba 49, Madanm Speaker.

MADAM SPEAKER

Which order?

HON JOHAN LOZE

Order 49, Madanm Speaker.

MADAM SPEAKER

Proceed. Raise ou order, raise ou point of order.

HON JOHAN LOZE

Madanm Speaker. Onorab Naidu, letan in pous pou saler bann travayer AG's Office, in *fail* pou deklar en *pecuniary interest* konmkwa ki i annan en *next of kin* ki travay kot AG's Office. E i pe servi son syez Lasanble pou li pous pou en logmantasyon saler pou en *next of kin*. Mersi, Madanm Speaker.

MADAM SPEAKER

This will be taken into consideration. Mon ava donn en *ruling* lo la pli tar.

HON SATHYA NAIDU

Madanm Speaker prenon kont mon non in ganny mansyonnen. Mon oule *raise* en *matter of privilege*. Wi, kekfw in kapab annan en mankman koman en Manm pou mwan deklar mon lentere.

I pa fer premye fwa, ou kapab refer referans avek *verbatim* Lasanble ler Bidze in aparet, mwan mon'n met devan konsern an relasyon avek sa size ki la.

Wi, kekfw a in kapab annan en mankman pou mwan deklar lentere dan en serten sans ki *Standing Order* i fer provizyon.

Me alors, si mon'n fer referans avek sa size, byensir ler lamannman Konstitisyon i vini mwan koman Manm Elekte ki pe reprezant zabitan St Louis pa pou koz lo la?

Alors, i absoliman normal pou mwan demann rezondet par deryer separasyon en departman, ki vin koman en promes Manifesto *United Seychelles*. E ozordi nou pa pe get saler zis en dimoun, nou pe get saler tou dimoun, ki pe travay dan sa departman e nou tou nou okouran poudir ki i en promes, e nou dwatet annan sa drwa pou nou poz kestyon.

E avek Lepep Seselwa mon napa naryen pou kasyet. Onorab Loze in koze, e mwan mon'n fini fer resorti sa pwen poudir wi, e napa okenn keksoz ki mal. Mersi.

MADAM SPEAKER

Mersi Onorab. Mon ava zis fer zot mazine ki nou dan en 8enm *Cohort*, en nouvo Lasanble. So, si i annan keksoz ki zot devret pe deklare la dan 8enm Lasanble annou fer li avan, pa apre. Mersi. Onorab Labonte, ou kestyon.

HON ANDY LABONTE

Mersi Madanm Chair. Bonzour tou dimoun ki a lekout mon bann koleg. Bonzour Dr Fanny. So, mon premye kestyon i vize ver en larepons ki Dokter Fanny in rann an relasyon avek en kestyon ki Onorab Grandcourt in demann li. Me i plito, me selman lo lopital.

Nou konnen poudir vre parey ou'n dir poudir Praslin i demann en renovasyon pou lopital e Gouvernman avan in pronons son lekor lo pou fer en nouvo lopital Sesel.

E ki ou lopinyon lo la, e ki ou panse lo sa linisyativ? E, eski Gouvernman i pou kontinyen avek sa proze lopital akoz nou war poudir i en demann pou piblik Seselwa an zeneral, e i annan en kontribisyon ki'n deza ganny fer dan kont apropiye?

E mon dezyenm kestyon i vize ver petet en - sa kestyon ki Onorab Louise in demande ler in dir bann otreman kapab. Me parey ou konnen poudir i annan en *hate speech* ki ti ganny pase dan Lasanble, e sa i osi protez bann otreman kapab, ensi byen ki bann *minority group*, ki enkli bann dimoun ki *gay, bisexual or whatsoever* ou oryantasyon seksyèl.

Eski ou Gouvernman i pe mazin pou vin *repeal* sa *Bill*? Eski ou krwar sa i pou dan lentere sa bann *minority group* an partikilye? So, mon ti a kontan ou lopinyon lo sa 2 size. Mersi.

MR MARVIN FANNY

Ok. Mersi Onorab, pou ou kestyon. Sesel i vre i bezwen en nouvo lopital e nou Gouvernman nou osi nou pou *advocate* pou en nouvo lopital.

Sel diferans ant nou polisi avek polisi ou Gouvernman, se ki nou, nou santi poudir dan moman kot Lepep Seselwa pa pe kapab soutenir zot lekora an term zot saler, mon pa krwar i *fair* ki Lepep Seselwa i bezwen pe *sponsor* pour sa lopital kan zot menm zot pa pe kapab ed zot lekora.

So, nou, nou pou fer nou pou rod led bilateral avek pei zanmi, pou menm si nou kapab ganny don for en *loan* pou nou fer sa proze arive. So, nou pou definitivman annan en nouvo lopital evantyelman.

Si ou pe get lo kote Praslin wi, i bezwen renovasyon me si i posib mwan mon santi poudir Praslin i osi bezwen en nouvo lopital. E si ti anba nou Gouvernman, sa groser lopital ki'n ganny fer La Digue a mon lopinyon ti'n devret Praslin.

E si nou ti pou fer enn La Digue, nou ti a fer enn bokou pli ptipti, an pran kont popilasyon diferans sa 2 zil.

Lo kote *hate speech* avek LGBTQAI+ nou, nou en parti ki krwar dan enklisivite, dan nou manifesto nou'n mansyonnen. Nou krwar dan donn sans tou dimoun parey, e nou pa tolere *hate speech* dan li menm aköz si nou toler *hate speech*, then sa pei pou kontinyelman divize, sa pep pou kontinyelman divize.

E nou, nou'n kontinyelman koz lo la, e Prezidan Dokter Patrick Herminie, in lans en lapel in koz lo la pandan son inogirasyon ki, *once and for all* annou inifye sa pep aköz se nou pei ki pou an retar si nou kontinyelman divize. Mersi.

MADAM SPEAKER

Onorab Toussaint. Onorab Toussaint.

HON JEAN TOUSSAINT

Mersi Madanm Speaker. Bonzour tou Manm, bonzour Dr Fanny. Mon lapresyasyon mon ti a kontan pas avek ou, pou ou ganny nominen koman en Manm *Cabinet* Minis pou *US* dan Gouvernman.

Mon konnen poudir ou spesyalite i *medicine*. Me mon osi konpran poudir ou annan

lentera en kantite dan developman lazenes, e zot lepanouisman donk, mon pe sey marye en pe sa 2 keston.

Mon ti a kontan par demann ou premyerman, kwa ki ou konstate i defi mazer, pli mazer ki ou ti a voudre kapab met lanmen lo la si zanmen ou ganny, ou ganny donnen sa pos Minis ki egalman enkorpor lazenes ladan?

E an swivan sa, an relasyon avek Lasante nou konnen poudir i annan en bon pe bann zenn ki pa neseriman zis Lasante me lezot Minister an relasyon avek karyer ki zot pa reste dan zot pozisyon kot zot in *train*, e zot bezwen bouze aköz kondisyon pa favorab pou zot kapab kontinyen travay, *basically* an relasyon avek reminerasyon.

Kwa ki ou ti ava fer premyerman, si zanmen ou ganny *allocate* sa portfolyo Minister Lasante pou *retention purposes*? Mersi.

MR MARVIN FANNY

Ok. Mersi bokou pou ou keston Onorab. Mwan mon'n toultan krwar dan *youth empowerment*. Mon ti en zenn mwan menm, kot mwan mon'n ganny *empower* par sa ki ti pli aze ki mwan. Mon'n arive kapab fer byen dan *sports*, dan letid.

So, mon'n vremen avanse dan lavi dan sa konteks.

E mwan mon toultan krwar dan lazenes, e mon krwar poudir nou devret donn lazenes *full* sans pou zot kapab devlope, e epanouir.

Aküz lazenes se fitir, lazenes se lavwa demen e si en zenn ozordi pa ganny sans pou partisipe, i pa pou war li dan fitir son pei. Aküz letan nou, nou ti zenn nou ti reve nou ti konnen kote nou anvi arive e bokou nou, nou'n arive.

Me nou bezwen donn zenn sans pou form parti, pou kapab met sa premye pyer pou zot ariv kot zot anvi arive dan lefitir. So, nou pou travay bokou avek lazenes, e lazenes pou ganny konsilte, zot pou sit *at the table*, zot pou asiz lo latab ek nou, pou met zot lide devan e pran desizyon.

Lo *retention itself*, bokou fwa ki'n arive se ki letan en serten dimoun in ariv en serten pozisyon, zot tant pou swa ser sa ki pli ba ki zot, oubyen zot pa donn loportinite sa ki pli ba ki zot, oubyen sa ki pe monte pou kapab ganny menm sans, ganny menm privez ek zot.

E bokou nou bann travayer i dekouraze, aköz zot war poudir zot pri dan serten pozisyon kot zot ete, zot pa war sa *career progression*, zot anvi -

i dir, mon'n la 10 an be kan ki mon pou monte? Kan ki mon pou ganny en lot pti step. I annan i dir ou, be al etidye. Be si ou dir al etidye, be ou pa donn li sans pou li al etidye i pa pou monte.

E apre fodre koman en profesyonnel ki annan diplom dan diferan size. En keksoz ki mon ti a kontan met devan se ki, en profesyonnel pour mwan i pa vedir toutan en bout papye. En profesyonnel se, en dimoun ki bon dan son profesyon.

E nou bezwen ankouraz tou dimoun pou devlope dan zot profesyon, sa ki kapab al etidye liniversite, fer pli byen, ganny son diplom nou ankouraze. Be bann ki zot in pran en karyer ki pa pou anmenn zot sitan lwen, nou bezwen osi ankouraz zot. Nou bezwen osi kre loportinite pou zot devlope.

Akoz a lafen dizour la, nou bezwen tou nou sitwayen, tou nou dimoun pou fer devlope nou pei, pou enplimant sa manifesto ki *United Seychelles* in vin avek.

E en lot pti pwen ki mon oule met devan se ki, mon konnen ki i annan serten dimoun ki'n ganny anpese progrese dan zot karyer, kot *file* in ganny mete dan biro Minis. So, gran mersi *United*

Seychelles in ganny eleksyon e sa bann dimoun ki'n la dan bann *post*, i annan dimoun ki pe *acting* plis ki 1an pe *act*.

Me si sa dimoun pe *act* pou 1an savedir i kapab fer sa louveraz. So, *why not* konfirm sa bann dimoun dan *post*? So, nou, ki nou bezwen fer nou pou bezwen vin fer en odit, nou pou vin revwar kwa ki'n pase e sa ki merite i pou ganny son sans pou zot al pli devan. Mersi.

MADAM SPEAKER

Onorab Romain.

HON GEORGE ROMAIN

Mersi Madanm Chair. Bonzour tou koleg Onorab, e tou dimoun a lekout e bonzour Dr Fanny. Mr Fanny - Dr Fanny pardon - anvi ki nou tou pe fer referans lo konmsi koman en dokter dan Lasante byensir nou pa pe *doubt* ou abilite.

Mon kestyon si *ever* ou vin Minis Lasante. An vi nou konnen ki dan Lasante plizyer fwa bann koze in ganny dir ki i annan defayans. Ki bann *main* keksoz ki ou pou fer ler ou pou pran sa pozisyon?

Apre mon dezyenm kestyon, vitman mon pe demann avek plizyer bann potansyel - bann dimoun ki pe vin Minis sa kestyon.

An vi ki ou ti pe tenir en pozisyon ase o dan ou parti ler ou pou pran sa pozisyon dizon Minister Lasante, byensir i en gran Minister i annan bokou travayer.

Ki mannyer ou pou travay avek ou bann *staff* lo diferan *level* menm si i annan ki kekfw pwenmvi politik i kapab diferan avek ou parti, ki mannyer ou pou adres sa dan ou Minister? Mersi Madanm Chair.

MR MARVIN FANNY

Mersi bokou pou ou kestyon. Mwan dan Minister Lasante parey mon'n dir pli boner poudir mon'n pas dan diferan lopital, i annan detrwa klinik osi mon'n ale, mon'n pase. Wi, i annan bokou defayans, i annan bokou defi. E mwan toultan mon'n an konsiltasyon avek travayer lasante, menm si mon pa ti dan en pozisyon pe zwe en rol dan politik.

Depi 2010, letan mon ti retourn Sesel mon'n toultan an konversasyon avek mon bann koleg. Kekfw mon pa'n mansyonnen, mon ti menm en Manm lo Lasosyasyon Dokter ek Dantis, kot nou ti travay lo ki mannyer pou drafte, nou ti drafte bann *Scheme of Service* pour kapab ed kondisyon bann dokter.

Pli gro *issue* dan Minister Lasante se *number one service delivery*. E *service delivery* i pa totalman lafot travayer. Letan ou annan ou en lafors travayer ki demotive, ou pa ekspekte i *deliver to the maximum*. E mon ti ganny dir par en O Zofisye dan Minister Lasante letan mon ti dir, "be nou bann travayer i demotive", mon ti ganny dir ki sa i en persepsyon.

So, pou mwan i pa en persepsyon, aköz mwan si ou war mwan dan lopital mon frekant tou kous. Mon asiz avek *nurse*, mon koz ek zot, bann travayer laboratwar, bann staf dan *Biomedical Engineering* ki aranz bann lekipman lopital.

So, mon menm koz avek pasyan. So, mon koz ek tou dimoun, e se pou sa rezon ki mon konnen ki bann *issue* dan Minister Lasante aköz mwan mon en dimoun ki *on the floor* si ou kapab dir. So, mon konstate, mon koz avek zot e mon pran zot lide e mon anmenn devan.

An term, diferans politik sa ki konn mwan i konnen poudir mwan mon en dimoun ki'n toultan lager pou mon profesyon e mon ti prouve letan mon ti asiz lo devan lopital ek en *Board* kot mon ti pe lager pou bann travayer pou ganny zot *allowance*, i pa ti annan naryen pou fer ek politik sa.

Akoz parmi sa bann travayer mon pa ti konn zot afilyasyon politik mwan, mon ti pe zis lager pou mon profesyon. E mon'n menm ede pour en garson kapab al avans son letid, kot i ti pe ganny bokou lobstak dan Minister kot mon ti ale mon ti koz pou li, pou li kapab avanse.

Ozordi in kapab fer son diplonm, i ti napa naryen pou fer avek politik e mwan mon konnen poudir li i siport Parti LDS. So, mon *when it comes to* mon profesyon mon pasyonnen, mon pa gete ki ou kouler politik. Mwan mon *believe* dan profesyonnel.

So, si nou bezwen fer sa travay, nou bezwen ploy nou lanmans semiz napa kouler politik nou ale nou travay aköz demen se pei ki pou avanse.

Si nou met diferans politik savedir nou pe met retar dan devlopman nou pei e nou ti'n kapab ariv bokou pli lwen malerezman nou'n divize pour bokou letan. E ozordi mon oule lans en lapel avek Lepep Seselwa, nenport ki ou krwayans politik, letan ou leve bomaten ou desann ou al travay, ou al travay pou ou lekor, pou ou fanmir, me osi pou ou pei.

Mon pa dir dimoun pa koz politik dan travay mwan. I

normal pou koz politik. Aköz nou koz foutbol? Enn i siport *Manu*, mwan mon siport *Liverpool*. Aköz nou koz larelizyon? So, politik osi i sipoze ganny koze. Aköz letan nou, nou pe koze nou lesanz lide e *it's a battle of the mind and the hearts*. Sa ki evantyelman *win, win*.

So, mwan mon zis dir dimoun desann travay pa per, *perform* e si ou perform ou ganny rekonpanse. *Obviously*, si ou pa *perform* ou pa kapab ekspekte ou pou ganny kit dan en pozisyon kot ou pa pe *perform*, aköz parey mon'n dir pei ki vin premye. So, ou pa kapab pe met retar pei. Mersi.

MADAM SPEAKER

Onorab David.

HON ROBERT DAVID

Mersi Madanm Speaker. Bonzour tou Manm ankor. Bonzour Dr Fanny, *welcome to* Lasanble Nasyonal. Mon ti a kontan felisit ou pou ou nominasyon koman Minis. Avek ou permisyon Madanm Speaker, mon ti a kontan partaz mon senpati avek Onorab Gervais Henrie, ki'n perdi son frer yer swar.

E lo kominote Mont Buxton, mon *extend* mon senser kondoleans avek li ki

Bondye i donn li kouraz pou fer fas avek sa sityasyon difisil e swete ki tou i ava al byen pou li avek son fanmir.

E Dr Fanny, mon - si Lasanble Nasyonal i aprouv ou nominasyon koman Minis. Ki ou pou fer pou ankouraz plis zenn Seselwa pou konsider en karyer dan Sekter Medikal? Mersi Madanm Speaker.

MR MARVIN FANNY

Ok. Mersi pou keston Onorab. Dan medikal i annan bokou *prospect*, i annan bokou sans pou avanse, e dan li menm i en travay nob, i en travay nob, i annan bokou metye ki ou kapab devlope.

Ozordi, i annan en *field* dan Lasante ki mon toultan koz lo la. E si i annan okenn bann zenn, bann etidyan ki pe ekout mwan i pa zis dokter ek *nurse* ki fer marse Servis Lasante.

I depi son *cleaner*, son *porter*, son *lab technician*, son bann *staff* dan *bio medical engineering* ki aranz lekipman ki fer sir sa bann lekipman i ganny fer son *servicing*, i ganny repare, son *nursing assistant*. I tou sa kous dimoun ki fer marse Servis Lasante.

Plizyer fwa nou bliye, nou donn plis sa rekonesan dokter ek *nurse* e nou bliye poudir par deryer zot, i annan ankor lezot

travayer ki fer marse nou Servis Lasante. E nou bezwen osi rekonnet zot osi parey ki nou rekonnet en dokter ek en *nurse*.

So, mon pou retourn lo sa pwen kot mon ti pe dir kot i annan en *field*, i annan en *field* ki apel *paramedic*, *right*. Mon ti koz lo la avek Minister Lasante ansyen letan i ti apros mwan, i ti demann mwan ki mannyer mon santi nou kapab amelyor nou sistenm Lasante?

So, mon ti donn li bokou nide. *Again*, mon pa ti get, mon pa ti gete si i ti en Minis dan Gouvernman LDS ki ti pe rod mon lide, mon ti donn lide. So, *paramedic* i en *field* kot zot parey bann dokter dan lanbilans.

Ozordi nou annan bann *emergency technician*, ki zot debourye e mon santi ki poudir nou bezwen *train* en *paramedic*. So, *paramedic* i en dokter ki vin *on scene*, i donn ou sa *full* sans pou ou lager pou ou lavi.

Konmela ki nou pe fer? Nou pe ede nou, lamazorite fwa nou pran nou bann dimoun nou anmenn zot lopital. Me si zot ti kapab ganny sa swen la, par egzanp la si mon *let's say* mon tonbe la mon pe ganny latak leker, sa dimoun i kapab vin la e komans tretman la, la, la. I donn mwan sa sans menm

avan i anmenn mwan dan lopital.

So, mon pe ankouraz bann zenn pou konsidere sa ki ti a kontan vin en *paramedic*, i en *training* 4an. Ou *train* preski parey en dokter e i annan bokou lezot *field* ankor dan Lasante ki nou bezwen dimoun. Parey mon dir nou bezwen tou, dan tou kous nou bezwen. E mon pe ankouraz zot pou pran lasante koman, koman en karyer, aköz i pou annan bokou *prospect*.

E si mwan sa i vin mon portfolyo, mon pou annan diskisyon avek Minister Finans, ki fer sir ki bann travayer Lasante i pli byen ganny gete aköz nou ti pe koz lo *retention* pli boner.

En ta travayer Lasante pa pe rod vreman larzan zot. I enportan en logmantasyon saler, be zot pe osi rod konfor, zot pe osi rod fason ki zot ganny apresye pou zot servis. Mersi.

MADAM SPEAKER

Onorab Georges.

HON BERNARD GEORGES

Mersi Madanm. Mersi Madanm Speaker. Bonzour Dr Fanny.

MR MARVIN FANNY

Bonzour.

HON BERNARD GEORGES

Dr Fanny, les mwan dir ou ki mon dezapwente, me mon osi ankouraze avek ou la ozordi. Premyerman, mon dezapwente ki koman en zanfan Plaisance ou siport *Liverpool*, e non pa *PLS United* parey Onorab Claudette Louise, ek mwan nou fer.

Mon ankouraze ki nou annan devan nou en profesyonnel, en zenn e pa zot parol. Parol ou siporter, i pa nou parol en kandida resikle, e sa i donn nou en gran lankourazman.

Permet mwan demann ou de kestyon. Premye, Premye kestyon i annan pou fer avek AI. Mon pe lir zot manifesto lo paz 17, ki annan pou fer avek ‘*health and wellbeing*’ e mon vwar *AI right across, right across*.

Ou en profesyonnel, tanzib en zonm me mon vwar ki zot pe al dan *Harnessing Artificial Intelligence*. *AI will transform health care, integrating AI driven tools. AI predicted analytics using AI assisted diagnostic. Improving elderly care with AI, mental health services with AI unable early warning systems. Focus on AI competencies, implementing AI base hospital management.*

Ler mon pe lir sa mon en pti pe per, mon vwar ki sa *care* ki nou abitye - mon pa kont *AI* mon krwar i annan son rol, i annan son *use*, e i kapab ede. Me mon persepsyon, e sa se mon persepsyon se, ler mon lir zot manifesto, sirtou an sa ki konsern *health*, mon vwar ki zot in abandonn dan en serten fason sa *human touch* e zot pe al dan *AI* dan tro bokou, dan tro bokou domenn.

Alor, mon anvi premyerman ki ou reasir mwan ki sa i pa leka. E ki si parey lapant kestyon, i mon war si ou pou al dan Minister Lasante, ki ou pou servi *AI as a force for good*. E non pa *as a force* pou ranplas bann servis personnalize?

Dezyenm kestyon, e avek ou permisyon Madanm Speaker, kekfw mon a kapab azout en pti trwazyenm avek dezyenm kestyon se sa,

Si ou vin Minister - Minis Lasante, eski ou pa krwar ki ou pou tro pre avek ou bann koleg, ou bann *ex* koleg dan en fason ki ou pa pou kapab annan sa posibilite pou disiplin zot, oubyen pou anmenn zot dan en diferan direksyon aköz zot in koleg?

E dan sa ka, e sa i en konplent ki bokou dimoun i fer ler ou pran en dimoun dan en

profesyon, ou met li ansarz sa menm Minister ki i ladan, e sa i pa zis pou zot. Me bann Gouvernman, bann lezot Gouvernman osi in fer sa kalite keksoz. Mon ti a kontan konnen ki mannyer ou vwar sa? E avek ou permisyon Madanm Speaker, en trwazyenm pti kestyon, lalkol.

Eski ki ou pozisyon lo *alcohol advertising* ki nou vwar en pe partou dan pei deor laboutik eksetera? Mersi Madanm Speaker, pou ou lendilzans.

MR MARVIN FANNY

Ok. Mersi ou pou kestyon Onorab. En zour ler ou *free* nou ava al get en *match* ansanm, ok.

AI. *AI* i pou en *tool*, en zouti ki pou konplimant ede pou fer si ou'n pran Lasante deteksyon pli boner e osi an term tretman. So, si mon met li dan en konteks pli senp kot *AI* pa pou ranplase en imen. Par egzanp, si en dimoun i ale i fer en *CT scan*, ou fer en *CT scan* ou, *CT scan* i bann zimaz. So, ou toultan i bezwen sa imen pou li kapab asize lir sa zimaz, ok? E i pran letan pou li lir, sanmenm sa letan dimoun i al fer zot bann *Ultrasound* i al fer *CT scan* ou war zot, zot asiz en pe letan oubyen i dir ou koumsa troun dan detrwa zour pou ou

kapab ganny ou rezilta. Me avek lasistans *AI*, *AI* pou kapab lir sa bann *scan* bokou pli vit.

E sa imen li, i pou ale zis pou li verifye, pou fer sir poudir lenformasyon i korek *or not*. Be selman sa travay pou'n ganny fer bokou pli vit, e nou ekspekte dimoun ganny zot rezilta bokou pli vit. So, sa en legzanp kot ki bor *AI* i kapab ede pou fer keksoz bokou pli fasil.

AI i pa ranplas imen, me i pou ed imen. *And when it comes to AI* fodre pa ki nou per, aköz lemonn pe bouze, e nou Sesel nou pa pou kapab ganny kit an aryer.

So, i en portan ki nou osi nou bouz sitan vit ki letan sa revolisyon i arive nou, nou pa'n pri isi Sesel lwen avek lemonn. Me nou'n osi la o bor zot, e *who knows*, nou osi nou kapab *champion* dan *AI* koman en legzanp pou en Pti Leta Zil. So, annou pa per *AI* annou *embrace* li. E i pou en zouti ki kapab ed nou dan lefitir.

Ou dezyenm kestyon, tou mon bann koleg dan lopital zot konn tre byen poudir mon en dimoun ki disiplinen, *when it comes to* mon louvraz, mon pa *compromise*.

Sa ki'n travay avek mwan in konnen, letan nou pe pran ka ek pasyan, letan nou pe fer nou *rounds*. So, i bezwen annan

serten disiplin, e sa i vin otomatik. Ki mannyer nou prezant nou devan pasyan, ki mannyer nou koz ek pasyan e tretman i bezwen ganny donnen *on time*. So, mon pa pou war li en problem, aköz mon stil *leadership* mon i pou en stil demokratik me pou annan lenstan kot mon pou *autocratic*, kot mon pou bezwen pran desizyon.

Me lamazorite fwa, mon pou entegre mon bann *staff* dan *decision-making* e si zot pou bezwen ganny disiplinen, zot pou bezwen ganny disiplinen *whether* nou *close or not*, letan nou vin travay nou vin travay. Nou byen an deor travay, oubyen nou fer zanmi an deor travay *or* dan nou *break*.

Be selman letan nou pe travay nou pe travay, aköz Lepep Seselwa i egzize ki en Minister parey Minister Lasante i *deliver*. E Seselwa pe espekte en sanzman, mon krwar sa i en Minister ki Seselwa pe *zoom in* lo la, aköz i en Minister ki'n ganny bokou konplent.

E mon dakor ki i annan bokou travay. Be si sa travay i ganny fer par en lekip, e sakenn i ganny son *task* mon krwar nou pou arive fer li.

E trwazyenm pwen, lo avertisman lalkol. So, avertisman lalkol li pou mwan i

en fason ki sa bann biznes pe sey fer zot *sales, right*.

Unfortunately, letan sa lavertisman pe pase ou war poudir ki tou dimoun i war depi zanfan ziske adilt. Wi, nou kapab konsider dir pa bezwen *advertise* lo bann *building*, lo bann laboutik.

Me bokou fwa nou bann zanfan pe regard bokou plis sa bann lavertisman lo rezo sosyal, lo televizyon menm letan ou pe get *Premier League*, i *advertise* nek ou war sa ou *screen* i *minimize* ou war en *Guinness* i monte.

So, i - mon pa krwar nou devret *ban*, akòz in montre nou poudir ki letan en keksoz i ganny *ban* i kre en lot *loophole* pou fer keksoz diferan manner. E bokou fwa i vin plizoumwèn *worse than good*.

So, sa mon krwar i ava en diskisyon ki nou a bezwen fer avek tou bann antite, tou bann lorganizasyon e i ava en desizyon komen ki a bezwen ganny pran. Mersi.

MADAM SPEAKER

Onorab Uranie.

HON ROCKY URANIE

Mersi Madanm Speaker. Ankor en fwa bonzour tou koleg Onorab. Byenveni Dr Fanny isi

dan nou Lasanble. Felisitasyon pour ou nominasyon.

Dr Fanny, nou'n zwenn plizyer fwa, nou'n koze. In toultan en dimoun ki ziz byen e montre sa nivo lentelizans dan konversasyon ki ou fer. E in ganny dir avan e ou'n koze ki ou'n travay ek zenn tou, me enn ou pozisyon prefere se dan lasante.

E ou enn bann sirizyen, mon krwar sa sel sirizyen ki fer sa kalite *surgery* ki ou fer. Me eski parey nou ti vwar dan dernyen 5an, ansyen Prezidan sak fwa ti annan en nouvo dimoun ki eksepsyonnèl, in fer en keksoz eksepsyonnèl, ti ganny kriye *State House* pou felisite.

Eski ou ti gannyen sa avek sa ansyen Prezidan, konman en zenn pou montre sa rekonesans anver ou, eski ou ti gannyen sa felisitasyon? E apre La Digue nou annan serten *issues* avek *at least* en servis, sa i en pe pli spesifik, kantmenm nou'n met plizyer fwa avek Minis sortan, me in toultan donn nou en leskiz.

Nou konnen nou bezwen annan *call centre* pou lanbilans, be lanbilans in toultan reste sa problemm kot nou ganny problemm La Digue avek dimoun Digwa in toultan fer sa konplent sorti.

Eski la si ou vin en Minis pour lasante ou pou vwar en nouvo fason fer pou Digwa i kapab ganny akse ek lanbilans pli vit posib.

Dan plas ki ou bezwen *call* Mahe, Mahe rod lesplikasyon kote ou reste, isi laba. Ki laz ou annan, ki ou gannnen avan ler - e la pasyan i ganny letan-nou'n war kot ki kliyan in *pass away* aköz sa.

Eski zot pou annan - pe travay lo en meyer fason fer oubyen pou annan en meyer fason fer? Mersi.

MR MARVIN FANNY

Mersi Onorab pour ou kestyon. Mon pou reponn ou dezyenm kestyon avan, en.

Si en keksoz ti pe marse mon pa war rezon aköz nou bezwen deranze. E pour mwan i kler poudir zabitan La Digue i fristre avek lafason ki servis lanbilans pe marse. Konmsi servis an term letan ou pe *call* pou ganny en servis lanbilans.

E mwan mon santi poudir, mon dakor wi ki zot devret pe *call* en landrwa La Digue menm dan zot lopital menm, aköz lanbilans i baze laba e i bokou pli vit si sa *call* i vin pran la. E dimoun La Digue i konn zot teren pli byen ki si ou pe *call* en dimoun Mahe, souvandfwa *call centre* i en dimoun ki pa ni

konnen ki bor Belle Vue i ete, ki bor lot i ete.

So mwan mon santi poudir nou pou bezwen revwar e met en koneksyon direk kot dimoun Digwa i a *call* direk La Digue pou zot ganny zot servis lanbilans.

Ganny envite *State House*, non mon pa ti ganny envite. Be selman mwan pour mon, i pa vreman sa loner par en Prezidan ki fer mon *proud*.

Mwan mon *proud* letan mon get dan lizye mon bann pasyan. Bann pti zanfan, bann zanfan letan zot vin dan mon klinik nou enterakte, nou zwe pou fer zot *feel* konfortab. Annandler mon donn zot en pti *treats*, en draze.

So sa i ede pou - sa ki fer mon *feel proud*, e non pa ganny envite *State House* pou ganny glorifye. Si mon ti ganny envite, *yes* mon ti pou ale, be selman *it's ok still* si mon pa'n ganny envite. Mersi.

MADAM SPEAKER

Onorab Adelaide.

HON FRANCOIS ADELAIDE

Mersi Mr Chair. Bonn apre midi Dr Fanny. Dr Fanny, mwan mon kestyon pour ou i en kestyon ki tre senp, vi ki ou forte i dan domenn medikal. E mon krwar ou depan bokou lo

bann resers syantifik pour ou kapab fer ou bann travay.

I annan en *statement* ki – pa pran mwan an mal - ki Dr Herminie ti dir dan son bann *rally*. Pa *rally*, ouswa son bann rankont, i trakas mwan en pti gin. Be solman i pa vedir ki sa ki mon'n konpran i sanmenm sa ki mon'n konpran. So, mon ti a kontan ki ou eksplik mwan vi ki ou pre avek li.

Ti annan sa mo ki i ti servi ler i pou vin o pouvwat i pou dekriminaliz *witchcraft*. Pa pran mon mal. Akoz ler mon koze avek bann dimoun dan mon distrik zot en pe enkyet. Ou konnen, akoz zot annan bokou bann move leksperyans lo kote bann zafer *witchcraft*.

E petet li i pa pe dir dan sa domenn, me solman mon ti a kontan si ou kapab petet eksplik nou pour ki i napa en laper lo kominote, me nou vreman konpran ki i pe eksplik nou e ki nou a kapab analize e pran nou desizyon si i en bon keksoz, oubyen i en keksoz ki mon krwar i devret rekonsidere. Mersi bokou.

MR MARVIN FANNY

Mersi pour ou kestyon. I annan bokou Lalwa dan nou *Penal Code* ki pour nou i nepli relevan an 2025, *ok*.

Zis parey ti annan Lalwa ki ti anpes nou zwe nou moutya. Ti annan bokou – ti annan Lalwa ki ti anpes nou zwe nou moutya. Ozordi nou kapab zwe nou moutya apre 6er. Nou kapab zwe - bat nou tanbour moutya nenport ki ler. Ti annan Lalwa ki ti anpes ou mars avek en koko si ou pa ti'n dir ki bor ou ganny sa koko.

So bokou - be bokou sa bann Lalwa dan nou *Penal Code* in ganny mete par bann lepok Kolonyal parey serten Manm pe *echo* la. E eski ozordi 2025 nou krwar poudir nou kapab prouve poudir en dimoun pe fer *witchcraft*?

Eski i annan okenn *case* ki'n deza pas devan en Lakour Sesel kot en dimoun in ganny kondannen pour *witchcraft*? Mwan mon pa okouran.

Be selman mwan mon santi poudir mwan mon lopinyon i pa relevan e konman en zonm lasyans, mwan mon pa krwar dan *witchcraft*.

Mon konnen poudir i annan le byen ek le mal, be selman ou bezwen kapab prouve poudir en dimoun pe fer *witchcraft*, pe fer grigri. E mon totalman dakor avek li ki sa Lalwa nepli relevan dan 2025. Mersi.

MADAM SPEAKER

Onorab Larsen.

HON CECILE LARSEN

Mersi Madanm Speaker. Bonn apre midi *à tous*, espesyalman tou zabitan Au Cap ki a lekout. Felisitasyon lo ou nominasyon Dr Fanny.

Konman en spesyalis lasante, permet mwan demann ou en kestyon kot i konsern en program silvouple. I annan sa *share employment* ki pe ankadre bann zenn anba Minister Lasante, ki mon pa tro asire si ou *aware of it or not*.

Mon ti a kontan konnen ki prosedir ki sipoze swiv apre lan ki sa bann zenn in dan lanplwa? Kwa ki pe fer mon demann ou sa kestyon, se akòz i annan zenn ki apre lan anba sa program zot in ganny dir napa plas pou anploy zot. Mersi Madanm Speaker.

MR MARVIN FANNY

Ok, mersi Onorab pour ou kestyon. *Unfortunately*, mon pa okouran sa program. Si mon ganny sa portfolyo mon pou fer sir mon azour avek e mon pou vwar - mon pou bezwen vwar ki *follow up* ki vini apre ki sa bann zenn in antre dan sa program.

E nou pou bezwen get osi sa Minister antyerman ki bann *post* ki *available*. E si i neseler

nou ava plas sa bann zenn dan bann *open post*. Mersi.

MADAM SPEAKER

Nou ava pran 2 dernyen kestyon. Onorab Roucou apre Onorab Valdana Sultan.

HON MICHEL ROUCOU

Madanm Chair, bonzour, mersi. Bonzour Dr Fanny, *welcome* dan Lasanble e mon *congratulate* ou pour ou nominasyon pour plas Minis koman en zenn.

MR MARVIN FANNY

Mersi.

HON MICHEL ROUCOU

Doctor, annefe zis avan mon demann mon kestyon zis petet mon ava zis demann ou pou revwar en pti pe sa desizyon lo kote *witchcraft*, akòz nou riske pe ouver en laport ek bokou leokri deor la ki nou pa pou kapab fermen apre.

Apre, mon kestyon i se ki konman en profesyonnel lasante ki nou mazin bokou nou, nou pe prezimen ki ou pou pran sa pozisyon Minis Lasante la deor.

Dan premye 100 zour, ki bann pwenn konkret dan sa Minister si an ka ou vin Minis Lasante, ki ou, ou krwar ou pou

anmenn sa transformasyon li menm li? Mersi.

MR MARVIN FANNY

Mersi pour ou kestyon Onorab. *Ok*, dan premye 100 zour parey mon'n dir pli boner nou bezwen revwar nou *service delivery*. Nou pou bezwen vwar nou premye - nou *point of care* kot sa premye landrwa kot dimoun i ganny resevwar.

Mwan mon anvizaze ki nou - nou donn nou bann dimoun lo *point of care* en pti *training* lo *customer care*. Akoz en bon pe fwa nou met serten dimoun dan serten pozisyon san ki nou donn zot bagaz.

So i enportan ki si mon sa premye dimoun ki ou zwenn, si mwan mon mal koz ek ou, mon mal akeyir ou, ou pou anmenn sa fristrasyon *from* devan anndan kot *nurse*, kot dokter.

So sa i en laspe ki mwan mon santi nou - i pa kestyon ki nou pe degrad nou bann dimoun. Be selman i enportan ki letan ou pe fer en louvraz ou annan bagaz apropiye pou fer sa louvraz. So, *customer care* i enn.

Dezyenmman, nou pou bezwen revwar bann *post* pour serten endividi. Par egzanp mon'n mansyonnen boner, i annan *staff* ki pe *act* pour plis ki 1an, so nou bezwen gete. Sa

bann *staff*, si ou ankor pe *act* savedir ou sipoze ganny *confirmed into post*.

I annan dokter ki dan en *post* ki *deserve* en promosyon *for many years* pa ankor kapab ganny promote. I annan spesyalis ki vini i sipoze antre lo en kad dan *Scheme of Service* i ganny mete pli ba, i dir mon anvi gete si ou kapab travay avan. Be selman i annan ki vini i antre direk anler. So en pwa de mezir fodre arete dan Minister Lasante.

So en dimoun i bezwen ganny mete dan pozisyon ki i merite. *It's all about fairness* e sanmenm sa ki fer ki bann *staff* i dezapwente, bann *staff* moral i ba. Letan moral i ba parey mon'n dir zot pa *deliver* 100poursan.

E nou menm nou ki servi sa bann Servis Lasante apre ki nou ek nou bann fanmir ki vin viktim sa. E an menm tan nou bezwen revwar, nou bezwen gete si sa sistenm ki nou pe servi i marse.

E sa mon pou zwenn avek bann *stakeholders* si mwan ki vin Minis Lasante, mon zwenn ek bann *stakeholders* pour nou asize, pour nou vwar bann striktir dan Minister Lasante pou gete ki sanzman ki bezwen ganny fer pou fer keksoz bokou pli fasil. Or, si i annan keksoz ki

nou pou kite, ki mannyer nou pou amelyor lo la. Mersi.

MADAM SPEAKER

Onorab Valdana Sultan.

HON VALDANA SULTAN

Mersi Madanm Speaker. Bonn apre midi tou Manm. Bonn apre midi Dr Fanny.

MR MARVIN FANNY

Bonn apremidi.

HON VALDANA SULTAN

Madanm Speaker, permet mwan en pti remark avan mon komanse. Mon pa vreman konn Dr Fanny *as such*, me si mon pa tronpe ou zanfan en ansyen koleg ansennyan Miss Helene en zanmi, en madanm ki *speak highly of* son bann zanfan.

So, avan mon demann ou mon kestyon Dr Fanny, i annan en keksoz, en fraz ki ou'n servi ki petet mon krwar sa nou ava annan – nou ava annan *something in common* sa pti bout “*be what you want to be*”.

Me selman mwan mon toultan dir zanfan, “*be what you want to be through hard and honest work*” aköz mon pa anvi zot *be what you want to be no matter how*.

So, mon kestyon pour ou Dr Fanny i, dan ou prezantasyon taler ou'n dir nou

ki ou pare pou travay avek tou le de kote. So, eksplik nou ki mannyer ki - oubyen kwa ki ou, ou pou anmennen inikman dan ou Gouvernman pou fer sa arive?

Petet osi ki ou plan pou ranforsi konfyans piblik dan nenport ki Minister ki ou ganny sa responsabilite? E lefe ki ou Vis-Prezidan ou parti, kwa ki ou pou fer *or* ki fason ki ou pou met lentere nasyonal par lao ou lentere parti? Mersi.

MR MARVIN FANNY

Ok. Mersi pour ou kestyon Onorab. Parey mon'n dir pli boner, mwan letan mon vin travay mon pa get kouler politik. Menm parey letan mon bann pasyan i vin war mwan, mon pa demann zot ki zot krwayans politik, mon tret zot koman en pasyan.

E dan mon travay dan mon lekip sa osi i pou parey. Aköz parey mon'n dir, mwan mon krwar dan profesyonnel. So si en dimoun i pare pou travay pou fer Minister bouze, e an menm tan fer pei bouze e an menm tan donn sa satisfaksyon nou pep, *you're welcome*.

Aköz nou'n vin la pou travay, nou'n vin la pou delivre. Parey mon'n dir, ou kapab annan ou krwayans politik, ou kapab ganny konversasyon

politik, *but after all* nou main purpose, nou primary goal se pou vin travay pou fer marse sa Minister e fer marse nou pei. Mersi.

MADAM SPEAKER

Mersi Dr Fanny. Nou ava dir ou mersi pou reponn bann kestyon e nou ava eskiz ou dan lasal.

MR MARVIN FANNY

Mersi Madanm Chair.

MADAM SPEAKER

Nou ava prezan retourn *in Assembly*. Deba i aprezan ouver lo Mosyon. Onorab Woodcock?

HON WAVEL WOODCOCK

Mersi Madanm Speaker. Madanm Speaker, Dr Fanny i en dimoun ki mon konnen ase byen. Mon byen avek li. Annefe mon madanm ki'n ansennyan son 2 fiy. E *more than once - more than once* nou'n zwenn nou'n deza ganny en dyalog, menm si nou lapartenans politik i diferan.

Ozordi sa ki nou pe gete ler nou pe pran desizyon lo en endividi, en zonm entelizan *or anyone to that matter* pou vin Minis, nou pa pe neseserman baz li lo konpetans en dimoun, me nou pe baz li lo plizyer keksoz.

Parey nou'n koze lo entegrite, lo karakter e plizyer, plizyer keksoz ki nou pe analize ansanm pour nou pran desizyon si nou pou siport nominasyon pour en dimoun vin en Minis.

Wi, dan son CV parey mon'n dir, nou war son konpetans. En dokter, en dokter kalifye. Me ler nou'n kestyonn li la i annan serten keksoz ki in dir ki petet i kapab fer nou mazin pli profon.

Parey en konparezon ler nou'n kestyon li lo size lasante ki dayer i son domenn, i konn sa tre byen, i annan serten keksoz ki in dir petet ki i fer nou mazin 2 fwa.

Parey en konparezon, ler nou'n demann li kestyon lo sa size lopital, Lopital Sesel annefe ki en fon in konmans ganny *raised by the previous administration* pou fer en nouvo lopital. E sa ki'n tous mwan en pti pe ou kapab dir se son larepons menm ler in koz lo size Lopital La Digue.

Parey in dir poudir i pa krwar ki nou ti bezwen en lopital sa grander La Digue. E annefe sa lopital i en swe ki pep Digwaz *for so many years* in demande ti pe espekite. E ozordi i annan plizyer bann servis ki pe ofer dan sa lopital, enkli dyaliz e lezot servis.

E ler nou pran desizyon, *whatever* desizyon ki nou pran nou pa kapab pran en desizyon baze lo ozordi ouswa baze lo fitir pres. Nou bezwen mazin okenn desizyon ki nou pran nou bezwen mazin *in the long term* - 20an, 30an, 50an *down the line*.

E ozordi nou pe vwar ler nou get parey Lopital Praslin menm Baie Ste Anne, ou vwar ki ozordi Lopital Baie Ste Anne vre in komans vin tro pti. Akoz ler nou'n fer sa lopital nou pa'n pran kont ki popilasyon pe kontinyelman grandi. Popilasyon Praslin in grandi. Popilasyon Mahe in kontinyelman grandi e La Digue osi popilasyon pe kontinyelman grandi. Savedir ler ou vin en Minis, ou bezwen mazine *whatever* desizyon ki ou pran ou bezwen mazin son lenpak ki pou annan pour bann zenerasyon ki pe vini.

Solman mon santi sa Lopital La Digue i en lopital ki ti neser. Akoz ler ou pa get ozordi or ou mazin demen an mezir nou popilasyon i grandi e i pa zis deservi Seselwa, me i osi deservi bann etranze ki vin lo nou later Sesel.

En konsern ki mon annan, in dir dan son larepons ki i pa an faver sa zafer *raise* en fon pour en lopital. Sa fon i pa

en keksoz ki in ganny forse lo dimoun, in dir fodre tou dimoun i kontribye dan sa fon. I en keksoz volonter. Okenn dimoun ki anvi fer donasyon-dayer ozordi Sesel nou annan en kantite biznes, kantite lakonpannyen ki pe fer vreman byen Sesel ki zot kapab osi donn en koudmen dan kontribye anver okenn Proze Nasyonal.

E i annan dimoun ki pe fer sa ek leker, akoz kekfw in pas dan bann sityasyon lasante. In war ler in al lopital in ganny sa servis, sa swen ki i bezwen e i anvi kontribye anver en lopital pou benefisye nou pei.

Mwan mon krwar poudir nou bezwen ankouraze bann tel keksoz. E dayer ler nou pe koz lo en lopital, i annan en kantite dimoun ki ti kapab fer kontribisyon anver en tel proze.

Parey ler ou pran legzanp, bann parti politik, parey *United Seychelles* avek tou sa bann later ki zot in vann, sa kantite milyon ki zot in fer ki zot in anmase avek lavant bann later ki zot in ganny pour R1, zot in vann pour milyon, zot ti kapab osi kontribye anver sa olye aste eleksyon, Madanm Speaker. Larzan ki zot in akimile ti kapab ganny servi pou ede fer bann Proze Nasyonal parey Lopital Praslin or Mahe.

Me sa ki enteresan Madanm Speaker, se ki in dir pou *fund* en lopital ki nou bezwen swa Mahe Lopital Sesel Viktorya, swa Praslin zot pou *raise fund* atraver bann relasyon bilateral. Be i montre ou poudir zot pa *true to their words*.

Zot in akiz nou konmkwa nou relasyon bilateral avek plizyer pei ki nou pe ganny plizyer keksoz, selman zot osi zot dir zot pou rod *funding* pour bann proze nasyonal atraver relasyon bilateral. Avek ki bann pei zot pou rod sa?

Mon mazine nou, nou'n tap detrwa laport, detrwa pei, *UAE*, partou. Me mwan mon prezimen poudir zot pli gro led, pli gro sipor ki zot kapab gannyen pour sa bann proze se Lenn.

Akoz - e zot in mansyonnen enn de bann Minis, aköz bann keksoz ki zot pou gannyen ki enkli - sanmenm sa rezon ki ou war zot pe taye pou fer sa Baz Militer *Assomption*, ki yer en kandida en msye ki ti ganny nominen Mr Faure, ti vin devan nou e kareman koz manti devan Lepep Seselwa pou dir ki i napa okenn lagreman.

E la ozordi lagreman pe ganny sirkile partou pour tou dimoun war. Nou pe war ki

groser, ki lanpler proze ki ti pe ganny - ki pe al ganny fer lo zil *Assomption* ki in kareman kategorikman *deny* e koz mansonz devan sa pep Lepep Seselwa. E la tou sa bann keksoz i partou dan piblik, nou pe war laverite.

Sanmenm sa ler nou konsider en Minis, ou pe konsider opsyon kredibilite. Si en dimoun ki pou vin koz laverite. En dimoun ki pou fran e onnet. Ouswa si en dimoun ki pou vin koz mansonz avek nou parey nou'n vwar yer dan sa Lasanble Nasyonal.

Ou konnen, mon'n vremen dezapwente boner ler en *statement* in ganny fer par - *was it the LGB*, kot in ensilte bann dimoun en pe pli aze. I dir nou ti annan serten Minis trwazyenm-az.

Ou le dir mwan eski en Minis - nou ti annan Minis zenn. Minis Hassan ti napa 40an, i ti Minis pour Finans, in fer en zoli travay pou tir nou pei dan sa trou ki i ladan.

Nou'n annan Minis Devika, Minis Joubert. Nou'n annan bokou bann Minis zenn. Nou ti annan en *Cabinet* balanse, aköz zot bezwen leksperyans. Pa vedir aköz en dimoun i annan 65an, 70an.

Dayer ozordi nou pe fer li posib pour bann dimoun ki ariv

laz pansyon pour zot kontinyen travay. Akoz nou'n santi poudir i annan dimoun 60an, 70an ki annan sa kapasite pou kontribye dan nou pei, e dayer i annan en bann ki'n fer en zoli travay.

Minis Radegonde i enn ki'n fer en zoli travay konman Minis *Tourism*, ki ozordi - ki ozordi osi lafen sa lannen ki la nou'n pou kas rikord *arrival tourism* ki ti'n etabli anba Gouvènmman *US* an 2019. Savedir in travay byen, menm si i plis ki 65an.

Annou pa ensilte nou bann aze, nou bann dimoun 65an par la 60an ou 70an. Akoz - e pa bliye poudir nou tou ki la anndan en zour nou pou vin en dimoun aze, e fodre nou donn respe bann dimoun pli aze ki nou, Madanm Speaker.

Madanm Speaker, ler mon pe get sa Manifesto *United Seychelles*, tou sekter dan tou Minister ki ou gete ou war *AI*, *AI*, *AI*. I kler poudir en manifesto ki'n ganny *generate* dan *ChatGPT* Madanm Speaker, kot ou gete *AI*, *AI*, *AI*, *AI*.

Mon pa dir ki *AI* i pa en zouti nesaser. Mwan mon servi *AI*, mon servi *Jasper*, mon servi *Microsoft Copilot*, mon servi *Canva AI* e en kantite bann -

Mwan mon en *fan AI* e mon servi li en kantite dan

bann travay ki mon fer. *Photoshop*, *whatever*. Tou bann keksoz mon kontan. *Editing*, *video*, *audio* mon kontan servi. Be selman fodre toultan - *AI* pa toultan konsider leksperyans imen. Nou pe dir zot en keksoz, i pa pou kont leksperyans ki en dimoun in akimile *over the years*.

Menm si ou pe sey al dan *AI* pou *generate* en *CV* pour ou or pou *generate anything*, en Lartik or pou fer en *assignment*, i pa pou zanmen parey ou, ou pou ekri parey ou, ou pou mazine.

So, i enportan ki *whatever* ler ou pe fer en manifesto la, i enportan ki ou pran konsiderasyon ou leksperyans, leksperyans tou sa dimoun Sesel e bann ki'n sot 60an, bann trwazyenm-az, sa ki zenn.

Menm zanfann ennlè i enportan ki nou pran zot leksperyans zot lavi ki zot in viv *say or whatever* leksperyans ki zot in akimile *over the years*.

So, *AI* i enportan li, me selman nou pa kapab zis depan lo *AI* pour tou keksoz. Nou pa kapab tou *speech* ki nou vin fer dan Lasanble ouswa ler nou fer lo *podium*, ouswa ler nou pe *swear in whatever* nou fer, nou pe servi *AI* pou fer tou nou keksoz.

So, Dr Fanny - Dr Fanny i vin devan nou en zenn konpetan. Parey mon'n dir mon pa pou kestyonn son lentelizans. Mon konnen i en dimoun entelizan, i koz byen e nou bezwen bann zenn dan sa pei pou pran larelev.

An menm tan, nou bezwen osi annan respe e swiv bann dimoun ki'n *pave* sa semen pour nou ariv kot nou ete ozordi. Mersi Madanm Speaker.

MADAM SPEAKER

Onorab Sopha.

HON GERRY SOPHA

Bonzour Madanm Speaker. Bonzour bann koleg Onorab. Ozordi apre midi - ozordi bomaten, *in fact* nou apre midi selman nou'n komans sa legzersis bomaten, nou'n temwann ankore enn fwa en zenn profesyonnel ki *Parti United Seychelles* in prodwir ki'n vin la devan nou, pou li vin reponn kestyonn pour son nominasyon ganny aprouve.

Sa i montre nou ki *United Seychelles* i donn loportinite bann zenn pou zot vin sa ki zot anvi vini demen.

E atraver ou Madanm Speaker, Onorab Georges i annan rezon dir dan 7enm Lasanble bann dernyen 2 mwan poudir wi, zot pa pou kapab

deny ki Ladministrasyon *US* in amelyor lavi Seselwa. Mersi pou rekonnet sa Onorab Georges.

Ler Dr Fanny ti pe reponn kestyonn bomaten Madanm Speaker, Onorab pour Anse Etoile ti demann li en kestyonn lo size son afilyasyon ek parti, apre si i vin Minis ki garanti i donnen ki person pa ganny viktimize. E mon konpran konsern Onorab Romain mwan, e i fer bokou sans.

E mon kontan lot kote latab in partisip dan demann kestyonn. Onorab Sopha pa'n zanmen dir i pa kontan. Akoz sa i ed nou deba, nou demokrasi pou bouz dan en bon direksyon e dimoun laba deor zot ava trouve poudir isi anndan nou pe travay pour Lepep Seselwa.

Me mon pwen ki mon oule fer sorti se ki viktimizasyon kot lasante i pa egziste ler Prezidan Herminie in vin o pouvwar la. Sa dernyen 5an Madanm Speaker, Departman Lasante in annan bokou viktimizasyon. Mon pa konnen si Onorab Romain i konnen. Petet mon a ed li. Me si i konnen i pa'n dir, i ti foudre dir.

Mon ava met en legzanp devan. Ti annan en group *nursing assistant* ti deside form en lasosyasyon, mon mazin en annan plis ki 1an pase, anviron 2an pase, e zot ti apros mwan.

Zot konsern sete zot in ganny koup zot bann *allowances* ki zot ti gannye zot le met zot anba en *scheme*.

Zot ti apros mwan e mwan mon ti al kot sa madanm ki ansarz ladministrasyon kot Lasante. Sa madanm ti *welcome* mwan nou ti ganny en bon konversasyon.

E mwan koman en dimoun ki ti a latet en *trade union*, mon ti ankouraz sa bann dimoun mon ti al fer miting dan lofis kot nouvo *Nursing Home* i ete laba.

Nou ti ganny landrwa e nou ti form - mon ti fer zot elekte zot bann dimoun, nou ti vin en - zot ti vin en lasosyasyon. E mwan mon ti dir zot mon pa anvi annan naryen pou fer avek zot lasosyasyon.

Mon'n ed zot pou kapab organiz sa lasosyasyon. Nou'n anrezistre, zot in ganny zot sertifika kot *registration* konman en group dimoun ki legal.

I annan en dimoun ki afilye avek *LDS*, i dan *top management* kot Lasante, ki i ti fer? I ti kriy serten sa bann dimoun e remontrans zot poudir li i pe dir zot fodre zot arete avek sa zafer annan en lasosyasyon. Asistan ners in fer son Lasosyasyon *Nursing* -

bann ners i annan en lasosyasyon.

Alors, sa lasosyasyon in ganny rekonnet atraver Biro Rezistrar ki anba portfolyo Prezidan. Prezan en dimoun ki afilye avek *LDS* i viktimiz serten sa bann dimoun ki dan sa lasosyasyon. E *as I speak right now*, sa bann dimoun pa *achieve* dan sa lasosyasyon *anymore*, me selman kot Rezistrar zot in anrezistre.

Kestyon ki Onorab Sopha pe met ater pou fer Onorab Romain avek lot kote latab reflesir, eski sa i pa apel en viktimizasyon?

Dan sa ka, mon krwar Onorab Romain avek lot kote latab i merit annan kouraz ki anba ladministrasyon dirize par Prezidan Herminie ki'n prononse pou napa sa zafer ek nou pa ek nou.

E tou sa bann personnaz ki'n vin isi kestyon in ganny demande, si pou napa viktimizasyon? Zot in dir non, zot pou fer sir zot pou travay pour tou dimoun. Savedir sa bann dimoun in pronons sa ofisyelman. Eski sa i pa en siny lespwar?

Madanm Speaker, mon pou kontinyen avek sa bann fraz swivan; Prezidan Herminie in pres lo linite nasyonal. Linite nasyonal otomatikman ler nou

pa pe fer viktimizasyon napa ek nou pa ek nou, nou pou bezwen al dan sa direksyon, menm i a pran en pe letan.

Tousala i bann parol ki Lepep Seselwa in antann e i donn nou lespwar. Si sa bann parol i donn nou lespwar, Prezidan Herminie i annan en rezon. Set aköz i anvi delivre pour popilasyon Seselwa an antye san ekskli okenn Seselwa.

Aküz mon konsyan, nou lo sa kote latab nou konsyan, ki 2030 Prezidan Herminie ouswa dimoun ki al siksèd li pa pou anvi al devan laport dimoun pou dir; les mwan vin ou boy, les mwan vin ou nennenn. Mersi Madanm Speaker.

MADAM SPEAKER

Onorab Arissol.

HON SANDY ARISSOL

Mersi Madanm Speaker. Bonn apre midi tou dimoun ki a lekout.

Mon anvi fer ankor parey mon ti fer taler pour Mr David Pierre, pour mwan koz par deryer Mr Fanny, parey mon ti fer taler. Mon pa ti anvi demann li kestyon, aköz sa i mon swa e personn pa pou dir mon dan Lasanble Nasyonal ki mannyer mon fer mon travay.

Mon anvi premyerman rekonnet Madanm Speaker, poudir Mr Fanny i en Seselwa, i en profesyonnèl e i en dimoun ki'n fer en travay pour Sesel.

Dapre son CV letan ou'n gete ou vwar poudir i en dimoun ki, lafason ki in reponn son kestyon in kalm dan son repons, in adres bann size neseser, bann kestyon ki'n ganny demande.

E ozordi i pe ganny rekonpanse avek son parti pou pran pozisyon Minis Lasante, ki dapre zot i devret sa portfolyo. E i en vre US, i pa en zwer rol.

I en vre US, alor son parti pe rekonpans li an relasyon avek son travay ki in fer. Me pa enn ki'n zwe rol, ki'n met plizyer triko e apre ou war li vin isi devan, i pe rod laglwar e pe sey eksplik nou ki mannyer Sesel pou vin pli meyer letan li i vin Minis.

Mr Fanny parey tou bann lezot dimoun ki dir in konn li, mwan pa neseserman mon'n konn li vreman Madanm Speaker.

Me selman letan mon'n ekout son bann entervansyon e letan mon pe get son CV, parey mon'n dir i en Seselwa. En Seselwa. En zenn, deplis i en papa. E mon kontan i pa'n koz lo bann size kekfw ki pa pou neseserman kontroversyel, be

in sey son mye pour li reponn kestyon.

Me si zot santi poudir Dr Fanny li osi koman en zonm ki an son defi. Parey mon mazine tou zonm i annan en defi. Konman en profesyonnel i annan son defi.

Si letan in dan sa profesyon in annan paran kekfwa ki'n perdi zot zanfan anba son *watch*, i annan *malpractice* dan en fason, i annan keksoz ki'n fer, sa i ava ariv ek mwan demen konman en drayver mon osi mon fer aksidan.

E mon swete ki si li ki vin Minister Lasante tou bann leokri ki nou'n tandé i ava amelyore. Parey la nou fek tandé poudir i annan viktimizasyon kot Lopital Sesel, nou swete letan Dr Fanny i ava vin Minis Lasante bann viktimizasyon i ava arete. Tou bann lasosyasyon ki anvi ganny formen, ki pour ners, ki pou asistan, ki pour lezot, zot a ganny posibilite pou zot form zot lasosyasyon dan trankilite san personn pe takin zot, parey nou'n tandé.

Si Dr Fanny i vin Minis Lasante mon ava swete, an vi ki mon annan - mon osi mon annan fanmir, mon annan zanmi La Digue ki zot lanbilans

pa bezwen sorti Mahe letan zot telefonnen pou ariv La Digue.

Me zot servis i ava efikas, i ava la pour ki pasyan La Digue pa ava mor, parey nou tou nou pa kontan nou pasyan i mor. Letan nou *call* lanbilans e lanbilans i ganny serten retar. Pa aköz zot anvi ganny retar, me parfwa sa retar i arive swa aköz zot dan laliny trafik, oubyen kekfwa aköz zot pe asiste en lot dimoun. Me sa retar i arive e zot ki ganny blanmen.

Mon swete ki bann pasyan kanser zot ava ganny zot latizann en pe pli an avan parey mon tann pe dir. Mon swete ki bann gran laliny ki nou'n toultan koz lo la dan Lasanble Nasyonal, me selman letan nou'n al lo bato Zapon napa konplent, sa bann laliny i ava redwir.

Nou swete ki anba Dr Fanny, anba nouvo ladministrasyon, tou bann dimoun ki rod apwentman pou al kot spesyalis ki esper 3mwan, 6mwan, 1an, sa osi i ava redwir la. E tou bann rezilta ki nou gannyen atraver *AI* i ava al en pti pe pli vit, parey Dr Fanny in fer nou konpran, i ava en pe pli vit.

E nou, nou ava kapab ganny sa bann rezilta pour nou osi kapab pas lo la pour nou get

ki manner nou sityasyon i ete, ki gravite nou ladan pour nou kapab annan en dezyenm lopinyon.

Si sa Madanm Speaker ki zot santi poudir *US Dr Fanny* i devret vin Minis Lasante, sa i ava zot swa, be selman an menm tan parey bann konplent in annan, nou ava swete ki la anba nouvo ladministrasyon sa bann konplent, sa bann mirmirasyon ki nou bann Seselwa ti annan i ava minimize, i ava redwir e nou tou nou ava ganny le nesesser Servis Lasante ki nou tou nou pe rode avek bann profesyonnel Lasante. Mersi bokou Madanm Speaker.

MADAM SPEAKER

Nou ava pran 2 entervenans avan Onorab Lemiel i fer konklizyon. Onorab Aglae e apre Onorab Loze.

HON EGBERT AGLAE

Mersi Madanm Speaker. Madanm Speaker, mon pa annan lentansyon long vi ki nou pe zwe ek serten letan. Me selman sa ki mon anvi dir lo Dr Fanny ki'n vin la devan nou.

Dr Fanny i enn mon kolek lekol ki mon ti zwenn li *NYS*, apre Politeknik. In en dimoun ki mon'n konn li vre i fer *sport* byen, me in touzour sa dimoun

ki'n serye e disiplin. E si ozordi in ariv la kot in arive, se akòz sa kalite konman en zonn in posede.

Dan parkour lasante ki mon'n konn Dr Fanny, ki mon osi mon'n pas atraver sa Sistenn Lasante, in en dimoun ki'n progres e in touzour pare pou donn nide ki manner pou amelyore.

Akòz tou kou nou dir i annan en zenerasyon ki letan i arive son moman letan, akòz marmay 80 parey nou dir nou annan en zenerasyon kot bann lavansman teknoloji ti pe komanse.

E letan nou - serten Manm in koz lo manifesto lo size *AI*, nou bezwen konpran ki kalite *AI* ki ale ek medikal, ki kalite *AI* ki ale dan domenn dan lakominote, dan nou lavi toulezour.

Dan nou konteks medikal *AI* i pou ed nou fer desizyon pli vit e pli *accurate*. I pa pou vin ranplas sa dokter, i pa pou kapab ranplas sa ners akòz i annan sa laspe *care and nursing* ki egziste ki *AI* pa kapab fer sa *ok*, mentenans en lopital, tou sa bann keksoz.

So, lenvestisman an partikilye parey bokou pei ki plizyer zot ki'n al fer bann *checkup* aletranze zot in war modernizasyon dan bann

lekipman medikal ki nivo i arive. E akòz osi ki parfwà i annan bann diferan tes ki pa kapab ganny fer Sesel akòz nou napa sa bann teknoloji ase avanse.

So, sa i en konteks ki Gouvernman US pe al met lanfaz lenvestisman ladan, pou osi ede ki i ava annan bann diferan servis *diagnosis* ki kapab ganny fer Sesel, *ok*.

Size nouvo lopital ki'n ganny nonmen. Wi a lavenir nou pou bezwen annan nouvo lopital. Akòz tou lenfrastriktir si ou'n fer li ozordi, ler pou ariv 25an i pou ganny - i annan son degradasyon striktirel ki vin avek, baze lo sa moman letan kalite materyo ki'n ganny servi, ou pou bezwen refer serten bann konponan elektrik al tousala.

I pou annan son letan ki nou pou bezwen en nouvo Lopital Sesel, me annatandan ki nou pe *raise the funds*. Wi, nou bezwen rod larzan avek nou bann partner parey nou'n fer plizyer bilding.

Sa Lasanble ki nou ladan la ozordi, ti en Lasanble ki'n ganny konstrir avek donasyon, finansman bilateral ki nou'n annan avek nou partner Lasin, Lakour. I annan diferan bilding ki'n ganny finanse par koumsa.

So, napa naryen mal ouswa ekstraordiner ouswa mal ki pe ganny arive letan sa pe ganny fer. So nou pou bezwen annan. Me annatandan sa ki nou annan, nou bezwen regarde ki mannyer nou amelyore. Sa ki enportan. Amelyore, fer li vin pli modern.

E i annan en keksoz ki parfwà nou bliye, se letan nou pe regard servis esansyel, lopital Sistèm Lasante i tonm dan sa kad. I pa parey bann lezot *Public Service Sector* ki 8er/4er.

E en pei i osi ganny mezire lo zerans son bann servis esansyel ki i annan. Parey nou dir, en pei i ganny mezire lafason ki i tret son dimoun aze.

Be en pei osi i annan bann lendeks ki ganny mezire baze lo ki mannyer ou tret ou servis esansyel. Lopital i enn li. E lanfaz i bezwen ganny mete e resours lo –

Mon pa pe koz ou zis lopital la. Mon pe koz ou lo lapolis, *SFRSA*, bann lezot servis ki travay 24 erdtan ki esansyel pour en pei fonksyonnen an ka i annan okenn evantyalite.

So, lanfaz i bezwen ganny mete lo resours pou regard son bann **sta* travayer. Tou travayer la pe koze. Mon pa anvi

single out anyone. Tou travayer, ok.

Lenvestisman lenfrastriktir i enportan. Lavansman teknolozi pour sa bann sekter i enportan pou kapab fer keksoz bouz pli devan. E an menm tan letan ou avanse, ou minimiz kantite letan ki ou fer pou fer en keksoz.

Si ti pou pran ou 2 zour ou kapab fer li dan 1 zour. Ouswa si ti pou pran ou 5 erdtan, i kapab fer li 1erdtan. Se sa ki apel progresyon.

So, Madanm Speaker en dokter in *swear* pou li sov lavi, sa ki nou pou met dan dokter pou li kapab delivre si Prezidan i met li koman Minister Lasante, i pou annan en travay ase enorm devan li.

Minister Lasante i annan en kiltir *mindset* ki i egziste ki ler mwan ti la i ankor egziste, ki i bezwen ganny adrese e dokter in koz lo la, lo progresyon bann diferan kad. Fodre pa per pour nou donn dimoun loportinite. Fodre pa per pou krwar poudir mwan mon'n la plis ki 15an, 10an. Sa enn ki pe monte, si mon donn li loportinite i pou vin pran mon plas. Non, nou bezwen annan nou en *pool of trained people* pou pa travay pour sa pei.

E nou osi petet letan nou'n donn loportinite, nou ava ganny en *pool of* travayer ki petet i annan serten pei parey zot ti pran nou bann ners dan bann lannen 2000 ki ti al Langleter, aköz nou ti annan *trained, very good, trained nurses* ki eparpiye partou dan Lerop ozordi, Seselwa.

Be nou kapab *train* nou bann domenn travayer medikal dan sa menm laliny ki nou osi nou a kapab eksport our - nou bann talan ki nou, nou annan. I ava en reveni pour Sesel osi.

So, avek sa mon napa problemanm avek lev mon lanmen pou siport Dr Fanny, aköz mon konnen i annan sa bagaz, i kapab fer li.

Sel keksoz ki i reste dapre nou manifesto se vin travay pour sa pep, ekout sa pep parey dan tou departman tou Minis ki pou vini, annan en konversasyon pa asiz dan lofis.

Ou al dan lopital, ou bezwen marse. Parey mon'n al dan serten lopital aletranze sa ki ansarz i pran en letan granmaten i get tou son pasyan.

Be sa fodre nou - en keksoz ki fodre, en kiltir ki bezwen ganny adopte pou konnen kwa ki pe pase dan ou zalantour anba ou responsabilite. Mersi.

MADAM SPEAKER

Onorab Loze.

HON JOHAN LOZE

Mersi Madanm Speaker. Madanm Speaker, mon pou komans par koz en pe lo nou Lasanble Nasyonal.

Ti ariv en lensidan dan nou Lasanble kot *ASP* ti vini en zour bomaten avek zot Minis e zot ti fer deklarasyon konmkwa ki i reste zis 115 dimoun dan sa popilasyon Sesel an antye ki pe resevwar lasistans sosyal.

Sa deklarasyon ti ganny fer an repons en kestyon ki ti ganny avanse par Onorab Wallace Cosgrow.

En pei plis ki 70 dimoun e Gouvernman *LDS* ti'n tres nou lapo lagel *jusqu'au point* ki ti annan zis 115 dimoun ki ti pe resevwar lasistans sosyal.

Prezan mwan Madanm Speaker, son apre midi mon sit sa zafer, mon repete parey en bon kato *Nosy Be* mon osi. Mon dir be lala in arive, i annan zis sa 115 dimoun eksetera.

Msye, Senyer. Arh, vomye mon pa ti'n dir naryen. Ozordi nou annan en Speaker ki pa melanz dan deba. Be nou pa'n toultan annan en Speaker ki pa melanz dan deba. Be sa msye ti pran mwan menaz we.

Sa msye i dir mwan non, 4mil. *The Minister* in dir 4mil.

Anyway, annou koup sa kourt, *résultats des courses* mon ti ganny met deor.

So Madanm Speaker, letan nou felisit ou, nou dir ki ou pe fer en bon travay, apre nou kalifye ou bon travay an di-z-an ki ou bon travay i aköz li *Leader* Lopozisyon i en lanz. Son *Caucus* i bann sen. Zot pa pe lager avek ou.

Non Madanm Speaker, ou pe fer en bon travay ou. Ou pa pe melanz dan deba, ou pa pe enterfer, ou pa pe viktimiz Manm. Aköz i annan nou ki'n ganny viktimize la anndan. I annan nou ki konn nou douler nou'n ganny viktimize anba zot Speaker. Alors, annou pa denigre travay ki Madanm Speaker pe fer.

Bon, Madanm Speaker, mon pou al en pti moman lo bann zafer *Cabinet* Minis la. Mon pa konnen si Lepep Seselwa i konn en sanson ki apel "*Tribute to Albert Rene*". I annan en sanson i apel "*Tribute to Albert Rene*". Sa sanson mon krwar i dir "Albert Rene, Albert Rene, ou menm nou gid ek nou sipor". Mmm, *ya*.

Madanm Speaker, sa sanson la, ti ganny ekrir par en dimoun ki'n asiz lo *Cabinet* Minis, Prezidan John, Charles Ramkalawan, Wavel. Dimoun ki'n ekrir sa sanson "*Tribute to*

Albert Rene” i en *outgoing Minister*.

So, ozordi nou rode ki triko? Lekel ki'n met konbyen triko? Nou pe kont triko, nou pe kont *undershirt* lo dimoun. Konbyen triko politik dimoun in mete.

Ou konnen Madanm Speaker, mwan ki mon admire se ki ler sa dimoun ki'n ekrir “*Tribute to Albert Rene*”, bann ki partisip dan Koudeta, bann ki'n maltret zot prop Prezidan lo *Facebook* i antre dan zot parti Sesel Pour Tou Son Zanafan.

Ozordi, ler bann lezot dimoun pe *join United Seychelles*, tret zida. Apre ki zot dir? Lo *Facebook* ki'n dir zida. Mmm, *Facebook* en? Petet *Facebook* i apel Vizyon, aköz mwan mon pa rapel sa komans lo *Facebook* mon. *Years is, years is back* mon rapel li komans dan Vizyon. Zot dir zot zafer, zot envant zot zistwar, zot alors en zour, prezan ozordi zot larg **square* li lo *Facebook*.

Be Madanm Speaker, ou vwar lontan isi anndan, ou pa ti nonmen *Facebook*. Ou pa ti nonmen *Gazet* sorti an deor. *Standing Orders* ti sorti deswit la, ti pou dir ou ki *Order* ki Lord. Manman, be ou ti pou sadap, sadap taler ou. Ou pa ti pou nonm *Facebook* ankor zanmen.

Ozordi ki nou vwar? Bann Bondye *Standing Orders*. Tou sa ki zot annan pou dir la zot larg lo *Facebook, Social Media. Social Media* ou pa ti nonmen isi la anndan lontan. *Orders* ti pou sorti taler, lord ti pou ganny mete ek ou.

Sizyenm Lasanble, en zour Onorab Charles De Commarmond i lev en *People Plus* anler. Manman, msye. Onorab Ramkalawan i sot anler deswit, ou napa en drwa entrodwir *media* sorti deor dan deba Lasanble. Nonm en seri lord ek *orders*. Ozordi, tou *media social, unsociable, anti-social media*, tou *media* i form labaz zot deba, aköz?

Blansisaz rimer Madanm Speaker. Blansisaz rimer ki zot menm zot kree, zot fer zot prop lenvansyon, zot envant zot gonaz, zot alors en zour. Zot fer zot dalon met lo *Facebook*, ouswa zot mete zot menm, apre zot vini zot dir; ou war lo *Facebook* ki dir. Zot prop siporter ki dir.

Wi, nou prop siporter i apel *Anonymous* nou. Arwi, lo son kart manm i ekrir *Anonymous*. Zot. Zot ki pe fer Madanm Speaker. Zot, zot bann lenvansyon.

Madanm Speaker, mon kontan ki Onorab Arissol dan son pti prezantasyon ki i fek fer

in asize in lir en litani defo son prop Gouvernman. E i ti pe sey reponn Onorab Sopha, mon konpran li.

Be selman tou sa legzanp ki in site la, si nou pou ale nou pou ekout li, tousala enn par enn in nonm fot e defo ki ti egziste dan son Gouvernman ki ti *lead* pour sa nespes rayot ki ti arive la ler bato Sinwan ti vini.

Seselwa an gran parti ti sorti pou al rod led ed sekour pour zot lasante. En keksoz ki pa ti'n zanmen arive avan, parske sa bato Sinwan pa fer premye fwa i vin Sesel sa. In deza vini avan li. Pa'n zanmen annan sa nespes kalite laliny la, sa rayot. *Anyway.*

Madanm Speaker, mon'n tann en zafer desizyon baze lo lonterm aköz Onorab - *I mean, the nominated member for the post of Minister* in dir Lopital La Digue i tro gro, ki vre i tro gro. Be si zot in ganny dir ki i bezwen annan en vizyon lonterm, akomod popilasyon, mon kontan mwan.

Mwan ler zot fer bann largiman koumsa mon kontan ki ou bezwen an en vizyon lonterm pou akomod popilasyon ki pe grandi, i eksplik nou aköz nou dan bann sityasyon ki nou ete ozordi ki nou'n ariv koumsa dan sa dernyen 5an.

Madanm Speaker al get dan verbatim. Premye *State of the Nation Address* ki ti fer Sesel anba Trwazyenm Repiblik. Premye.

Onorab Ramkalawan i dir koumsa; "Sa Stad Linite en *waste of money*, i tro gro!" In servi en fwa, i pa pou sorti ankor zanmen. Mon ti war li pe asize anba la zour inogirasyon. Ti plen. Ti plen.

Selman i ti dir en gaspiyaz larzan, zanmen i pou servi ankor! In servi en fwa i pa pou servi ankor. In servi pour Zwe De Zil.

So, mon kontan ki Onorab in fer sa largiman e ou bezwen annan en plan lonterm e ki li in fer en largiman ki i pa pou siport kandidatir Dr Fanny aköz Dr Fanny in dir sa. Be ou vwar par son prop largiman aköz nou pa ti'n devret zanmen vot pour Prezidan Ramkalawan? En dimoun ki'n kapab pa posed en vizyon lonterm. Vwala. La, la rezon zot laba e la, la rezon sa pei in dan problem ki nou'n arive ladan ozordi.

Madanm Speaker, i annan en keksoz selman mon vwar pe evolve. *Leader* Lopozisyon in deklar serten lafreyer konsernen *AI*. I per *AI*. In dir i annan serten lafreyer. So, mon prezimen *LDS* zot per *AI*. An

menm enstan, 2 Manm lo kote *LDS* zot pa oule *repeal* Lalwa kont *witchcraft*.

So, pour ou annan en Lalwa kont *witchcraft*, i vedir *witchcraft* i egziste. So zot per *AI* e zot krwar dan *witchcraft*, dan sa 2025 la, 2025, dan Lasanble Nasyonal Sesel en parti politik ki'n ganny elekte pou reprezant sa pep pe les lazenes Seselwa konpran ki zot per *AI* e zot krwar dan *witchcraft*.

Mon santi mon en pti pe konsernen, be selman i pa en keksoz ki mon anvi fouy ladan, *rather* mon a poz 2 kestyon.

Enn, ki mannyer eski ou prouv *witchcraft*? Akoz atraver listwar *witchcraft* in ganny prouve par fo lakizasyon, in ganny prouve swadizan par bann siny demonik lo ou lekor, in ganny prouve par bann laparisyon astral otour ou lekor. E napa enn sa bann keksoz ki kapab ganny mezire syantifikman sa.

Bon, ti annan en lot fason ki *Spanish inquisition* ti servi pou prouv *witchcraft*. I ti pran sa *witch* i ti anmar dan en sak ouswa met dan en barik, balans dan en larivyer. Si i noye, i inosan. Si i *survive* i en *witch*, alors ou bril li. E atraver listwar rezon mon pe al lo sa size mwan akoz mon konnen i annan nou,

nou inyoran nou pa konnen ki nou koz lo la.

Atraver listwar *witchcraft* in ganny servi pour persekisyon bann madanm, zanmen zonm. *Throughout human history witchcraft* sa lakizasyon i en *stain on the soul of humanity* akoz in ganny servi pou persekit bann madanm.

I ti zonm pe fer lakizasyon kont fanm pou fer zot ganny brile. E ozordi dan nou linyorans nou Sesel nou le gard en keksoz koumsa, en keksoz *shameful* lo nou *Livre de Loi*, me selman nou per *AI*. Mon a les sa ale Madanm Speaker. Mon a plito koz en pti pe lo *AI*.

Mon konpran zot pa konpran, i annan serten dimoun in sey eksplike, be mon a sey pran en pe leksplikasyon kot Onorab Aglae in kite. E mwan mon parey ek zot ki pe defann Lalwa kont *witchcraft* mon pou vin avek keksoz ki faktyel.

Mr Speaker- Madanm Speaker, an 2013, nou 2025 la. An 2013 en lakonpannyen an Zapon, en de nonmen *BrainCo*, i dirize par en enzenyer apele *Hisashi Kambe* ti vin avek en *AI* apele *BakeryScan*.

Sa *AI* son fonksyon sete pou servi konman en *check out counter* dan bann *bakery shops* ki napa - ki pa pe vann

konfeksyonnri dan bwat avek *bar code* lo la, akòz zot *check out* ti dousman, e li i ti *scan* i ti nobou trouv bann diferan konfeksyonnri ki pe ganny vann e sarz son pri otomatikman. Sa ti an 2013 e nou pe koz en *AI* apele *BakeryScan* ki ti fer pou *scan baked goods*.

An 2017 en syantis kot *Louis Pasteur Center for Medical Disease Kyoto*, i ti rekonnet potansyel sa *AI* e sa lakonpannyen *BrainCo* ti fer en lot versyon sa *AI* apele *Cyto-AiSCAN*. Son fonksyon sete pou *review human cancer cells*. *Scan human cancer cells, sorry - e submit for human review*.

As we stand la ozordi 2025, *Cyto-AiSCAN* i pe ganny servi dan bann lopital an Zapon. I annan li en *99 percent accuracy* pou idantifye selil kanser dan imen.

Now, annou eksplike kwa ki i fer. Wi i *scan*, wi i detekte e i *submit for human review*. I *scan* vit li. I *scan* 10 fwa pli vit ki si ou ti pou fer en imen fer sa *scan*, fer son *review* li menm.

AI i *scan*, i donn sa teknisyen imen e zot bokou, bokou pli efikas atraver lilizasyon *AI*. So, *AI* dan medsin ki nou sitan per, *AI* dan medsin i ogmant lefikasite bann profesyonnèl medikal imen. I en zouti parey tou lezot zouti anba

kontrol imen, be i ogmant lefikasite imen.

E mon krwar sa en bon keksoz pour nou pei. I en direksyon ki nou devret pe al ladan konman en pei. Non pa pe retourn pou dir gard Lalwa kont *witchcraft* ki nou servi pou viktimiz nou oponan politik, pou sali son non e son repitasyon, apre *case* i disparet dan vid. Mersi Madanm Speaker.

MADAM SPEAKER

Onorab Lemiel.

HON SYLVANNE LEMIEL

Bonn apre midi Madanm Speaker. Tou koleg Manm, mersi. Mersi pour tou bann ki'n entervenir dan *interview* Dr Fanny.

Mon krwar mazorite zot in kapab demann tou zot kestyon e Dr Fanny in reponn sa bann kestyon tre byen, in eklersi tou zot bann dout or zot bann kestyon ki zot annan.

Madanm Speaker, bokou in ganny dir la e nou pa pou trenn sa sesyon pli lontan *because of time constraints*. Me selman devan nou nou'n vwar poudir Dr Fanny i en zonm ki tre talante, i en zonm ki pou kapab anmenn transformasyon dan Gouvernman si i vin en Minis dan *Cabinet*.

E mwan mon pou demann tou bann Manm pou zot donn zot sipor Dr Fanny par aprouv li pou li vin en Minis dan *Cabinet of Ministers*.

Avan mon terminen, mon ti a kontan eklersi atraver ou Madanm Speaker, Onorab Wavel Woodcock. Onorab Woodcock mwan mon en dimoun ki pa'n zanmen mank respe pour okenn trwazyenm az. Mon pou poz sa koumsa mwan. Mon pa'n zanmen mank respe pour okenn trwazyenm az.

Madanm Speaker, mon'n fer referans taler ler mon'n koze a bann Minis retrete wi, ki zot menm lo zot kote zot in toultan - aköz zot pe - mannyer zot pe fer.

Zot pe get sa ki nou, nou pe fer la ek sa ki zot, zot ti fer. Sa ti en konparezon ki mon ti pe fer, me ti napa naryen dan mank respe pour okenn trwazyenm az. Aköz sa ki mon'n dir la, i ti laverite li, *ok*.

So Madanm Speaker, an terminan, ankor enn fwa mon ti a voudre demann tou Manm pour nou met lanmen ansanm pour nou kapab aprouv nominasyon Dr Fanny dan *post* konman Minis. Mersi.

MADAM SPEAKER

Mersi Onorab Lemiel. Nou ava prezan pran vot lo Mosyon ki; - *In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Dr. Marvin Nolan FANNY to the office of the Minister.*

Tou Manm ki vot pour Mosyon? Bann ki vot kont Mosyon? Nou annan nou bann *abstention*. Set alors ki Mosyon in ganny aprouve avek 17 vot pour, avek 13 ki pa'n vote.

Avan nou pran nou *break*, zis pour mwan fer zot konnen ki ABC pou zwenn vitman ler edmi e nou ava repran nou sesyon 2er edmi.

(BREAK)

MADAM SPEAKER

Bonn apre midi tou Manm. Byenveni pour dezyenm parti - *well* trwazyenm parti nou lazournen. Mon ava demann Onorab Lemiel pou prezant son lot Mosyon.

HON SYLVANNE LEMIEL

Mersi Madanm Speaker. Bonn apre midi Madanm Speaker e tou koleg Manm Onorab, tou dimoun a lekout. Setyenm Mosyon i al konm swivan; -

In accordance with Articles 63(1) and 69(2) of the

Constitution, this Assembly approves the proposed appointment by the President of the Republic of Mr. Wallace Jude Keith COSGROW to the office of Minister. Thank you.

MADAM SPEAKER

Mosyon a ganny segonde.
Onorab Gill?

HON CHURCHILL GILL

Mosyon i ganny segonde. Mersi.

MADAM SPEAKER

Mersi. Mon ava demann Sekretarya pou fer Mr Cosgrow antre e nou ava aprezan al dan *Committee Stage*.

Bonn apre midi Mr Cosgrow. Mon ava demann ou pou fer en prezantasyon pour bann Manm.

MR WALLACE COSGROW

Bonn apre midi Madanm Chair. Bonn apre midi Madanm *Leader* Zafer Gouvernman dan Lasanble Nasyonal, Onorab Sylvanne Lemiel. Bonn apre midi Onorab Bernard Georges, *Leader* Lopoziyon dan Lasanble Nasyonal, tou Manm Lasanble Nasyonal, tou Seselwa ki pe ekout nou ki pe swiv nou lo televizyon, en bonn apre midi.

Dabor Madanm Chair, mon ti ava kontan - mon

konnen ou'n ganny bokou felisitasyon. Mon ti a kontan felisit ou lo ou lapwentman konman Speaker Lasanble Nasyonal.

En premye pour Sesel, en madanm, en zenn madanm eleksyon konman Speaker Lasanble Nasyonal. En zenn madanm, en premye pour Sesel. En madanm for e dinamik ki mon asire ou pou anmenn Lasanble Nasyonal lo en lot letap e en lot nivo.

Mon ti a egalman kontan felisit Onorab Lemiel osi pour son eleksyon konman *Leader* Zafer Gouvernman dan Lasanble Nasyonal e Onorab Bernard Georges konman *Leader* Lopoziyon dan Lasanble Nasyonal. E tou bann lezot Manm ki'n ganny elekte, bann nouvo Manm Elekte osi bann Manm ki'n vin lo en baz eleksyon proporsyonnel.

Avek sa Madanm Chair, mon pou al en pti pe lo mwan menm, en pti lentrodiksyon. Parey bokou zot konnen- parey bokou zot, zot konnen mon apel Wallace, Jude, Keith Cosgrow. Mon annan *almost* 47an - 46an e mon annan 2 zanfan. Mon'n marye mon annan 2 zanfan. Mon madanm, mon 2 zanfan.

E mon'n en Manm sa Lasanble Nasyonal pour 4an. Annefe mon ti sorti Lasanble

Nasyonal lannen pase Desanm. Mon parkour dan Lasanble Nasyonal in enn ki tre eksitan e tre remarkab mon kapab dir e i enn ki mon'n vremen, vremen apresye Madanm Chair, in donn mwan en kantite loportinite pour mwan aprann en kantite keksoz. Sirtou travay Lasanble Nasyonal.

Me avan sa Madanm Chair, mon ti osi okip Lofis Minis anba 2 ladministrasyon. Ladministrasyon Prezidan Faure e osi Ladministrasyon Prezidan Michel. Mon'n okip plizyer portfolyo pandan sa bann letan, pres 5an, 8 mwan pou *être* egzakt.

Mon'n dan portfolyo lapes ek lagrikiltir, mon'n dan portfolyo lanplwa, lantreprenarya e linovasyon biznes. Mon'n dan portfolyo Lendistri, Lenvestisman e Linovasyon Biznes e mon'n osi dan portfolyo Minister Lanvironnman, Lenerzi e Sanzman Klima.

Pandan sa bann letan mon'n - parey Lasanble Nasyonal, mon'n osi aprann en kantite dan sa bann diferan portfolyo, mon'n aprann en kantite. Mon ti ganny apwente ase zenn konman en Minis. 35an mon ti annan.

Mon'n anmas en kantite leksperyans pandan sa bann

letan e mon krwar mon parkour dan sa bann diferan portfolyo in permet mwan anmas en kantite leksperyans e annan en kantite abilite pour mwan kapab ariv kot mon ete ozordi e pour mwan kapab delivre bokou plis dan sa travay ki Prezidan Herminie i pe met devan mwan.

Mon remersye li e tou bann dimoun ki'n krwar dan mon pou ariv kot mon ete ozordi. E mon promet zot ki poudir mon pa pou dezapwent zot e mon pou fer tou mon mye pour mwan kapab desarz mon responsabilite si mon ganny aprouve konman Minis ozordi avek tou liminite, avek tou mon kouraz, tou viger. E fer sir ki mon travay byensir pour Sesel e pour pep Seselwa.

Apard sa Madanm Chair, mon'n osi en dimoun ki'n pas preski tou mon lavi travay dan servis piblik. Mon'n dan diferan Minister, dan diferan kapasite. Mon'n komans tre ba, tre zenn dan Minister Lanplwa, kot apre mon'n monte mon'n al dan Minister Lagrikiltir dan Lazans Lagrikiltir.

Mon'n travay ankor dan Minister Lanplwa. Mon'n travay Lazans Proteksyon Sosyal. Mon'n osi travay pou en kourt dele letan *President's Office* dan *Cabinet Office*.

So, tousala in bann lenstans kot in ede *shape* en pti pe mon karyer profesyonnel e *shape* en pe mon lavi e ki mannyer mon *operate* konman en travayer, konman en profesyonnel.

Mon'n *take up* pozisyon politik an 2015 konman Minis, e mon karyer en pti pe dan politik in anmenn mwan ziske *up to* Sekreter Zeneral Parti *United Seychelles* ki mon ankor ete ozordi. In annan bokou, bokou *achievements* pandan sa bann letan. Bokou *achievements* sirtou avek Parti *United Seychelles*.

E mon - parey mon'n dir boner, mon *grateful* pour tou bann loportinite ki mon'n gannyen e mon bi se avek tou liminite delivre mon travay, *duties* ki ganny met devan mwan byen, avek tou kapasite, abilite ki mon annan pou delivre ankor pour pep Seselwa e Sesel.

Avek sa Madanm Chair, mon a termin lanmenm e mon a pran bann kestyon bann Manm silvouple. Mersi.

MADAM SPEAKER

Nou ava konmans bann kestyon. Onorab Woodcock.

HON WAVEL WOODCOCK

Mersi Madanm Speaker. Mr Cosgrow, i *obvious* ki an vi ki US ki annan mazorite dan Lasanble ki definitivman ou pou ganny zot *endorsement* pour ou vin Minis, mon pa bezwen dir 'si'.

So, mon kestyon pour ou. As en Minis dan *Cabinet* - ou'n deza en Minis dan *previous Cabinet*, Parti Lepep/*United Seychelles*.

E dan *Cabinet of Ministers* i annan bann desizyon ki zot pran e parfwa i annan serten promes ki en *Cabinet* i pran. Zisteman mon vin lo sa ka kot zot ti deside *forgo* zot larzan gratwite pou solider avek Lepep Seselwa.

E deza sa nouvo ladministrasyon ki'n antre avek Mr Herminie, Prezidan Herminie *at the helm*, zot in fer en kantite promes 100 zour avek Lepep Seselwa.

E an vi ki dan lepase zot in deza fer bann promes pou solider avek Lepep Seselwa, ki apre zot ti sanz zot - zot ti pe sey fer li an sekre pou pas par laport deryer e zot ti repran sa larzan *forgo*.

Eski la, an vi ki ou pe retourn dan *Cabinet* eski okenn bann desizyon ki zot pou pran, okenn promes ki zot fer, bann desizyon *Cabinet* ki piblik kot tou Seselwa i war, eski zot pou

gard bann promes ki zot pou fer konman *Cabinet of Ministers* e ou konman en Manm *Cabinet*? Mersi.

MR WALLACE COSGROW

Mersi Onorab pour ou kestyon. Onorab, mon ti antisipe sa kestyon pou vini, e sirtou sorti kot ou.

Me mon krwar pandan 4an dan Lasanble Nasyonal, mon'n eksplik sa zafer term larzan *forgo*. Mon pa pou antre dan larzan *forgo*. Mon'n deza eksplike e in deza ganny eksplike ki *Attorney Zeneral* ti donn son *blessing* lo sa peyman. Me selman mon pou al lo ou kestyon lo sa zafer si nou pou gard nou bann promes.

Ou'n fer referans avek promes 100 zour ki Prezidan Herminie in fer avek pep Seselwa. Annefe nou apel li en - ou'n term li koman en '*social contract to the people of Seychelles*'.

Ladan i annan bann pwen ki ganny *outlined*, par egzanp kou lavi, par egzanp lasante, par egzanp an sa ki konsern laliberte. Laliberte lekspresyon, laliberte an spesifik sa ki konsern bann lamannman Konstitisyon ki'n ganny fer. I annan detrwa bann promes ki'n ganny fer pour Seselwa.

Annefe, mon privilezye mon'n form parti group ki pe diskrit ozordi lo sa bann promes. I malere ki pandan sa- apre eleksyon nou'n annan sa tranzisyon letan, tranzisyon ki petet i pa'n *allow* nou pou nou kapab fer bann keksoz ariv en pe pli vit.

Me mon kapab garanti ou ki mon dan en group ki ozordi an mezir nou pe koze la, nou pe travay lo bann diferan plan lenplimantasyon pour ki nou kapab konplet nou plan 100 zour dan 100 zour e fer sir ki nou promes ki nou'n fer avek Lepep Seselwa i ganny realize.

Par egzanp, i annan serten Lalwa ki pou bezwen vin devan Lasanble Nasyonal pou kapab fer sir ki sa promes 100 zour i ganny realize. E *once* ki Lasanble Nasyonal i fini avek bann deroulman Minis ek bann lezot deroulman, mon asire ki Lasanble pou komans table bann Lalwa devan zot, bann sanzman ki pou bezwen vini pou kapab fer sir ki nou onor nou promes.

Nou dan biznes onor promes Onorab, e mon garanti ki mwan konman en Minis si mon ganny aprouve ozordi, avek bann lezot kole, nou pou travay *collective responsibility* pour nou kapab fer sir ki sa bann promes i ganny *achieve*.

E dayer i pa zis bann promes 100 zour lo nou program 100 zour. I bann promes ki nou'n fer pandan 4an, 4an devan laport Seselwa, 4an devan laport dimoun tou le Sanmdi, tou le Sanmdi.

Tou le Sanmdi *blitz* devan laport dimoun, nou'n fer en kantite promes e nou annan lentansyon delivre lo tou sa bann promes ki nou kapab. Mersi bokou Madanm Chairman.

MADAM SPEAKER

Onorab Toussaint.

HON JEAN TOUSSAINT

Mersi Madanm Speaker. Bonn apre midi Mr Cosgrow. Bonn apre midi tou Manm, tou bann telespektater ki pe ekout nou ozordi apre midi.

Mon'n vwar ou CV, byen plen, bokou leksperyans lo kote travay Gouvernman ler ou'n dan Legzekitiv.

E mon kestyon pour ou i lir koumsa, vi ki mon'n osi konstate ki ou'n deza CEO pour Lazans Proteksyon Sosyal.

E mwan mon ti a kontan demann ou kwa ki pou posibleman ou premye demars ki ou ti pou antreprann zisteman pou soulaz lavi ouswa fason viv nou group dimoun pli vilnerab dan pei?

Sa i konpri dimoun byensir dimoun ki pli aze, i annan bann dimoun ki mwen kapab, e i annan en group osi ki souvandfwa i ganny oublie, se sa group bann madanm ouswa manman tousel dan pei. Mersi.

MR WALLACE COSGROW

Mersi Madanm Chair. Mersi Onorab Toussaint. Onorab Toussaint, ou kestyon i anmenn mon direktman lo nou manifesto. Nou bann program manifesto e osi nou program 100 zour. E anfe i relye en pti pe avek kestyon ki Onorab Woodcock in demann mwan.

Nou manifesto e nou bann program ki nou pe vin avek i bann program ki target zisteman sityasyon ozordi ki nou pe war dan pei. I annan en kantite dimoun ozordi, nou konstate en kantite dimoun ozordi, ki pe war li difisil pou fer 2 bout zwenn.

Mwan konman en dimoun ki'n travay kot Lazans Proteksyon Sosyal, anfe mwan mon'n en dimoun ki'n war en kantite bann dimoun ki'n dan bann sityasyon vilnerabilite.

Parfwa i pa zot swa, parfwa en sityasyon i arive ki zot war zot tanporerman petet dan bezwen e mon'n ede soulaz

en kantite sa bann sityasyon koumsa.

E mon pa war li difisil ozordi ki nou dan Gouvernman, e si mon ganny sa bann posibilite pour mwan kapab anmenn en soutyen, en soulazman pour dimoun ki dan bezwen, mon pou fer li baze lo nou bann pwen manifesto.

Nou manifesto i koz lo redwir kou lavi pou kapab sirtou ed bann fanmir ki dan bezwen, bann manman tousel ki dan bezwen. Fer desann pri marsandiz, komodite pour ki zot kapab fer de bout zwenn dan lakour. Sa i en promes manifesto e nou bezwen delivre lo la e mwan mon angaze ansanm avek Gouvernman pour nou delivre lo la.

Nou'n koz lo par egzanp lo ogmant pansyon nou bann dimoun aze. Ozordi i annan apepre 14, 15mil dimoun ki pe ganny Pansyon Sekirite Sosyal. I en group dimoun signifikan dan nou popilasyon.

Nou bezwen rod en fason ki mannyer nou osi an mezir ki pei i fer plis, an mezir ki bann dimoun ki pe travay osi i ganny plis, me nou ogmant osi pansyon ki sa bann dimoun i gannyen, pour ki zot kapab viv en lavi pli - pa eze. Me selman en lavi pli dinyifye.

Nou'n koz lo sa mekanizm *triple lock*, ki mannyer nou pou ogmant pansyon dousman, dousman pou fer sir ki personn pa ganny afekte avek lenflasyon e osi sanzman dan saler, *ok*.

I en mekanizm inovan ki nou pe anmenn pou fer sir ki dimoun pa reste deryer, pa war zot lo en pansyon ki *stagnate over* en serten letan, kan ki pri lavi e osi saler in ogmant sitan kantite.

I en fason pou kapab *alleviate* en pti pe fason lavi bann dimoun ki pli aze. Nou pe koz lo par egzanp revwar servis bis piblik. Ler mon dir revwar servis bis piblik, fer li vin pli modern. Me *at the same time* fer li vin pli abordab, *ok*.

Parfwa nou krwar letan nou soulaz lavi en dimoun i zis larzan ki soulaze. Non, i annan bann lezot fason ki Gouvernman i kapab entervenir e fer sir ki sa dimoun son lavi i ganny soulaze pa neseserman zis atraver larzan, me atraver bann lentervansyon ki Gouvernman i fer pou fer sir ki i pa tir sa larzan dan son pos. *Ok*.

I annan - nou bezwen kapab rod en fason pou soulaz nou pep. Nou'n ganny mete la pour nou soulaz pep pour nou fer sir ki nou met pep a lavan e bezwen a tou pri ekout nou pep,

nou bezwen atou pri ler ki pei i fer byen nou bezwen fer sir ki i ganny partaze avek pep Seselwa.

So, nou manifesto dan bokou lenstans i *zoom in* lo sa bann *areas*, e i fer sir ki pep Seselwa i pas touzour premye pandan tou sa ki nou fer, e dan tou sa reveni ki nou, nou anmase konman en Gouvernman. Mersi Madanm Chair.

MADAM SPEAKER

Mersi Mr Cosgrow. Avan mon donn laparol lot dimoun pou demann kestyon, si zot anvi mon latansyon pour zot kapab demann kestyon lev lanmen oubyen zot *even* kapab servi *Teams*, anvoy mwan en pti mesaz mon ava vwar.

Pa bezwen fer sa son ki mon'n tande silvouple. *That was not nice*. Onorab Monthy?

HON PHILIP MONTHY

Mersi Madanm Chair. Mr Cosgrow, mon'n ekout ou byen la, ou'n koz lo bann promes ki zot in fer ki zot pou fer sir zot onor sa bann promes. Ou'n koz lo met Seselwa avan, ki i byen.

Me nou konnen poudir zot pa'n touzour fer sa konman en parti. Ou Sekreter Zeneral Parti US. Nou konnen poudir dan lepase zot pa'n zis met Seselwa

konman priyorite avan. Zot in met osi zot parti avan.

E se sa ki i ti fer ki 2020 zot ti perdi eleksyon. Plizyer morso later ou parti in gannyen e i annan menm en morso ki ou konn byen sa tranzaksyon ki Dr Herminie ti aste pour 35mil lo non en lakonpannyen ki apre ti ganny vann 1milyon. So, sa in arive, *ok*.

Ki garanti tou dabor, eski ou santi sa bann keksoz ki'n ganny deroule dan lepase ti byen? Ou'n ganny sans ankor la pou retourn dan Gouvernman.

Eski ou pe promet pep Seselwa ki nou pou war en diferan Parti US - mon pa konn ou portfolyo, ou kapab vin Minis pour Later ek Lakaz - eski ou pe promet pep Seselwa ki later Leta pa pou ganny abize anba sa Gouvernman sa *New United Seychelles* parey in leka dan lepase? Mersi.

MR WALLACE COSGROW

Mersi Madanm Chair. Mersi Onorab Monthy pour ou kestyon.

Onorab Monthy, konman Sekreter Zeneral *United Seychelles*, mon ti ganny privez tou resaman pou asiste en sesyon Komite ki zot ti kree lo *Maison Du Peuple*, Chair par Onorab Georges. E ladan bann

kestyon ler mon ti reponn mon krwar mon ti reponn en pti pe dan laliny ki ou ti pe demann mon.

Dan mon lenvestigasyon ki mwan mon'n fer konman Sekreter Zeneral, mon'n war ki in annan bann tranzaksyon ki'n ganny fer, mon pa'n war okenn tranzaksyon sa ki mwan mon'n *investigate* ki'n ganny fer ki *United Seychelles* or son bann predeseser Parti Lepep or US i pa'n fer li legalman.

Tou sa bann *plot* later ki ti - dayer bann ki'n ganny retournen anver Gouvernman, i annan en kantite. Nou pa koz lo la sa bann. I annan en kantite.

Sa enn ki - mon a donn legzanp; sa enn ki annan *day care* or Lakres Les Mamelles lo la i en bout later ki ti pour nou ki'n ganny trounen ver Gouvernman e ki ozordi i annan en *day care* ankor en lakres pe monte lo la. E ki i pour benefis - i pou benefis zabitan Mamelles e tou Seselwa.

So, parey mon'n dir, mon ti deza dir ek sa Komite, tou tranzaksyon ki mon'n war i bann tranzaksyon ki legal, ki'n ganny peye e ki'n ganny anrezistre atraver sistenm Gouvernman legal. E mon pa konn okenn tranzaksyon ki'n ganny fer mal, ki'n ganny fer ki pa legal, *ok*.

So, mwan si i annan okenn - demen okenn tranzaksyon ki *United Seychelles* i fer an sa ki konsern later, mwan konman - dan mon letan konman Sekreter Zeneral, mwan mon pou fer sir ki tou tranzaksyon i bann tranzaksyon ki legal, drwat e *according to* Lalwa.

E mon asire ozordi mon kapab garanti ou, pou apepre 3an mon'n travay o bor Dr Herminie, ozordi Prezidan Herminie, ki a tout repriz ki nou'n fer bann diskisyon an sa ki konsern propriyete *United Seychelles*, nou'n fer li dan latransparans e nou'n fer li avek diskisyon e ki napa naryen ki *underground* ou kapab dir, ouswa ki pa normal. Sa ki mwan mon okouran e sa ki nou, nou'n fer.

So, mwan mon kapab garanti ou ki poudir pou napa naryen, pandan mon letan, pandan nou *tenure*, pandan sa 5an ki pa pou *above board* or ki pa pou legal. So, mon kapab garanti ou sa e mon kapab garanti pep Seselwa sa osi. Mersi.

MADAM SPEAKER

Onorab Romain.

HON GEORGES ROMAIN

Mersi Madanm Chair. Bonn apre midi Madanm Chair. Bonn apre midi tou koleg Onorab. Bonn apre midi Mr Cosgrow.

Mon kestyon - mon vreman kontan ler ou nonm fer sir tou bann promes i bezwen ganny delivre e mon krwar si ou'n fer sa mon pou dir zot *well done* si zot kapab fer tousala, i byen.

Mon premye kestyon vitman, an vi ki ou ti en ansyen koleg dan Lasanble e mon konnen ou'n deza debat lo laz retret sorti 65 pou vin 63. E mon konnen nou lo nou kote nou ti pe pouse pour 65, zot, zot ti anvi fer reste 63.

E byensir ankor dan zot kanpanny politik sa in monte plizyer fwa. E sa mon krwar osi i parmi enn bann promes ki zot in dir zot pou fer, pou fer li retourn 65 - 63, pardon.

E nou tou nou konnen i annan bann konsekans par deryer sa ki i kapab annan en posibilite bann pansyoner, bann retret ki kapab war zot pa pou ganny tous zot larzan a en serten - dan en serten kantite lannen, baze lo sa bann diskisyon ki ti ganny fer dan Lasanble.

Alors, mon kestyon Mr Cosgrow, an vi ki la ou pou vin Minis, nou tou nou konnen ou pou vini Minis, *obviously*, eski

ou pou ede pouse pou fer sa laz pansyon- retret, pardon, sorti 65 pou retourn 63, an vi ki sa ti enn zot bann promes?

Dezyenm vitman. Osi koman SG, Sekreter Zeneral ou parti en pozisyon ki ase vreman o - e ankor enn fwa konman en ansyen koleg dan Lasanble, ou Prezidan, Prezidan Herminie in fer mansyon plizyer fwa ankor dan kanpanny ki ek nou pa ek nou pa pou egziste ankor. E sa mon siport sa 100poursan.

Mon kestyon pour sa, eski ou pou ede oubyen ou menm konman en Minis pou fer sir ki garanti ou kapab donn nou ki ek nou pa ek nou pa pou egziste anba zot Gouvernman aktyel ozordi? Mersi Madanm Chair.

MR WALLACE COSGROW

Mersi Madanm Chair. Mersi Onorab pour ou 2 kestyon enteresan.

Premye kestyon Onorab, an sa ki konsernan 63an. Wi 63an i en promes manifesto. Annefe si mon pa tronpe i en promes 100 zour, en. I annan serten travay legal ki bezwen ganny fer ariv devan Lasanble pou kapab materyaliz li. Me selman i en promes ki *United Seychelles* in fer avek pep Seselwa.

Nou'n fer bann kalkilasyon, nou'n fer bann

costing, nou'n fer bann diferan senaryo pour nou gete ki kantite fezab i fezab.

E mon asir ou ki poudir avek bann senaryo ki nou'n fer e osi avek bann nouvo reveni ki nou anvizaze Gouvernman anmase e osi diferan reveni ki nou krwar *Pension Fund* i kapab zenere, nou krwar ki sa i vyab i fezab. E nou pe pouse pour ki laz pansyon pou desann 63an.

Sa i en garanti, i en *pledge* fer par mon parti e i en *pledge* ki nou Gouvernman ozordi pou delivre. I pou bezwen delivre lo la.

Dezyenm kestyon an sa ki konsern ek nou pa ek nou. Mon krwar Prezidan Herminie dan son bann diferan *speech* dan bann *rallies* ouswa bann letan kanpanny, kanpanny ofisyel, in koz lo la in dir poudir ek nou pa ek nou i bezwen fini Sesel.

Ler in dir i bezwen fini i vedir ki nou rekonnet ki in annan serten sityasyon dan lepase. Menm mon pa oule antre dan sa bann letan Prezidan Ramkalawan, me nou konnen poudir in annan sityasyon ek nou pa ek nou pandan sa bann letan. In annan. Si nou anvi tir en keksoz, nou bezwen dabor admet poudir sa keksoz ti egziste.

E Prezidan Herminie in fer tre kler ki poudir ek nou pa ek nou pou bezwen ganny eliminen aköz i afekte profesyonnel, i afekte zeneral, i afekte en kantite keksoz.

E in menm al pli lwen dir ki pou dir i pou kriminaliz ek nou pa ek nou atraver en Lalwa. Savedir pou annan en Lalwa ki pou vin devan Lasanble Nasyonal pou fer sir ki okenn dimoun ki pratik - nou, nou apel sa ek nou pa ek nou.

Me selman okenn dimoun ki pratik okenn prensip or polisi or fason fer kot i diskrimin en dimoun baze lo son krwayans politik, *then* i devret ganny dil avek.

Mwan, mon enn ki pa krwar sa i devret egziste. So garanti ki poudir ek nou pa ek nou pou bezwen fini pandan Manda Prezidan Herminie. Mersi. Menm tre prosenn tan la. Mersi.

MADAM SPEAKER

Onorab Hoareau.

HON JOHN HOAREAU

Mersi Madanm Chair. Bonn apre midi Madanm Chair. Bonn apre midi Mr Cosgrow.

Mr Cosgrow, dan zot manifesto zot pe promet pou *repeal the 10th Amendment* ki en lamannman Konstitisyonnel

e ki donn solda, si oule *the power to arrest* ki si oule i en eleman ki neseler pour solda kapab aret bann bato sirtou, nou pe koz lo bann bato ki dan nou zone eksklizif ki vin fer swa trafik imen, swa drog, swa *traffic of small arms* oubyen *illegal fishing*. Alor, larme in ganny sa pouvwar pou *arrest* pour sa rezon.

Ki mekanizm zot pe planifye pou met an plas pou ranplas sa e ki pou kapab donn sa pouvwar larme pou kapab *arrest on* - dan nou delo teritoryal, vi ki larme pa lapolis? Mersi.

MR WALLACE COSGROW

Mersi Madanm Chair. Mersi Onorab pour ou kestyon. Onorab, ti deza an en mekanizm avan *10th Amendment* Konstitisyon pou dil avek bann *issues* sekirite maritim. E sa bann mekanizm ti pe mars byen.

Problenm avek 10enm Lamannman sete ki i donn posibilite met solda lo semen Mahe, Praslin, La Digue lo nenport ki teritwar pour ki a nenport ki moman i napa en restriksyon lo la Prezidan i kapab met solda lo semen a nenport ki moman.

E se sa ki nou ti kont nou. Prezidan a son nenport ki

diskre i kapab met solda lo semen, san menm bezwen kree en *state of emergency*. Son se sa ki nou pou dil avek. Se sa. Nou pa kapab annan en sityasyon kot a nenport ki moman nou annan nou en Lafors Lapolis, a nenport ki moman solda i vin lo semen.

Nou'n war serten lenstans pandan sa dernyen 5an kot solda in vin - in fer serten loperasyon ki si mon kapab dir in ganny legalize par sa *10th Amendment*.

Fer serten loperasyon petet pa loperasyon *fully* arme konman lager. Me selman kot zot in entervenir dan serten landrwa kot pa ti neseler. Nou tou nou'n war. Nou tou nou'n war lo televizyon, nou'n war lo medya sosyal ki pa neseler.

Nou annan nou en Lafors Lapolis ki profesyonnel ki devret kapab dil avek okenn sityasyon sivilyen, okenn sityasyon ki *arise* ki lapolis in toultan dil avek.

So, se sa ki nou pou dil avek. Ler nou *repeal 10th Amendment* nou pou fer sir ki sa pa arive e nou ava gete sa zafer *maritime safety*, petet i en domenn ki nou ava re kategoriz li.

Me pou met solda lo semen san en *state of emergency*, pour nou i pa

akseptab e nou pa krwar i devret pe arive. E i pou bezwen - a mon avis i pou bezwen ganny *repeal*.

MADAM SPEAKER

Onorab Georges.

HON BERNARD GEORGES

Mersi Madanm Chair. Bonn apre midi Madanm Chair. Bonn apre midi Mr Cosgrow, byento Minis Cosgrow ankor enn fwa.

Minis avan ki - Mr Cosgrow avan ki mon demann ou en kestyon, mon pou bezwen fer ou rapel ki “ek nou, pa ek nou” i ankor egziste depi ki zot in ganny elekte o pouvwat.

Avantyer dan sanmenm sa Lasanble mon'n fer en propozisyon pour ki Onorab Gervais Henrie i vin Deputy Speaker, me aköz i pa ek zot, zot in vot kont.

(laughter)

HON BERNARD GEORGES

Alor, lala en legzanp kler. La en legzanp kler.

Mr Cosgrow i annan 2 kestyon pour ou. Premyerman, ou'n koz apre midi lo dimoun ganny fer difisil pou fer 2 bout zwenn. Ou'n koz lo soutyen, ou'n koz lo soulazman, eksetera. Bann dimoun mwen fortinen dan nou pei ki zot pe

vin travay pour zot e mon remersye zot e mon swet zot bonn sans.

Ki mannyer ou rekonsilye sa avek en parti politik parey zot ki annan tou sa bann kantite later e ki vann sa bann later pour sa bann pri ekstraordiner? Par egzantp, ou'n donn mwan en legzanp lo Les Mamelles, me mwan mon a donn ou ex-Flanbwayan ki zot pe al vann la pour R80 ekek milyon.

Ki mannyer eski zot kapab dir avek lepep ki zot swadizan pe vin ede? Ki zot, zot en parti ki pe fer larzan la lo ex-Flanbwayan zot in aste lo pou R1.5milyon, zot pe al vann li pour R80milyon, eksetera. Ki mannyer zot kapab rekonsilye sa 2 keksoz? Limero enn.

Limero 2. Eksplik mwan ki mannyer zot *triple lock* pou anmenn - e mon pe sit sa ki zot, zot in dir; *“introduce a triple lock that will ensure an annual increase in social security which will either match the rate of inflation, percentage increase in average earnings or 3.5% of the current level, whichever is highest aiming to increase social security to reach SR10,000 per month by the fourth year”*.

Setadir avan 2029, zot pou'n ariv R10mil. Sa se zot ki pe promet me pa dan okenn

lezot fason, me atraver *triple lock*. *That's your* - se sa ki zot manifesto i dir. Ler mwan mon'n kalkile, 3.5poursan lo son soz aktyel i R277.50 par an ki zot bezwen azoute.

Dezyenmman, lenflasyon nou konnen i zero pwen *something* poursan, alors zot pa pou kapab kont lo la. Sel fason pour zot fer sa kalkil ariv R10mil dan 4an se fer monte tou saler *right* atraver pei par 8poursan apepre tou le-z-an. Se ki pou fer ki *by the time* zot ariv R10mil, saler pou telman o ki R10mil pou nepli ekivalan ek sa ki zot anvi fer ozordi.

So, eksplik nou ki mannyer zot in ariv lo sa *triple lock* ki selon mwan zot pa pou kapab delivre lo la? Mersi.

MR WALLACE COSGROW

Mersi Madanm Chair. Mersi Onorab pour ou kestyon.

Ou premye kestyon se ki konsern asiste bann dimoun ki pli vilnerab, fer sir ki bann dimoun i a kapab fer 2 bout zwenn. Me i senp sa, nou annan nou bann mekanizm Leta ozordi ki'n ganny met an plas. Dayer in ganny met an Plas depi nou letan, ki *à mon avis* pa'n ganny servi o maksimonm *or* pour sa *purpose* ki i ti ganny etabli.

Nou annan par egzantp limero enn Lazans Proteksyon Sosyal. Lazans Proteksyon Sosyal zot in *run* li parey en antrepriz prive, zot pa'n neseserman get sityasyon dimoun vilnerab la deor.

So much so ki i annan bann lannen ki zot ti pe rann larzan Gouvernman ti pe dir zot in fer *savings*, kan i annan dimoun la deor ki ti pe war li vremen, vremen difisil.

E ler ou pas kot zot i dir ou poudir nou pa kapab fer 2 bout zwenn. Sa i en mekaniz Leta, nou bezwen kapab ed sa ki fer plis i bezwen kapab ed sa ki pli vilnerab, atraver mekanizm Leta.

Dezyenm nou annan lenstitisyon parey *STC*, ki son kreasyon ti ganny fer pour li kapab tenir pri komodite, pri marsandiz pou fer sir ki napa en debalansman ki serten dimoun pa kapab *afford*. Ozordi *STC* son manda in - ou a krwar i nepli annan, *STC* i fer biznes ek *STC*. Kantite keksoz nou pe dekouver e ki pou sorti byento.

Sa bann mekanizm ki nou ti pou kapab servi pou soulaz sa bann dimoun e fer 2 bout zwenn. Sa i 2, me nou pa'n fer. E nou, lepep in *entrust* nou pour nou kapab vin pran sa Manda e nou, nou pou fer li marse. Nou pou fer li marse.

Nou pou tourn Lazans Proteksyon Sosyal dan son vre manda ki i ti ganny etabli pou fer. Nou pou tourn *STC* pou son vre manda ki ti ganny etabli pou fer, e nou pou rod diferan fason *SPTC* son vre manda ki ti ganny etabli pou fer pour nou soulaz lavi sa pep, *ok*.

Mon konpran petet nou filozofi politik avek pour zot i enn - i pa neserman parey, i pa neserman war *eye to eye*. Me se sa ki nou, nou war li en lot fason ki nou krwar poudir nou kapab fer sa ki nou'n promet pep Seselwa pou fer. Sa i premye kestyon.

Dezyenm kestyon. Nou bezwen realiz en keksoz le bi se pou fer pansyon o pli vit posib mont R10mil. Be ki mannyer nou *manage* pansyon apre ki in mont R10mil pou fer sir ki nou pa dan sa sityasyon ki nou ete ozordi? Se ki nou *apply the triple lock system*.

E i pa pou zanmen - si nou *apply the triple lock system* korekteman, nou pa pou zanmen war nou - nou pa pou - mon pa pou dir zanmen, me selman i pou difisil war nou dan en sityasyon kot pansyon i reste *stagnant* i pa zanmen - *wage* i kontinyen monte, lenflasyon i kontinyen monte me sa dimoun ki lo pansyon i kontinyen war li ek en pansyon ki pa bouze *or en*

pansyon ki bouz vreman pti gin, ki i pa ni fer sans konm dir ou menm ler *wages* in monte lot, lot, lot.

Le bi se ki nou ariv lo sa R10mil nou fer sir ki a en serten pwen nou ariv lo sa R10mil e nou *manage* pansyon *from then on* pour *the triple lock system*. Se sa le bi, se sa le bi. Se sa le bi e se sa ki byento dan bann prosen zour, semenn ki pe vini, nou pou eksplike tre byen ki mannyer nou pou fer li. Petet i ava bann letan Bidze.

So mersi Madanm Chair, mon krwar mon'n donn Onorab leksplikasyon lo tou lede. Mersi.

MADAM SPEAKER

Si nou napa okenn kestyon ankor, nou ava dir Mr Cosgrow mersi e nou ava eskiz li dan *Chamber*.

MR WALLACE COSGROW

Mersi Madanm Chair.

MADAM SPEAKER

Nou pou osi remet nou dan Staz Lasanble. Deba i ouver lo Mosyon. Onorab Larsen.

HON CECILE LARSEN

Mersi Madanm Speaker. Bonn apre midi *a tous*. Mon ti a kontan dir ki mon'n annan loportinite pou konn Mr Cosgrow, e mon kapab dir avek

bokou konfidans ki i en dimoun devoue, travay dir, entelizan e serye dan tou sa ki in antreprann.

Son langazman pour pei ek son bann valer *leadership* i kler pour tou sa ki'n travay akote li e pour Lepep Seselwa.

An plis, son leksperyans konman en ansyen Minis in donn li en bon bagaz lo gouvernans. E mon sir ki sa pou ed li pou delivre dan son nouvo rol.

Mon siport son nominasyon avek lafyerte e mon annan konfyans ki i ou delivre en servis ekselan pour nou pei. Mersi Madanm Speaker.

MADAM SPEAKER

Onorab Monthy.

HON PHILIP MONTHY

Mersi Madanm Speaker. Parey mon'n fer mon lentervansyon yer, mon napa okenn kestyon e dout lo konpetans Mr Cosgrow. Mon konnen ki i en zenn *homme* tre konpetan e nou annan en bon relasyon koleger i ti Onorab. Nou'n deza *travel* ansanm, nou'n angaze dan plizyer diskisyon ansanm. So, i annan an nivo respe e lo son konpetans mon napa okenn kestyon.

Me mon pe fer sa pti lentervansyon la, akòz kestyon ki mon'n demann li taler i pa'n vremen satisfè mon avek larepons ki in donner.

Onorab - Mr Cosgrow in reponn mwan poudir i pou fer sir *ok*, ki napa naryen ki ganny fer *above board*. Ki napa naryen okenn tranzaksyon ki ganny fer ilegalman.

Pa sa le pwen. Le pwen sete ou parti dan lepase in servi son pozisyon privezye pour li anrisir son lekor, in fer sa dan en fason legal. In aste e i pa'n vini pou pran pour naryen later, in peye in aste, menm i zot pa'n fer sa dapre valè ki sa bann propriyete ti ete, selman zot in aste. So, i fer li en keksoz legal.

Lesklavaz tou dan lepase ti legal, me eski sa ti fer li en keksoz ki byen? So, se sa - sete sa mon kestyon ki mwan mon'n demann li taler, ki prezan ou'n reganny sans pou ou retoun dan Gouvernman pou revin en Minis ankor. Ou parti in retoun o pouvwar, eski ou pe promet Seselwa poudir la safwasi keksoz pou diferan?

I annan en lalis promes zot in fer. In koz lo met Seselwa premye me dan lepase nou'n vwar ki zot in osi met zot parti an premye.

Donk, mwan mon pa'n tro satisfè avek repons ki Mr

Cosgrow in donn mwan aköz i pa'n *convince* mwan poudir sa bann labi lepase vizavi son parti, ki sa pa pou ariv ankör.

In dir sa, i kapab promet ki napa naryen ilegal ki pou arive, me i pa'n dir ki zot pa pou servi zot pozisyon pou zot kontinyelman anrisir zot lekor.

So, se sa mwan mon pozisyon lo son nominasyon, pa lo son konpetans. Me mon pa - baze lo listwar lepase lo zot *track record* ki zot annan e sirtou lo en tranzaksyon tou ki ti annan sinyatir Onorab, Mr Cosgrow lo la, mon en pe an dout lo son nominasyon pour sa pozisyon. Mersi Madanm Speaker.

MADAM SPEAKER

Onorab Sopha.

HON GERRY SOPHA

Bonn apre midi Madanm Speaker. Bonn apre midi tou koleg Onorab. Ankör enn fwa apre midi nou'n temwann y en lot nominasyon, kot en zenn msye ki annan bagaz, ki annan kalite, konpetans in vin devan Lasanble Nasyonal pou aprouv son nominasyon.

Madanm Speaker, lot kote latab mon respe tou lopinyon ki bann Onorab i vin avek, be i pa neseserman ki mon aksepte. Mon pou pran premye

entervenan apre ki Mr Cosgrow ti'n fini pran son pozisyon in fer son lentrodiksyon.

In demann en kestyon Mr Cosgrow, ki pour mwan i en kestyon ki merit ganny demande e i annan lezitimite, aköz nou la pour pep Seselwa, nou pa la pour nou konman en endividi. Onorab Woodcock in demande ki mannyer zot pou delivre sa bann promes ki zot in met devan Lepep Seselwa?

Madanm Speaker, Ladministrasyon Prezidan Herminie in vin ek en manifesto, in detaye e sanmenm ozordi dan Lasanble Nasyonal nou kapab demann kestyon selon diferan size ki dan sa manifesto, en program sa.

United Seychelles son Gouvernman in adopte en prensip progresiv ki diferan opred prensip liberal, ki *LDS* ti vann Seselwa an 2020 e Seselwa in aste an vorasite e apre in annan son konsekans. *Mindset* prensip progresiv se pou kontinyen aprann, grandi, adapte avek nouvo sanzman.

Madanm Speaker, mon pa pou kapab mank sa sans pou mwan fer sorti ek pep Seselwa ki pe ekoute la apre midi, ki Prezidan Dr Hermine in fer serten promes dan son

manifesto ki annan tit “*for the many, not for the few*”.

Ladministrasyon Prezidan Herminie in prezant pep Seselwa avek sa program. Sa ladministrasyon in annan 2 semenn legzistans apepre dan lofis. Sa ladministrasyon in ganny en manda 5an savedir, annou met li 2 semenn plen 14 zour. Ler ou pou tir 14 zour dan 5an, ki kantite zour i reste?

Lekel ki pou kestonn Ladministrasyon Prezidan Herminie a lafen dizour? Se pep Seselwa si i pa delivre lo son program ki in anmenn devan Lepep Seselwa. Prezidan Hermine i annan akote li en *Cabinet*, i annan mazorite dan Lasanble Nasyonal. *LDS* kile, les *Cabinet* Dr Herminie travay.

Madanm Speaker, mon pa pou kapab pa fer sorti sa pwen swivan ek Lepep Seselwa. Si program, promes *United Seychelles* pe ganny kestonnen e repons pe ganny donnen, aköz *LDS* son program 2020 ki i ti anmenn devan Lepep Seselwa i pa'n delivre i pa kapab donn leksplikasyon aköz?

Ma pran 2 keksoz ki kas leker. Nou tou nou'n antann, fer desan pri lavi. Sa pep Seselwa ti krwar i annan lanz ki sorti dan lesyel zis pe vini pe fer pri lavi desann.

Koup *tax*, i dan zot program 2020 lo program *LDS* Madanm Speaker. Eski *tax* in desann lo Seselwa ozordi? I dan promes sa. Eski in ganny realize? Zot in fini zot manda 5an. Si *LDS* i war li dan Lopozisyon ozordi se aköz zot pa'n delivre *according to* zot promes.

An plis ki sa, i annan dimoun ki ti asiz lo kote latap mazoriter avek pouwar absoli ti deside kit *LDS* e i ti prononse avek medya ki li in ale aköz bokou promes ki *LDS* ti met devan Seselwa an 2020, zot pa'n garde. Pa Onorab Sopha ki dir sa Onorab Georges! Sa i en madanm ki ti dan zot kote latap e i annan en msye osi atraver ou Madanm Speaker, ti sorti ek *LDS* aköz i dir zot pa'n gard zot promes. Alors, *United Seychelles* pa pou repete sa fot e sa kouyonnen ki pep Seselwa in gannnen avek *LDS*.

MADAM SPEAKER

Onorab! Onorab! Onorab!

HON GERRY SOPHA

Eskiz mwan.

MADAM SPEAKER

I annan detrwa parol ki ou senpleman pa kapab- *retract!*

HON GERRY SOPHA

Mon *retract* Madanm Speaker. I *retract* Madanm Speaker.

MADAM SPEAKER

Mersi.

HON GERRY SOPHA

Pep Seselwa, pa pou kapab ankor viv dan en tel sityasyon.

Me Ladministrasyon Dr Herminie pou fer sir ki i koriz sa lenzistis ki'n arive e pep Seselwa i viv dan dinyite avek bann promes ki son ladministrasyon in met devan e fer sir ki a lafen dizour 2030, pep Seselwa i a deside dapre travay ki Prezidan Herminie avek son Ladministrasyon in fer. Mersi Madanm Speaker.

MADAM SPEAKER

Onorab Naidu.

HON SATHYA NAIDU

Mersi Madanm Chair. Zisteman devan nou, dan mon labous i vin Onorab Cosgrow aköz in fer 7enm *Cohort* e nou'n la. E la mon pe asiz lo sa kote latäb ki i ti pe okipe e latäb in sanze. Lepep in koze me lepep an menm tan in donn nou plis syez ki 7enm *Cohort*. Annou mazin sa byen. Lepep in anmenn Eleksyon Prezidansyel dan en dezyenm *round*, nou annan en pep ki divize, politikman.

Me ozordizour Ladministrasyon Dr Patrick Herminie i annan sa pouvwar pou dirize atraver Legzekitiv pei, e lo nivo Lasanble ler i konsern 2 tyer Lasanble e zot, zot napa.

Zot napa sa pouvwar absolü ki zot ti annan pandan 7enm, e dan 8enm zot bezwen kapab tenir en konversasyon avek Lopozisyon kot zot demontre en matirite politik.

Ou konnen, pli boner - aköz ozordi i fer premye fwa ki pandan staz deba ki mon pe koze. Aköz avan mon'n lev lanmen mwan, mon konnen ki ou pe donn tou dimoun en loportinite pou partisip dan sa prosesis e mon apresye lafason ki pou pe diriz sa faz.

Me selman prenan kont ki pli boner ti annan en Minis ki'n fini ganny apwente atraver Lasanble Nasyonal mon ti'n dir ou'n byen zwe ou kart, be ki konteks? *Politics is a game of chess; it's how you play then it played it well.* Felisitasyon lo sa konteks ki mon pti pe dir.

So alors si ou pe donn en repons *be what you want to be* sepa ki zafer e ou pe detourn mon parol, mon bezwen poz kestyon lo ou lentansyon, enn.

Dezyenmman, en konsey pour son *bien aimé*. Madanm, felisitasyon ou garson in ariv

lwen, me selman ler i pe tenir en pozisyon piblik, i pou ganny kestyonnen. Mwan mon pa la pou vin flat personn mwan mon reprezant zabitan St Louis.

Si i annan en lamannman konstitisyonnèl ki'n ganny met devan, mon pa pou kapab zis vin demann kestyon lo lasante, par egzanp mon dwatet regarde eski sa msye i annan konpetans dan en konteks legal?

Ler ou asiz dan *Cabinet*, eski nou pa war bann desizyon *Cabinet* lo Nouvel 8er, kot zot pe diskite sityasyon pei kot zot pe konsilte?

Me alors, kekfwaw mon frer i kapab fer en travay dan domenn Lasante, me pa neseserman dan lezot domenn - lepep i ava note si mon korek, wi ou non? Ek nou, pa ek nou? I byen pou dir an term parol.

Me selman i enportan pou pratike atraver nou bann aksyon. Lepep Seselwa ki annan pouvwar dan zot lanmen, pouvwar dan zot lanmen pou met li, ouswa pou tir li.

Mwan mon'n lo tou lede kote pa tou Manm ki lo lot kote ki kapab dir zot in dan Lopozisyon e zot in dan Gouvernman. I en leksperyans ki mon pe pas ladan.

Ler mon ti'n antre mon ti'n antre a laz 26an. Ozordi mon

annan 32an. E menm Onorab Lemiel in fer referans avek serten non ki i ti pe ganny propoze pou dir wi, la deor i kapab annan dimoun ki pa neseserman kontan sa propozisyon, me selman tou dimoun i dwatet annan en dezyenm sans.

Me ankore en fwa, en *post* Minis i en pos ki serye, e mon swe se ki bann limero kontak bann Minis i a vin dan domenn piblik. Limero kontak tou bann *PS* i vin dan domenn piblik.

Mon pa pou lir limero Mr Cosgrow, me selman lemoman ki ou'n ariv dan sa pozisyon espekite ki ou limero i dwatet dan domenn piblik pour ou travay mon frer. Ou pe ganny 42mil apre *tax*, ki fer 400poursan, plis ki sa 10mil ki zot, zot in promet.

Travay pour ou larzan, akòz nou dan Lopozisyon nou a fer tou sa ki posib pour nou met devan laspirasyon Lepep Seselwa, pou asire ki ou konman sa Minis i ava retir bann leson.

Sa bann menm leson ki'n ti'n fer ou asiz isi dan Lasanble konman en Manm Proporsyonnèl, pou ou realize poudir lepep pe regard ou de pre. Annou pa vin pres bann ideoloji, ki apre pli tar nou pa

pe pratike, annou vin fran, annou vin senser.

Si ou'n pran ou larzan *forgo*- si ou an abilite atraver sa larzan ki ou pe resevwar konman en saler le mwan, rann. Se sa ki montre lasazes lo son lapar, se sa ki montre lonnekte lo son lapar.

E laprev i pou la dan *Website State House*. Pour lazenes ki pe ekoute, fer zot resers zot a regarde si sa ki mon pe dir i vre ou fo. Ozordi nou pe viv dan en lemonn teknolozi *right?*

E pour sa madanm ki'n-non, pour Mr Faure ki ti'n vini, i ti'n reponn avek mwan poudir servi ou bann koneksyon dan Lenn.

Mwan mon kapab dir, mon ti'n deza donn en *interview* avek en Zournal Endyen kot mon'n dir mon pa krwar dan okenn Baz Militè etranze.

Mwan mon regard dan lizye Mr Singh *ok*, ki ti la konman Anbasader Lenn. Sa zeneral ki zot ti fer vini sorti Lenn pou sey pou sa Lagreman kot ler i ti'n pous sa Lagreman ek mwan dan en konversasyon, mon'n pous sa Lagreman avek li pou dir ki mwan mon pa krwar ladan msye.

Akoz Sesel nou bezwen asire ki nou viv dan en pei ki stab. Mon pa oule okenn

friksyon ant Kominote Endyen avek nou bann Seselwa. Mon le asire ki lentere nou pei i ganny proteze a tou pri.

Alor si Mr Faure ti annan liminite pou vin devan Lasanble pou dir wi, a en serten pwen nou ti'n siny Lagreman, ozordi pozisyon in sanze.

Be si i vin reponn, apre lafason ki i reponn, *he starts on the letter 'a' and it goes to 'z'*. Dan plas 'z', wi mon'n sinyen, me ozordi mon pozisyon i pa parey.

Vin devan avek Lepep Seselwa dan en fason ki fran, aköz tou sa ki pe ganny dir, tou sa ki pe ganny fer nou pep pe note e nou pep pe regarde. Se zot ki annan pouvwar dan lanmen. Nou, ler nou'n ganny en pozisyon i enportan pou itiliz sa pouvwar dan en fason ki responsab, dan en fason ki etik.

Si sa bann prensip pa ganny swiv nou, nou pou *sound the alarm as a responsible Opposition*. Nou pa krwar dan ek nou pa ek nou, Sesel Pour Tou Son Zanfan. Pour bann dimoun *UO, SNP, LDS, St Louis*, ou konnen ki zot ti dir mwan?

Zot ti dir, sa i ti vin enn bann fot ki nou, nou ti'n fer. Nou'n donn tou bann dimoun, tro bokou dimoun en dezyenm sans. Mon bann siporter, nou bann siporter *LDS* i konn sa tre

byen, me selman nou'n bezwen swiv sa prensip.

Alors, pa zis vin pres ek nou, pa ek nou. Nou pa pou fer. Akoz tou sa bann travayer dan Gouvernman, zot pou annan en drwa, drwa de ekspresyon anba Prezidan Wavel ki ti la konman senkyenm Prezidan ki ti'n rennyen dan Sesel.

(laughter)

HON SATHYA NAIDU

Kot tou dimoun ti kapab dir nenport e de kwa. E sa i mon lopinyon, mon pa war okenn rezon akoz zot pe riye. Si ou'n lev ou lanmen, ou pou koz apre non? Mon pa war akoz ou pe *disrupt* mwan.

So, an relasyon avek sa size, mwan mon kapab di ler mon ti'n al inogirasyon Prezidan Dr Patrick Herminie, mwan mon ti'n ale akoz mwan mon'n dir mwan mon bezwen reprezant bann dimoun ki'n elekte mwan. Mon'n ale mon'n asiste.

Kantmenm wi, konman en dimoun ki'n debout kont son parti e menm ban prensip ki mon pa a krwar ladan. Me selman si zot fer byen, mon ava felisit zot. Selman si zot pa pe fer byen, mon ava dir zot. Selman mon'n ale akoz mon pa krwar dan ek nou, pa ek nou.

Ozordi dan kantin Lasanble Nasyonal, nou dan LDS, nou ankor dan kantin. Nou pa'n retourn dan nou *Caucus Room* parey in leka dan *7enm Cohort*.

Nou, nou annan sa matirite pou travay e mon santi nou annan en loportinite pou deservi Lepep Seselwa. An deor in annan en leokri parmi siporter *US*, kot zot in dir ki nou oule ki nou lavwa i ganny tande.

I annan en garson ki sorti Roche Caiman, i popiler lo rezo sosyal. E pou premye fwa mon'n kapab *subscribed to his comment* akoz mon'n war ki in balans son rezonnman byen, kot in menm demann en *closed session*. Me selman mon krwar pa tousala i en posibilite kot zot in dir rekonsider serten desizyon.

But if they want to set themselves up to fail, the people will judge, and a decision - en desizyon a en moman apropiye i pou ganny pran par Lepep. Zot kapab tir li, zot a kapab remet li.

Desizyon pouvwar i dan lanmen Lepep Seselwa e mon swe se ki sak sa bann dimoun ki pou ganny apwente konman Minis, travay avek senserite, travay pour sa pep, travay pou bouz Sesel annavans.

E annou sey fer nou mye posib pou asire ki linite parmi nou pep i pa zis en zoli slogan, me nou pou fer si ki nou kapab pratik li. Mersi Madanm Speaker.

MADAM SPEAKER

Onorab Loze.

HON JOHAN LOZE

Mersi Madanm Speaker. Madanm Speaker, letan nou tap nou lestoman for e nou fer bann prononsman, nou bezwen annan memwar pou al avek.

Bann Manm 6enm Lasanble i ava rapel letan Onorab Noline Sophola ti ganny menase pou ganny kalote dan sa kantin, dan sa *tea room* ki Onorab Sathya Naidu pe koz lo la. Ti ganny menase par en zonm.

Bann Manm 6enm Lasanble i ava rapel letan ki Onorab Chantal Ghislain ti ganny menase dan sa kantin, dan sa *tea room*, ti ganny anvoy anndan manman dan sa kantin, dan sa menm *tea room* par menm zonm en Onorab LDS ki ti menas Onorab Sophola.

Be Onorab, si ou pa rapel akoz nou ti degout zot kantin, nou ti degout zot *tea room*, nou ti degout zot *company*, nou ti degout fraterniz avek zot. Mon a *serve as a gentle reminder*.

Prezan ozordi mwan ki kontan koz avek sa 70mil popilasyon Seselwa, zot tou zot ava konnen.

Zot ava konnen poudir Onorab Sophola avek Onorab Ghislain ti ganny menase par en koleg Onorab zonm dan sa kantin, dan sa *tea room* e i ti ganny anvoye anndan manman. Zot a konnen, akoz Seselwa pa konnen sa.

Ler Onorab Georges in asize sa semenn in dir ti annan separasyon. En bann i bwar dite isi, en bann i bwar dite laba. I dir nou reste trankil, nou sibir nou kou trankil, nou ti dan minorite sa bann letan.

Depi 6enm Lasanble nou'n dan minorite. 7enm nou'n dan minorite, kantmenm Onorab fek dir zot ti annan *super majority* dan 7enm. Nou ti napa, zot ki ti annan.

Anyway, Onorab Georges in dir sa trankilman, nou pa'n *mind* nou'n les pase, be la kanmarad pe vin tir lizye ek nou in ouver bel! I dan kantin, i ankor dan kantin, i pe bwar dite. Be ti annan en rezon nou ti arete Madanm Speaker. Ti annan en rezon nou ti arete. Ti annan menas vyolans lo bann madanm.

Mon pa pe nonm non lekel ki ti fer, selman i en fe, i en fe e Onorab LGB i ti temwannyen. I

ti la li ler sa ti deroule. So, annou koze, be nou eksprim nou lekòr, nou fer nou politik me annou pez li, annou pez li byen avèk bon sans. Akòz pa nou tou ki'n bwat sa menm dilo *cool easy* ki zot, zot in anvale.

I annan nou ki annan memwar. Nou apel keksoz ki'n deroule, nou rapel keksoz ki'n pase, nou les pase, nou pa dir zot, i pa enportan be ler ou pik tro for la, laverite pou sorti. Be solman ler laverite i sorti i pa get byen, lo personn ofet. Alors annou les serten keksoz trankil. "*Let sleeping dogs lie, leave well enough alone*".

Akòz mwan mon pou dir zot fransman mon pou dir zot mon en, lezot dimoun pa ava dir zot, mwan Loze mazanbik epe mon pou dir zot.

Be Madanm Speaker, nou pe koz later, later Parti US. Byen, nou tou nou annan labous nou koze. Be mwan mon rapel resaman Onorab Sebastien Pillay ti anmenn keston lo en later kot sa dimoun ti napa laplikasyon later. Ti napa li, laplikasyon later ti ganny fer 1 mwan, son mwan prosen i ganny later.

Prezan in ganny li 2 *plot*, S-14133 avèk S-13854 la Pointe Larue. Enn i fer *flat*, lot i fer *car hire*. Mon repete, i ti napa laplikasyon li, i ti napa!

Laplikasyon i fer, mwan answit i ganny en later, i ganny li 2 *plot* later. Be parti US sa? 43an pase sa? Zot pa get devan zot laport ki *carer* sa msye pe fer?

Be sa *bodyguard* sa, *righthand man*, *the right hand of God* sa. Prezan, Parti US sa? Sa koripsyon later Pointe Larue nou pou koz lo la? Lafot Onorab Cosgrow? Lafot *Minister* Cosgrow? Pa krwar pa mon.

So, i pou annan serten lenvestigasyon ki pou ganny fer, ki pou bezwen ganny fer. Zot pou asize la kot zot ete *gentiment comme de bons enfants*, zot pou esper rezilta lenvestigasyon antre.

E i pa pou bann fo lenvestigasyon parey nou'n ganny dir resaman poudir i annan en rapor Oditer Zeneral lo *2020 Development*, i asize i lir, pon i tord sepa ki sa ki pe tonbe. Be Oditer Zeneral li zanmen in deza prodwi en rapor pour *2020 Development* li. Mon pa konnen kot son rapor i sorti mon sa msye.

Onorab, petet ou devret enform Lasanble kot sa rapor i sorti, akòz ou'n *mislead* nou e Lepep Seselwa avèk sa deklarasyon ki ou ti fer. Oditer Zeneral pa'n fer okenn rapor zanmen dan son listwar lo *2020 Development* li. Petet enform

nou, akoz ou ti annan kouraz pou dir nou.

Be ankor mon pou vin lo lapwentman nou bann Minis Madanm Speaker. Nou sa ki nou bezwen nou se zonm for. Nou bezwen zonm for pou travay, pou saroye, pou kolporte.

Be dimoun pe reazir, dimoun pe reakte. *Of course*, dimoun pe reazir, *of course* dimoun pou reakte. E dimoun pe reakte fas ek kwa? Rimer, ensinyasyon, lakizasyon.

Madanm Speaker, *LDS* dan son bann diferan laform e enkarnasyon in sot en 30enn ekek lannen dan politik. Tou sa bann dimoun ki zot pe maltrete la ki ozordi dimoun pe reazir.

Zot pe reazir kont rimer ki'n ganny fabrike par sa bann dimoun ki la, avek zot dirizan pandan sa dernyen 30enn ekek lannen ki zot in la.

Zot pe asize ozordi zot pe rekolte fri tou zot ta mansonz ki zot in senmen prezan ozordi zot dir nou, zot bann prop siporter ki pe dir. Zot in penn sa bann dimoun dan tou kalite lalimyer ek tou kalite penso. Zot ki'n fer! Zot ki'n fer! Zot ki'n fer!

E Seselwa i ava rekonnet en keksoz zot poudir ou, rekonnet son konpetans, mon pa kestyonn son konpetans. Wi i konpetan, i annan son

konpetan be selman in mal reponn mon kestyon. Mon pa kontan mannyer in reponn. Mon'n demann li lo later son parti i pa'n reponn.

Be later *bodyguard* ou Prezidan? I pa an kestyon li, ou pa anvi ganny en pe repons? Ou pa oule en pe repons lo *S-14133* avek *S-13854*, kado *bodyguard* Prezidan?

Be, la mon ti ava konpran poudir vre ou konsernen avek later, ou pa pe zis relev lanmor reken ki sa msye in dir ou sa in ganny fer legalman.

Be lesklavaz osi ti legal mon tande. Ou war, ozordi zot anvi koz en kou lo lesklavaz. Tou sa letan zanmen zot in reve. Selman lesklavaz ti legal, mon sipoze later *bodyguard* osi i legal parey lesklavaz menm.

So, nou pa koz lo la, nou poz la trankil *until* rapor lenvestigasyon i vini. Bon, pou vini sa. Zot pou fer zot *bonne enfants*, zot pou asiz *gentillement* dan zot sez trankil, esper rapor lenvestigasyon. Zot ki'n sali tou sa dimoun la ki zot pe dir i sal ozordi. Zot sa bann dimoun ki la.

E mwan mon pou dir ou en keksoz Madanm Speaker. Ou vwar sa parti ki apel Parti Seselwa la, ou konnen dan ki i ti fann papye? Dan en loto

limero S-6458 *belonging to Ram Car Hire*.

Now, sa bann msye lo lot kote latav, eksplik mwan en keksoz. Ki mannyer zot eksplik mwan ki zot dirizan ti fann son bann papye MPR sepa ki mannyer ti apele, dan en loto *belonging to Ram Car Hire*, e Prezidan Rene pa ti konnen konmsi?

Prezidan Rene pa ti konnen ki i pase kot *Ram Car Hire* li, *knowing* lekel propriyeter *Ram Car Hire*? Ouswa zot parti, Parti Seselwa in ganny finanse par France Albert Rene depi zot lensepsyon in finans zot pou zot detri Parti Demokratik?

Zis parey mon'n deza dir zot dan sa Lasanble. Premye sit ki Wavel Ramkalawan ti gannyen ti vin atraver en dil avek Prezidan Rene kot i ti *vacate* 21 fanmir SPUP, SPPF St Louis, ti anvoy zot Roche Caiman, 21 gran fanmir.

E sa Onorab Sathya Naidu pour ou lenformasyon, i ki mannyer St Louis in vin sa bastyon ki ou pe tap ou lestoman lo la ozordi.

La mon a dir ou ki mannyer in vini. Ti en dil ant Prezidan Ramkalawan avek Prezidan Rene. Ou war nou listwar dan sa pei la i bezwen ganny re kale, re met an mars.

Pe fer krwar zot sen, SPPF en demon. I annan dimoun pe vann lenformasyon, vann lenformasyon ek Minis la Defans depi zot ti *Seychelles College*.

Prezan zot gele, gran defanser bann ki'n al an egzil. Be i annan dimoun ki ti al an egzil an rezilta direk lenformasyon ki zot ti vann avek Minis Ogilvy Berlouis. Mwan nou de, defen Minis Berlouis nou'n mars ansanm, in fatigue akont mon sa bann keksoz.

So, li zot rezenbe laba kot zot ete, li laverite pou sorti. Mwan mon pa ni pe vin asize pou maltret zot, mon pou koz lo bann fe. E bann fe ki mon konnen zot pa pou kapab reziste. Mon pou koz lo fe, mon pou koz lo laverite, mon pa bezwen maltret dimoun mwan.

Be selman, kondisyon lavi Lepep Seselwa i bezwen amelyore, i bezwen ganny aranze, sa i kler. Ozordi nou ganny dir ki en Minis i ganny li R42mil, apre *tax*. Ouver lizye bel, pou dir nou sa, R42mil apre *tax*. Mon ti krwar lizye i sape dan fron!

HON JOHAN LOZE

400poursan pli o ki sa R10mil ki nou, nou fer. Be eskiz mwan, nou ki'n met R42mil pour

Minis? Oule dir mwan konman Prezidan Herminie in antre la in met R42mil apre *tax* pour Minis?

Non. Zot ki ti mete. Zot ki ti mete e zot pa ni ti fer okenn zefor pou fer pansyon vin R10mil. Ofet zot pe reziste, zot pe rezenbe, zot pe lager kont tou Minis ki vini, zot pe bat lake kont sa.

So, R42mil alors Minis i gannyen apre *tax*, *good to know*. La lepep antye i a konnen. *Next time* ler nou bat nou zab la, nou devret konnen ki nou dir, nou a *remember*.

Alors i 400poursan pli o ki sa 10mil ki nou'n propoze. Be granmersi nou'n vini nou'n propoz 10mil, i zis 400. Akoz la mon krwar i pli o ki 400poursan la, si 10mil pou fer li vin 400poursan? E zot, zot ti *happy* avek mannyer ti ete zot. Zot pe koste *along* san okenn problem.

Madanm Speaker, mon krwar nou bezwen en pti pe *mindful* keksoz ki nou dir de fwa. Akoz ler nou pa *mindful*, nou ganny repons e souvan repons i fouy pli fon ki nou espekte i pou ale. Mersi Madanm Speaker.

MADAM SPEAKER

Nou ava pran 2 dernyen entervenan. Onorab Hoareau apre Onorab Aglae.

HON JOHN HOAREAU

Mersi Madanm Speaker. Bonn apre midi tou dimoun ki a lekout.

Ozordi ler mon'n ekout ansyen Onorab Cosgrow, mon'n demann li en kestyon ki mon krwar in atrap li en pti pe *off guard*. Mon'n demann li premyerman aköz zot pe- zot in promet pou zot *repeal the 10th Amendment*? Mon'n demann li si zot annan okenn *mechanism* pour arestasyon lo lanmer?

Repons ki li in donn mon ozordi, se ki ti annan en mekanizm avan, me zot pou fer sa lamannman aköz zot pa le vwar larme lo semen. Me les mon ava dir li en keksoz, parske mon fer en pti pe resers lo sa size.

Konstitisyon Lartik 162, 63 i donn nesans pour en *Defence Force*. E tou dilon in annan en *Defence Force*, in napa en *Coast Guard Force*.

Anba *Defence Force* ti annan *Navy*, *Seychelles Navy* ki ti oule sa *navy* li menm in ganny transformen an en *Coast Guard Force*. E apre ki *Coast Guard* – nou'n fer provizyon ki *Coast Guard* i ganny *power* pour li anba *Cap 58* pour li

perform duty lo delo, pou li *apprehend*, pou li *arrest* e pou li pran *custody*. Se la ki *Coast Guard* legalman i kapab fer sa louvraz ki i pe fer ozordi.

Setadir pou aret trafikant lo *grande mer* pou *apprehend* bann droger *grande mer*, pou fer sir ki napa trafik imen e pou fer sir ki napa trafik *small arms* e *illegal fishing*. Oparavan ti napa en mekanizm *per se* pour ki sa arestasyon i kapab ganny fer dapre Lalwa.

Les mon ava lir zot ki Lalwa i dir, Lalwa i dir koumsa: - *“the power is conferred by sub section (1) and (2) shall be for the purpose of enforcement of Seychelles Maritime Laws, Maritime Security, Maritime Safety and Maritime Resources Protection”*.

E ler nou pe get anba (1) and (2), ki i pe dir par anba (1) and (2), i pe dir nou koumsa poudir *“the Coast Guard* anba (2) i dir nou - nou ava al anba (1) avan.

I dir nou *“the Coast Guard shall be - shall subject to provisions of this Act”* savedir setadir, *Coast Guard* aprezan i kapab pran serten travay anba sa Act ki sa *Act of Defence Force*.

E pli tar anba (2) i dir nou koumsa ki *“the Coast Guard and each member of the Defence Force assisting in operation*

without derogating from the investigatory or law enforcement powers of the police or other authorities”. Apre i donn ou tou diferan fason ki i kapab *exercise* sa bann *powers*.

Mr Speaker -(sorry)- Madanm Speaker, ozordizour nou'n kapab - nou'n dekouver an 2020 poudir ti annan en *loophole* dan sa Lalwa ki ti fer li en pti pe enkonsistan avek travay ki ti pe ganny fer anba *Defence Force Act*.

So, se sa ki nou ti enkli *Coast Guard* pou kapab annan sa lafors, sa lotorizasyon pou fer sa bann arestasyon dan *grande mer*. E Lalwa tou dilon i dikte sa i fer sir ki *Coast Guards* i kapab ganny sa *power* pou li kapab *arrest*, *apprehend* e fer lezot keksoz. Se sa ki ti donn nesans si oule en pti pe sa 10enm Lamannman.

Me par kont i vre ki serten keksoz dan sa 10enm Lamannman, par egzanp Lafors Lapolis lo semen, petet sa morso i kapab ganny reviz-Lafors Defans lo semen avek lapolis petet sa pti morso i kapab ganny revize. Me selman, an gran mazorite, sa Lalwa pe koz lo *Coast Guards*. Lo fason ki *Coast Guards* i kapab antreprann son louvraz.

Madanm Speaker, mon krwar poudir i enportan ki ler

nou pe koz lo Lamannman, parey Parti US i dir zot pe anmenn sa bann lamannman, i enportan ki nou prevwar ki kalite mekanizm nou pou met an plas.

Si nou pa'n *thought through* sa *process*, zis nou zis anvi ale pou tir en bout Lalwa, i pou riske fer ki demen nou *Coast Guard* pa pou kapab fer sa louvraz ki zot ti pe fer lo *grande mer*.

Alor, mwan dan sa ka mon pa pou donn mon laprouvasyon pour Mr Cosgrow vin Minis, aköz mon krwar in *fail* nou lo en serten nivo pou li vwar ki sa bann lamannman ki zot in propoze dan sa kontra sosyal parey zot dir avek Lepep, poudir napa *follow through*. I pa'n ganny byen kalkile. I pa pe anmenn sa benefis parey zot, zot pe dir i pou anmenn. Mersi.

MADAM SPEAKER

Onorab Aglae.

HON EGBERT AGLAE

Mersi Madanm Speaker. Mon pe pran laparol la apre midi e mon anvi entervenir lo sa ki dernyen enterven an in koz en pti gin lo la, ki i osi konfize dan sa ki in dir.

Sa ki *United Seychelles* ti fer resorti e i dan manifesto, se

ki i pou revwar sa 10enm Lamannman kot ti permet annan larme pou vin lo semen. 10enm Lamannman ti ganny fer an 2022. *Ok. 2022.*

Lamannman dan *Seychelles Defence (Amendment) Act* ti ganny fer 2020. E 2020 la, la bann provizyon ki ti ganny amande dan *Act*, kot ti donn *Coast Guard* Sesel pouvwar pou fer bann larestasyon maritim.

Al lir byen, al regard sa lamannman ki ti ganny fer dan *Act 2020* e lamannman Konstitisyon li 10enm ti vin 2an apre. So, napa naryen ki Onorab Cosgrow in vin la devan ki'n *mislead*. I zis zot fason enterpretasyon.

La prezan mon pou retourn lo size. Madanm Speaker, ou konnen parfwa sa ki bafwe mwan se mank serten lonnekte parmi nou parfwa, nou bann Manm.

E taler, atraver ou, Onorab Sathya Naidu, ki'n pres dan en fason mon kapab dir sa *togetherness*, nou dan *Members Lounge* ansanm, nou *meet* ansanm.

Me sa ki pa onnet ek son lekor i dir piblik Seselwa se ki i pa byen ek okenn sa bann Manm lot kote laba. I pa fer okenn konversasyon avek nou,

mwan, konpare ek bann lezot Manm lo son kote latab.

E in dir piblikman *on the mic* isi dan sa menm Lasanble ki li – i ti dir atraver Onorab Loze, i ti dir in fatigue e i ti menm dir ki li i pa fer fars ek personn.

So, avan ou pres en keksoz, annan en serten lonnekte, parey ou ti devret fer bomaten pou deklar ou lentere. La ou osi ou ti devret deklar ou lonnekte poudir ou pa koz ek okenn sa bann Manm pou al fer fars avek.

Madanm Speaker, mwan mon pe priye ki 2030 Onorab Sandy Arissol i retourn laba St Louis i debout ankor. Size ki enportan ki nou pe diskite lo la in fer en bann kantite letour. Zot in koz ziska lo later Parti US ki'n en size – zot in anmenn plizyer Mosyon, plizyer kestyon. In al devan ACCS. Napa ki zot pa'n fer.

E tou dernyerman avan Lasanble ti terminen, ti annan Mosyon pou pran *Maison Du Peuple* tou. Tousala zot in fer. Ok.

Letan mwan mon'n dan kanpanny, plizyer zenn ki mon'n koz avek zot dir ou zot pa enterese, zot pa ti la, zot pa konnen. Zot anvi en parti ki regard zot lavenir. Sa ki zot enterese avek. Pa bann lespri revanz ki zot ankor annan dan

zot lespri. E si ki dayer sanmenm sa ki bann zenn in dir non.

Nou, nou anvi en parti - e se sa ki nouvo *United Seychelles* pe fer. Get devan. Akoz Dokter Herminie ti pran labar direksyon *United Seychelles* apre sanzman 2020?

Tou sa bann propriyete ki US ti annan ti'n deza la li. E koman en *caretaker* ki'n pran labar, byensir sa bann propriyete i vin anba son sipervizyon.

E si in arive ki in ganny *disposed of* serten sa bann propriyete, ki anba Lalwa i permet okenn endividi ki *acquire property*, i kapab ganny *disposed of*.

E si sa bann antite osi ki'n fer sa bann *investigation* ziska prezan pa ankor kapab vin avek okenn fe kler ki in ganny vwar ilegalman, *so then why are we* – nou pe kontinyen bat sa kalite tanbour ki sa bann lazenes in dir nou zot pou nepli anvi tande sa zot? Nou bezwen *move on* lo sa bann direksyon.

Si nou kontinyen retourn 43an pase, e se dayer sa politik 43an pase ki'n fer zot al dan Lopozisyon ozordi.

TRNUC zot in servi depi 2018 an montan zot in anmennen, 2020 zot in ganny eleksyon. Oli rekour ki zot in

anmennen? Naryen. Oli sa bann lalis *perpetrators*? Naryen.

E letan mon'n tann, atraver ou *Mr Speaker, Onorab Naidu in dir fodre nou travay ek senserite. Travay pour sa pep.

Be depi 2020 ziska 2025, ou pa ti dir ou Prezidan sa fodre travay ek senserite, travay pour sa pep, lager la anndan, manda ki ou ti gannye pour ou fer? La ki ou anvi vin dir sa, aköz ler ou'n dan Lopozisyon? *Come on, let's be realistic.*

Mwan pour mon si demen dan fonksyon sa Gouvernman ki apel US i annan keksoz ki mon pa satisfè avèk, mon pou dir.

(laughter)

HON EGBERT AGLAE

Mon pou koz lo la - (Pa riye)-nou pou koze aköz zot, zot pa ti kapab dir naryen. Naryen zot pa kapab dir zot bezwen zis manz anndan, al koz deor laba.

Nou bezwen, parey Angle i dir, *practice what we preach*. E sa zenn *homme* ki'n vin la devan nou Onorab Cosgrow, mon pran li konman en koleg ki mon'n konn li en pe letan pase, e mon'n travay en pti pe anba son *leadership*, in demontre kapasite pour li *lead* en group dimoun. Ki fer ki san dout,

anba en Minister i kapab *lead* dimoun e delivre.

E san dout, parey mon ti dir avèk – lo lentervansyon Minis Alexander - mon kapab dir li Minis ozordi, sa ki'n pase 5an, 10an pase anba son *leadership*, in anmas ase leksperyans pou kapab konpran lo lafason ki en administrasyon i fonksyonnen. Ki mannyer pou fer zer en konportman e osi etabli bann bon relasyon avèk son bann travayer ki i pou responsab.

E mon demande ki i reste konnekte avèk son pep, son travayer a tou pri, pour ki bann konsern ki ganny met devan i ganny adrese e ki nou ava kapab delivre lo en manifesto ki'n byen prepare, parey in dir. Sa *manifesto* in byen kwi. Pa parey sa manifesto lavey lannen ki LDS ti vin avèk.

Nou manifesto in byen pirze, in byen benmyen e mon krwar sanmenm sa ki pep seselwa in swazir pour li elekte Gouvernman US. E nou bezwen fer sir ki sa ki'n antre dan sa *manifesto* i ganny delivre. Pa tou ki pou ariv deswit, me selman i ava ganny etabli e i ava ganny delivre.

So, avèk sa Madanm Speaker, mon napa okenn rezon aköz mon pa pou siport mon koleg Onorab Cosgrow ki'n

kapab delivre e anmenn sa parti kot in arive ozordi. Mersi.

MADAM SPEAKER

Onorab Lemiel.

HON SYLVANNE LEMIEL

Mersi Madanm Speaker. Bonn apre midi tou dimoun.

MADAM SPEAKER

En moman – *sorry*. Onorab Lemiel. Yes Onorab Naidu?

HON SATHYA NAIDU

Mersi Madanm Chair pour ou lendilzans. Zisteman anba *Order 59* mon le *raise en point of order for, “a member shall not use offensive expression or words”* – ou konnen Onorab Loze in dekrir mon lekspresyon poudir ‘konmkwa mon lizye pe al tonbe’. Mon krwar, ou menm ou pli boner ou'n koriz en Manm kot ou'n dir, pa bezwen servi sa term, aköz *it's unbecoming* e ou le elev standar Lasanble. Sa i enn.

Apre anba menm *order, “impute improper motive”*, mwan mon'n koz vizavi en sityasyon kot tou le de *Cohort – well* tou le de *Caucus* i dan en kantin. Mwan mon pa mind tenir en konversasyon live, vizavi byennet nou pei kot nou kapab ini, kot nou kapab tonm lo en *consensus*. Sa ki ariv an

deor, si Onorab Aglae i tenir en konversasyon ek mwan, mwan mon pare pour koz avek li. Kontrer annou tir en selfie taler nou a pibliye lo rezo sosyal, nou a montre poudir linite pour nou kapab bouz an avan. Mersi.

MADAM SPEAKER

Onorab Lemiel.

HON SYLVANNE LEMIEL

Mersi madanm Speaker. Madanm Speaker ozordi devan nou – premyerman enn mersi tou bann dimoun ki'n entervenir lo sa Mosyon e pour *interview* Mr Wallace Cosgrow ki'n vin devan nou ozordi apre midi. En zenn garson pour mwan, mon pour dekrir li koman en dimoun ki annan konpetans, en dimoun ki'n annan leksperyans dan travay en Minis.

E i ti enn nou kolegi isi dan 7enm Lasanble mon kapab dir. E i sa sel dimoun ki ti dan 7enm Lasanble ki Prezidan Herminie in *nominate* li pour vin en Minis. E Mr Cosgrow li menm i en legzanp li, i en legzanp en zenn ki'n travay dir, in etidye, in travay dir, e in kapab deservi koman Minis anba Prezidan Michel e osi anba Prezidan Faure.

Ozordi nou pe set aprozé *LDS* avek *US* dan sa 8enm

Lasanble kot nou, nou dir nou anvi annan sa travay ansanm kot nou, nou'n dir i annan sa linite, nou anvi i annan sa solidarite.

Enn nou frer ki ti sorti dan 7enm *Cohort* in vin devan nou, e mon krwar sa ti pour montre en legzanp solidarite ozordi, en legzanp kot nou ti pe montre sipor travay ansanm koman bann *colleague* isi dan Lasanble.

E ler nou pe fer sa, se ki nou donn sipor Mr Cosgrow aköz mon konnen atraver Mr Cosgrow, i annan bokou travay ki i pour kapab al fer pour li fer sir ki i met sa manifesto ki *United Seychelles* in travay lo la an fors e fer sir ki nou *achieve* tou sa bann keksoz ki dan nou manifesto.

Nou'n tann en pe deba lo 10enm Lamannman Konstitisyon, e pour mwan mon demande kekfwä ki sa i annan pour fer avek Onorab Cosgrow – Mr Cosgrow. Ou konnen nou tou nou konnen Madanm Speaker poudir nou pour bezwen 2 tyer isi dan sa Lasanble pour nou fer okenn amannman ki annan pour fer dan Konstitisyon.

E nou isi lo sa kote latäb, mwan mon'n dir nou pour diskite, nou pour zwenn avek *LDS*, pour nou diskit tou bann

amannman ki nou santi, annan pour fer e nou pour bezwen sa travay ansanm.

E mon espere ki letan nou zwenn nou koze, nou diskite, ki nou kapab tonm dakor aköz mannyer Lasanble i ete ozordi, wi nou napa 2tyer, wi nou an mazorite, me mon *believe* dan sa konsiltasyon dan sa fason koze, e dan en bon fason travay.

E avan mon fini, le 27 Septanm Lepep Seselwa zot, zot ti elekte sa Lasanble Nasyonal ki la, in donn pouvwar *US* e *LDS* in trouv li dan minorite. E nou, nou tou ki la koman Manm Lasanble elekte pour en distrik, proporsyonnel nou Manm Lasanble, nou la pour nou fer sir ki nou fer sa Egzekitiv ki pe al met dan *Cabinet accountable* e nou pour bezwen fer sa byen as Lasanble.

E osi Madanm Speaker, nou vwar ki le 11 Oktob, Lepep Seselwa ti donn Mr Patrick Herminie 52.7poursan vot e atraver sa manifesto in dir ki in donn li sa manda, pep Seselwa in donn li sa manda, avek sa manifesto ki'n al avek devan Lepep Seselwa. E i pour bezwen fer sir, ki Lasanble Nasyonal nou pour bezwen debat pour nou gete ki mannyer, ki sa manifesto li menm i pour kapab enplimante, fer sa bann Minis vin *accountable* lo san menm sa

manifesto ki bokou nou bann koleg Manm Onorab LDS in *refer to* letan zot pe kestyonn nou bann diferan – nou bann diferan kandida ki'n ganny propoze pour vin Minis.

E nou pour ganny sa sans osi pour nou servi sa bann menm manifesto pour nou kestyonn sa bann Minis letan zot pour vin la devan nou konsernan sa bann promes, bann *pledges* ki zot in mete ladan pour nou fer sir ki zot pe enplimant li.

Lasanble Nasyonal nou, nou pour bezwen met an plas bann *framework* Lezislativ li menm e pour nou fer sir ki Gouvernman dizour, sa bann Minis ek Prezidan zot vin *accountable*.

So, ozordi apre midi mwan mon santi ki - e mon trouve nou'n annan devan nou en zenn profesyonnel ki annan pasyon e ki'n pare madanm Speaker, pour li anmenn sa manifesto devan e pour li fer sir ki son Gouvernman e Gouvernman dizour i akonpli tou sa bann keksoz ki dan sa manifesto.

So kestyon ki reste alors devan nou la, se eski Mr Cosgrow i konpetan? Eski Mr Cosgrow pour kapab fer sa travay? Eski i annan sa konpetans? Pour nou i wi. Alors mon pour demann tou mon

bann koleg isi, pour nou donn Mr Cosgrow sa sipor e aprouv son nominasyon koman Minis dan sa nouvo *Cabinet*. Mersi Madanm Speaker.

MADAM SPEAKER

Mersi Onorab Lemiel, nou ava prezan pas lo vot lo Mosyon.

In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Mr. Wallace Jude Keith COSGROW to the office of Minister. Bann Manm ki vot pour Mosyon? Mersi. Okenn Manm ki vot kont? Mersi. E alors ki Mosyon la apre midi in pase avek 17 vot pour 2 ki'n vot kont avek 11 ki'n *abstain*.

Avan nou pran en *break*, mon ti a voudre adres en *issue*. Detrwa zour pase mon ti dir avek en zenn zournalis ki mon pa la dan pos Speaker pour mwan *curtail* okenn deba dan Lasanble, apre tou mon ti eksplik li ki Lasanble i landrwa kot - i en *forum* politik, *ok*.

So bann deba politik pour arive me selman mon osi pa la pour toler bann aksyon ki *disrespectful* e mon pour santi ki si mon pa adres sa i pour en *disservice* pour bann madanm sirtou aköz mon pa pour mansyonn non sa Onorab ki'n

fer sa taler, si ti en zonm ki ti pe asiz la dan Chair, zot pa ti pou'n fer sa e i pa *ok* pour fer sa.

Si i ariv ankor, si mon bezwen *name and suspend that's what I will do*, si zot bezwen mon latansyon zot lev lanmen. Nou ava revwar nou *Standing Orders* si fodre ki nou kapab enplimant teknolozi, ki pour anmenn a latansyon Speaker bann dimoun ki anvi koze, bann Manm ki anvi koze. So avek sa nou ava pran en *break*, ziska 4er 40.

(BREAK)

MADAM SPEAKER

Bon nou ava pran dernyen Mosyon ozordi. Onorab Lemiel.

HON SYLVANNE LEMIEL

Mersi Madanm Speaker. Bonn apre midi tou dimoun a lekout. 8tyenm Mosyon pour ozordi i lir konm swivan:-

In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Ms. Marie-May Alice JEREMIE to the office of Minister. Thank you.

MADAM SPEAKER

Onorab Gill.

HON CHURCHILL GILL

Mosyon i ganny segonde. Mersi.

MADAM SPEAKER

Mon ava demann sekretarya pour fer Ms Jeremie antre dan *Chamber* e antretan nou ava konstitye nou dan *Committee Stage*.

Bonn apre midi Ms Jeremie. Mon ava demann ou pour fer en prezantasyon pour nou bann Manm.

MS MARIE-MAY JEREMIE

Mersi. *Ok*. Mersi Madanm Chair. Bonn apre midi Madanm Chair. Bonn apre midi tou bann Manm Onorab. Bonn apre midi osi pour tou bann dimoun ki pe ekout nou an se moman. Avan ki mon komanse mon ti a kontan felisit zot tou pour zot nouvo lapwentman.

I en tre gran loner pour mwan ganny sa loportinite pour adres zot ozordi e pour prezant mon kredansyel devan Lasanble.

Mon prezant mon leskiz avan ler ki mon al plis aköz mon enn pti pe an rimen ozordi, me mon espere ki i pa pour anpes mwan pour mwan prozekte byen pour zot kapab konpran mwan.

Mon apel Marie-May Alice Jeremie, mon aze 38an. Mon en kretyen mon sorti dan en

fanmir 2 zanfan, byen *humble* me ranpli avek lanmour. Mon'n ne e grandi dan distrik Mont Fleuri e ozordi mon en zabitan distrik Baie lazare.

Mon'n konplet mon ledikasyon Lakres ziska segonder Mont Fleuri. E apre mon'n pourswiv en *course* avanse kot Lekol *Polytechnic*, dan bann size lasyans e zeografi a nivo *A Levels*.

Apre sa mon'n kalifye pour en Labours avek Gouvernman Sesel, kot mon ti ganny loportinite pour al *Perth*, Ostrali kot mon'n kapab etidye mon premye Degre dan Lasyans Biolojik ek en Spesyalizasyon dan Konservasyon.

Apre sa mon'n retourn Sesel e i la ki mon ti komans mon karyer dan Minister Lanvironnman. Mon'n komans koman en zofisye proze dan konservasyon, kot mon ti travay lo *field*, dan resers e apre mon'n progrese dan diferan seksyon e divizyon ziska ki mon ti ariv nivo direkter.

An 2014, mon ti ganny en Labours avek Gouvernman Ostralyen e la ki mon'n al fer en *Masters* dan Lanvironnman, e kot mon'n ganny sans pour spesyaliz dan Soutenabilite Lekonomi Lanvironnman e Zesyon Resours Natirel.

An 2016 mon ti ganny apwente koman Direkter Zeneral Divizyon Konservasyon ek Lamenezman Lanvironnman ki ti enkli Lafore. En pozisyon ki mon ti okipe pour 6an, ziska 2022. An total mon ti'n fer 12an dan Gouvernman letan ki mon ti sorti.

An 2022 mon ti zwenn *SeyCCAT* en Fon Lanvironnman ki siport bann program konservasyon e sanzman klima, koman son Sef Egzekitiv e sa i sa pozisyon ki mon ankor pe okipe a tan aktyel.

Kot *SeyCCAT* mon'n ganny ekspoze avek finans, zesyon en lorganizasyon ki pe *deal* avek plis ki \$25milyon kolektivman, lenvestisman e travay an partenarya avek bann gran lorganizasyon enternasyonal.

Apard ki mon bann lanplwa formel, mon osi annan bokou bann travay afilye ki mon'n fer avek bann NGOs ek lorganizasyon konservasyon, Sesel, dan larezyon e osi enternasyonalman.

Mon annan en tre gran pasyon pour ki mannyer Sesel i kontribye e reste angaze dan bann proses enternasyonal ki bokou fwa i anmenn kredibilite ek resours finansyel pour nou pei.

Mon'n travay for letan mon ti dan Gouvernman, e menm dan mon letan personnel apre ki mon ti'n fini kit Minister pour travay lo bann Polisi enternasyonal, dan bann Trete e Konvansyon ki annan pour fer avek konservasyon biodiversite, sanzman klima e lamenezman nou bann resours losean, ziska menm lo nivo Nasyon-z-Ini.

Depi 2022, mon osi Prezidan en lasosyasyon rezyonal tre prestizye apele WIOMSA, ki baze lo lasyans ek resers ki siport zesyon bann landrwa lamarin e *côtière* dan 10 pei dan was Losean Endyen.

Annefe mon fek ganny re-apwente pour en dezyenm term koman Prezidan zis detrwa semenn pase. Mon'n servi lo detrwa *Board*, parastatal e non Gouvernmental tel ki Lazans Lagrikiltir, Fondasyon Zil, Lotorite Park e Zarden, *SEYPEC* e lezot.

Mon'n osi reprezant Lafrik e larezyon lo bann Komite teknik e stratejik. Mon'n osi reste aktiv dan bann travay direk, sa ki nou dir bann *field work* pour mwan reste konekte avek lanvironnman Sesel, ki reste mon vre pasyon e misyon.

Mon en dimoun ki travay ekstrememan dir e mon karyer profesyonnel in enn ki'n ganny

fonde lo lentegrite e bokou prensip.

Pour bann ki konn mwan, zot konnen sa ki mon pe koz lo la. I enkli bann prensip, rann kont, travay lekip e enklizivite, respe, rekonnet e *empower* bann dimoun otour mwan.

Mon'n travay avek bann zean dan Sekter Lanvironnman Sesel, e mon la kot mon ete ozordi aköz sipor ek soutyen ki mon'n gannye avek zot. Mon fanmir, mon bann koleg e tou bann zanmi pros ki'n la avek mwan ziska ozordi.

Mon krwar ki avek bann pozisyon ek louvraz ki mon'n fer pandan sa plis ki 15an, mon annan sa bagaz pour sa nouvo responsabilite ki'n ganny prezante devan mwan avek Prezidan Larepublik e ki mon'n aksepte.

Si zot met zot konfyans dan mwan e apwent mwan en Minis. Mon donn mon komitman ki mon pour travay pour mon pei e pour Seselwa. Mon pour aret la, an term prezantasyon e mon pare pour mwan reponn bann kestyon ki bann Onorab i annan pour mwan. Mersi Madanm Chair.

MADAM SPEAKER

Mersi Ms Jeremie nou a pran bann kestyon Onorab Naidu.

HON SATHYA NAIDU

Mersi Madanm Chair. Bonn apremidi Ms Jeremie, bonn sans dan sa parkour ki ou pe al angaz ou ladan, pour kontinyen reste o servis ou pei avek ou pep.

Zisteman nou tou nou konnen lalyann anvaisan i en konsern Nasyonal i baze lo ou lekspertiz ki ou annan. *What do you think* ouswa kwa ki ou santi i devret *the way forward* pour nou en fwa pour tou sey trouv en solisyon ki pour marse pour nou kapab fer sir ki nou bann touris i desann Sesel i kapab apresye nou lanvironnman, ki a en serten pwen nou bann zenerasyon avan in ganny sans eksperyanse? E ozordi wi, byensir Sesel i zoli me selman nou konnen poudir la deor i annan en pwen konsern.

Dezyenmman lo size *Environmental Levy*. Ladministrasyon dizour anba direksyon Dr Patrick Herminie, in santi en nesesite pour retir sa *levy*.

E mwan mon le konn ou pwennvi, aköz avan ler nou in entrodwir sa *levy* i ti avek lentansyon pour itiliz sa sonm pour kapab servi vize ver bann travay ki konsern *coastal management*? Mersi.

MS MARIE-MAY JEREMIE

Mersi Onorab pour sa de kestyon, mon mazine ki si mon ganny apwente pour Minis pour Sekter Lanvironnman. Wi lalyann anvaisan i enn bann problem ki pe persiste pour en kantite lannen.

E sa ki mwan mon konnen e letan mon ti ankor dan Minister i ti enn bann keksoz ki ti tonm anba, anba mon portfolyo. Me toultan bann aksyon ki'n pran i pa bann aksyon ki'n dire.

Kekfwa nou komanse me i pa bann zefor ki ganny soutenir, swa aköz bann rezon finansman oubyen nou napa ase bann konseye teknik ki ti pe donn bann *advice* ki ase *sound* pour fer ki sa bann program i kontinyen.

E alor, mwan enn bann priorite mon mazine i se ki nou kapab fer sir ki letan nou pe komanse, toultan nou pa pare nou komanse.

Alor nou fer sir ki nou annan nou *homework*, nou annan bann sistenm ki nou pe met an plas, ki si nou pe deplway dimoun pour nou al komans travay avek lalyann anvaisan.

Menm parey en nenport lespes anvaisan si ou pour fer eradikasyon ou pe anvi tir li net oubyen ou pe kontrole fodre ki ou pe serye ladan.

E Alor mon pour fer sir ki si mon komanse, nou bezwen fer sir ki nou kontinyen, nou met resours ladan, pour li kapab al byen. E osi ki nou bezwen enkli, bann lezot dimoun an deor.

I en proze ki pa pe kapab ganny fer selman par Gouvernman, i pour bezwen siport tou bann dimoun ki annan later prive kot zot, ki zot osi zot a dan sa program. Akoz si nou'n tire enn fwa, i komans vini nou tou nou bezwen donn koudmen pour nou kapab *deal* avek.

E apre osi en keksoz ki kekfwa mon'n remarke dan sa bann dernyen lannen i kekfwa nou pa ti pe donn tou sa latansyon avek zesyon nou bann lafore. E sa i en sistenm ekolojik ki mars ansanm.

E si nou pe komans fer sa bann travay, nou bezwen fer sir ki nou pe fer restorasyon, reabilitasyon nou lafore e anpese ki sa bann keksoz i ganny reentrodwir atraver bann mezir ki nou pour met an plas. E alor mon krwar ki si nou komanse, nou fer li byen i pour marse.

Dezyenmman an term *environmental levy*, sa i en kestyon ki mon ti pe ekspekte kekfwa ti kapab monte aköz sa *Tourism Levy* i enn ki'n ase

contentious letan ki in ganny met an plas.

Parey i ete dan bokou lezot pei i egziste en mekanizm parey. Me selman keksoz ki kekfwa i diferan avek pour nou isi Sesel i kekfwa bann mezir *accountability* kot nou kapab *trace* byen kwa ki sa larzan pe ganny servi.

E alor dan bann lapros ki'n ganny mete atraver sa enn Gouvernman i se ki zot pour revwar. Nou bezwen revwar ki mannyer pour fer sir ki sa i mars byen e si i pa pe mars byen mon mazine en desizyon responsab pour bezwen ganny pran lo la.

Be selman parey mon pe dir, baze lo mon bann leksperyans ek bann resers ki mwan mon'n fer, bann landrwa kot sa bann sistenm in mars byen, i bann landrwa kot sa bann sistenm in mars byen i bann landrwa kot zot in annan bon *accountability*.

Kot tou le mwan, tou le *quarter* zot pe *release* bann rapor ki i dir ou poudir tel kantite larzan in ganny anmase e in ganny servi pour tel ou tel rezon.

E alor bann dimoun ki pe kontribye atraver sa *levy* i war kote son kontribisyon pe ale. E dan sa bann lenstans ou menm kapab *even increase* sa kantite

ki ou pe sarze. Me selman i bezwen ganny fer byen. Mersi.

MADAM SPEAKER

Onorab Trevor Louise.

HON TREVOR LOUISE

Mersi bokou Madanm Chair. Bonn apre midi Ms Jeremie. Felisitasyon lo ou nominasyon, nou tou nou konn ou koman en dimoun ki travay dir e ou en spesyalis dan ou *field*.

Mon annan 2 kestyon pour ou. E mon premye se nou'n tann bokou leokri pandan sa dernyen lannen an term bann proze ki'n ganny fer ki pa'n forseman annan respe pour sa laspe konservasyon. *Ok* par egzanp si nou get *Canopy*, nou'n war Assumption in monte detrwa fwa osi. Ki mannyer dan ou lopinyon eski nou balans devlopman avek konservasyon?

E mon dezyenm se, ki bann mezir ki ou santi i devret ganny met an plas pour asire ki nou met enn pti plis lanfaz lo proteksyon lanvironnman e konservasyon? Mersi.

MS MARIE-MAY JEREMIE

Mersi Onorab pour sa 2 kestyon. Konservasyon e devlopman i toultan ganny vwar dan en sans konmsi kot zot pe antagonistik, kot zot pa *gel*.

Be mwan mon en *conservation biologist by trade*. Me selman mon'n travay bokou atraver bann polisi. E mwan toultan gidans ki mwan, mon donnen e se ki nou bezwen toultan pran en lapros prekosyon.

En lapros prekosyon enn aköz ou bezwen fer sir ki ou pe swiv bann norm ek bann Lalwa ki'n ganny met an plas pour fer ki bann keksoz ek bann desizyon pe ganny fer dan en fason ki byen e ki an tou sans pe protez nou lanvironnman, kont bann aksyon ki *irreversible*.

Bann aksyon ki nou pa pour kapab pran an retour e ki pour annan bann domaz permanan. E alor mwan mon lopinyon personnel i se ki dan bann lenstans, kot bann lenstans kot bann devlopman ki pe vini, i pe *compromise* nou abilite pour nou prezerv lanvironnman dan le sans ki nou pa pour kapab *take it back*.

Dan sa bann lenstans ou pran bann aksyon ki pli ki annan plis prekosyon. E alors si savedir ou pour fer ou *risk assessment* e dan sa lenstans kot si keksoz pa donn ou sa reasirans ki i pour al byen. E alor la ou pour bezwen fer sir ki ou redres sa.

Dan lesans ki parey nou annan sa bann lotel, ki'n vini, nou annan *Canopy*, nou annan Assomption ki bokou diskisyon e deba in ganny fer lo la. Mwan mon krwar ki dan sa lenstans i bon pour nou pran en stok arete, regarde kot nou ete.

Epi la nou ava kapab deside baze lo bann fe ek bann keksoz ki nou pour kapab montre ekrire an ekrire e syantifik pour nou dir *ok* sa proze son bann lenpak nou kapab viv avek i pa pour en lenpak permanan.

Par egzanp lo Aldabra ki enn nou bann zil pli presye ki nou annan dan nou pei. E alor la *from there*, ou a kapab dir *ok moving forward* sa i bann *set of actions* ki nou pour pran.

Me toultan mwan mon lapros e si ki ou napa ase lenformasyon pour ou pran bann desizyon ki ase prominan e ki ase signifikan dan son lenpak, i bon pour pran bann lapros prekasyon.

E mwan mon'n toultan krwar poudir konservasyon i reste de baz tou sa ki nou fer isi Sesel. Nou lanvironnman i form *the basis of* tou nou bann lendistri e nou bann sekter ki pe anmenn plis reveni pour nou, nou lapas nou *tourism* e alor i toultan i sipoze ganny

mete dan tou bann desizyon devlopman ki pe annan dan pei.

E sa i pour en lapros ki mon pour kontinyen anmenn menm si la mon pour ganny apwente, si mon ganny apwente koman en Minis i sa ki mon pour anmenn dan Konsey Minis pour fer sir ki toultan i annan bann rezonnman ek bann desizyon ki ganny fer avek responsabilite. Mersi.

MADAM SPEAKER

Onorab Labonte.

HON ANDY LABONTE

Mersi Madanm Chair. Bonn apre midi Ms Jeremie. Bon mon pour felisit ou pour ariv la, en nouvo figir, en zanfana Sesel e mon apresye ki ou la.

So mon annan de kestyon selman i mars kot a kot. Premye kestyon se ki wi Sesel i zoli natirelman me selman i annan bokou ki reste pour fer. So eski an term zesyon salte li menm, li ler mon pe dir zesyon salte, ki ou plan petet pour edik en pe plis nou pep pa selman kot *landfill*, me plito zanfana lazenes menm adilt ki lafason ki nou zer nou salte kot nou, nou kapab pe pase zis nou zete deor? So ki ou plan vreman dan sa laliny koumsa?

Apre dezyennman se *beautifcation*. Ou konnen nou

annan zoli plant Sesel, me petet ki fason ki ankouraz nou pep, nou popilasyon petet pour servi en pe nou bann *flora* ki nou annan, pour nou kapab dekor nou lavil e nou peizaz li menm li pour fer touris vreman pli apresye nou pei li menm li mersi.

MS MARIE-MAY JEREMIE

Ok mersi Onorab. Premye lo zesyon salte. Sa i enn bann *issue* ki reste pli prominan dan Sekter Lanvironnman aköz tou le lannen parey zot okouran bann Onorab bokou resours finansman i ganny mete pour nou kapab zer salte dan nou pei swa i pour *management of landfill*, koleksyon salte e tou sa.

E alor i toultan enportan ki pep Seselwa osi i ganny konpran bann mezir ki en Gouvernman i pe met an plas e aköz ki i pe met an plas. E alor ledikasyon i vin enn bann pwen kle pour fer sir ki dimoun i kontinyen reste angaze e donn Gouvernman sipor pour zot kapab fer sa.

Me selman ledikasyon tousel pa pour ase. Parey nou'n kapab war aköz toultan ou bezwen rekonmanse.

Nou'n fer sa bokou letan mon ti dan Minister, mon ti travay ek bann koleg ki ti pe

travay dan ledikasyon piblik, e toultan zot ti bezwen rekomanse ek bann nouvo group zanfàn e menm piblik pour gete ki mannyer pour enkli zot dan bann programm zesyon salte.

Alor si mwan mon vin Minis ki pour pran sa portfolyo, mon pour travay an *close* partenarya evidaman ek bann dimoun ki pe travay dan sa lazans e osi bann lezot dimoun ki pe travay dan sekter prive, pour gete ki mannyer zot osi zot kapab vin kontribye.

Mon konnen ki annan bokou bann pratik, bann bon pratik ki annan dan sa sekter me selman i annan fason ki nou, nou kapab fer pli byen.

E dan manifesto sa Gouvernman nou koz lo bann keksoz parey *waste to energy*, savedir pour servi salte koman en resours ki kapab prodwi lenerzi. E osi pour rod bann lezot fason pour nou redwir salte ki antre lo *landfill*.

Parey zot konnen nou'n ganny bokou sa bann dife *landfill* dernyerman aköz ki mannyer *landfill* pe ganny *stack*, bann salte i bokou, i melanze.

E alor i annan potansyel pour fer enn pti pe pli mye dan sa fason ki nou pe travay. E alor sa i enn bann keksoz ki mwan

mon ti ava kontan pous devan si mwan mon ganny sa portfolyo.

Dezyenmman lo laspe *beautification*. En kantite fwa letan nou koz lo bann laplant Seselwa. La mon met mon sapo konservasyon. Nou mazin bann zoli plan, bann plant aflere me sa i pa toultan bann plant natif ki egziste Sesel.

E alor si nou pe koz lo *beautification of* Sesel avek bann plan andemik i pour annan bokou ledikasyon osi ki nou pour bezwen fer avek dimoun.

Akoz nou napa tro bokou bann plant ki *occur* natirelman Sesel ki pour aflere, ki pour anmenn anvil. Be selman, nou kapab servi sa koman en loportinite pour anmenn ledikasyon pour piblik lo sa bann plant ki kekfwa zot, zot pa okouran.

I annan bann lorganizasyon ki prodwi bokou bann plan andemik e ki zot kapab servi osi pour anmenn dan lavil e alor sa i en lespas ki kekfwa ti ava bon pour nou eksplote. E alor mon ava gard sa antet. Mersi.

MADAM SPEAKER

Onorab Toussaint.

HON JEAN TOUSSAINT

Mersi Madanm Speaker. Bonn apre midi. Bonn apre midi Ms Jeremie, bonn apre midi tou Manm e tou ki pe ekout Lasanble.

Avek vast leksperyans ki mon konstate ou annan dan lanvironnman, konservasyon e sirtou bann polisi ki ou'n ganny sans travay lo la ansanm avek bann lezot koleg, lokal, enternasyonal.

Mon konsern i plizoumwenn lo sa laspe lakot nou bann distrik, kot souvandfwa i annan, i annan lanmar, i annan linondasyon e mwan mon ti a vreman kontan konnen ki ou plan, *or* mon prezimen ou pour ganny sa portfolyo Lanvironnman?

E ki plan konpreansiv ou ti pou vin avek pour kantmenm pa rezourd problem linondasyon, me omwen amenaz li pli byen e limit domaz ki kapab ganny fer avek propriyete nou bann dimoun, nou bann zabitan ki viv lo lakot.

E la osi mon ti a kontan pran kont or osi koz en pe lo amenazman sirtou bann lanbousir. Mersi bokou.

MS MARIE-MAY JEREMIE

Ok mersi. So i paret ki zot konvenki ki sa portfolyo i kapab vin pour mwan. Definitivman ou tous lo en pwenn ki vreman

serye an term sanzman klima ek bann lenpak ki pe annan lo nou bann lakot isi Sesel koman enn Pti Leta Zil. E nou konnen poudir domaz avek lerozyon i enn ki ase prominan sirtou dan bann distrik parey tel ki ou sorti.

E alor dan plan i pour fer sir ki nou vin en pei ki rezilyan. I annan bokou bann letid ki'n fini ganny fer pour detrwa lannen la, ki'n met bann rekomandasyon an plas ki pe dir nou poudir dan serten, dan sa detrwa lannen ki pe vini i annan bann aksyon ase vitman ki fodre nou pran pour nou kapab adapte.

E sa i vin avek en kou finansman ki ase sibstansyel. Mon mazine *World Bank* i donn bann *figures* apepre \$700milyon pour nou kapab fini fer adaptasyon avek sanzman klima.

E alor koman enn bann aksyon kle i pour bezwen rod lafason pour nou anmenn finansman otour sa size. I annan bokou mekanizm finansman ki egziste me ki Sesel i bezwen rod en fasin pour li kapab *tap into*.

E sa kekfwa i pour enn bann aksyon priyoriter ki mwan mon pour rekomannde avek Gouvernman ansanm avek bann lezot koleg Minis. Lo ki

manner nou kapab kekfwa anmenn sa bann resours pour fer pour nou kapab bouze avek lamenezman nou bann landrwa *côtière*. E sa i pour tous tou le de lerozyon ansanm avek *coastal flooding* ki mars *hand in hand* avek sa *sea level rise* e osi lerozyon.

E sa mon mazine i pour ed nou osi pour nou kapab protez lenfrastruktir, protez propriyete bann dimoun e osi byen restore bann ekosistenn e sa bann servis ki anmenn pour nou lakot aköz i annan landrwa ki vremen, vremen ganny andomaze bann mangliye tou sa ki tonm lo lakot zot vremen pe soufer e alor sa pour ed nou.

Akoz Sesel i annan son *NDC* sa i bann komitman ki nou'n fer avek Konvansyon ki annan pour fer avek Sanzman Klima. E ladan nou'n deza etabli serten bann aktivite kle me selman fodre i annan *follow through and we get things done*. Nou pa zis kontinyelman koz lo la me ki nou kapab konmsi komans fer keksoz arive.

E mwan mon en dimoun ki en pe *headstrong* e mon konnen ki si mon pour met mon lespri ladan mon pour sey mon mye pour nou *at least* kapab *make some headway* dan sa size.

An term mangliye osi, bann landrwa kot i annan bann lanbousir, sa osi pour mars ansanm akòz labitid letan ou pou fer bann proze restorasyon nou pa pour fer li an pti morso ou fer li a nivo ekosistèm se la ki ou pour annan plis lenpak.

E alor i nesese pour fer byen sa bann letid, konpran byen e pran bann desizyon ki responsab ki pour *allow* nou pour nou *solved* detrwa *issues at the same time* e pli efektiv dan lafason ki nou pour servi nou bann resous pour nou fer sa bann aksyon. Mersi.

MADAM SPEAKER

Onorab Tirant.

HON COLIN TIRANT

Ms Jeremie, ler mon'n ekout ou mon'n lir ou CV, mon'n vwar poudir ou *very well verse* dan lanvironnman. Be mwan mon pour al enn pti git pli zeneral avek ou akòz vi ki mon tann ou pe dir ou krwar ou pour fini ganny aprouve vin dan *Cabinet* Minister mon ti a kontan demann ou.

Avek lentrodiksyon kart STC, lentrodiksyon URS, fer desann pri bis eksetera e bann mezir *welfare* Gouvernman pe al entrodwir eski ou san poursan konvenki ki sa bann mezir i realistik e soutenab? E

mon ti a kontan ou eksplik mwan rezon par deryer sa silvouple.

MS MARIE-MAY JEREMIE

Ok. Mersi Onorab pour ou kestyon enn pti pe pli zeneral lo sa bann laspe sosyal, ki enportan akòz en pei ki fer byen e ki epanouir i bezwen kapab anmenn sa kot son pep. E en pep ki prospere i en pep osi ki ed son pei pour al pli devan. Dan sa manifesto ki Gouvernman in anmenn devan i annan bokou bann mezir sosyal ki pe ganny propoze akòz nou pe met dimoun o sant bann polisi ki nou pe fer. Akòz ki sa i enportan?

Letan mon'n komanse mon'n koz bokou lo ki mannyer bann lezot dimoun i kapab ed en Minister pour li delivre, lo son bann travay. E en pep ki preokipe avek kou lavi, en pep ki preokipe avek ki mannyer i pour mentenir son dinyite i pa en pep ki prodiktiv.

E mwan mon santi ki si nou anvi bouz devan avek sa manifesto, si nou anvi bouz devan koman en pei, nou pour bezwen al en pe an aryer e fer sir ki nou pe anmenn tou dimoun avek nou.

I vre ki i pour annan bann kou an plis, ki pour vini lo en Gouvernman. Me selman mon

mazinen ansanm avek bann lezot koleg Minis nou pour pran bann desizyon ki responsab, mwan espesyalman lo mon konte mon pour fer sir ki mon pe ede pour pran bann desizyon ki responsab e ki pa pour anmenn pei an aryer me ki pour ede ki pour fer pei bouz devan e an menm tan pe anmenn tou son dimoun avek li avek dinyite. Mersi.

MADAM SPEAKER

Onorab David.

HON ROBERT DAVID

Mersi Madanm Speaker. Bonn apre midi e bonn apre midi tou Manm. Bonn apre midi tou dimoun ki pe ekout nou, apremidi ki pe swiv nou travay. Manmzel Jeremie mersi e *welcome to* Lasanble Nasyonal e felisitasyon osi tou pour ou nominasyon koman Minis.

E mon pe get dan ou CV mon'n war poudir ou'n swiv ou'n fer bann letid avanse kot Liniversite Melbourne *Australie*, kot ou'n *graduate* avek en *Master of Environment*. Apre ou'n swiv kot *Edith Cowan University* ankor *Australie* kot ou'n sorti avek en *Bachelor of Science and Biological Sciences*.

E letan mon gete mon war ki ou, ki ou parkour akademik i *drive* nou, i *drive* ou dan en

lespas lanvironnman avek konservasyon.

E si Lasanble Nasyonal i decide aprouv ou nominasyon koman en Minis. Ki mannyer ou kapab ede pour pli byen promouvwar e prezerv nou kiltir Kreol Seselwa? Mersi Mr Speaker.

MS MARIE-MAY JEREMIE

Mersi Onorab pour ou kestyon. Nou kiltir i nou lidantite, i reste enn bann keksoz ki vreman enportan pour mwan. Parey mon'n eksplike oparavan, mon'n en dimoun ki'n travay bokou avek bann lezot pei.

Sirtou dan larezyon e menm lo kontinan Lafrik e menm si nou sorti dan enn pti pei toultan mon prensip i pa aköz mon ptipti ki mon pour ganny oubliye.

E en fason ki mon fer sa i toultan koz mon lo mon kiltir, promot mon kiltir e *wear* mon paviyon Sesel fyerman. E sa i enn bann keksoz ki mwan mon pour promouvwar, toultan nou bezwen rod bann fason ki mannyer nou pour met nou pei a lavan e nou kiltir i enn sa fason ki nou fer sa. Nou bezwen rekonnet, nou fer sir ki nou bann zenn ki pe monte zot konn zot lidantite, zot konnen, lekel ki zot ete.

E letan zot penetre, bann platform enternasyonal ki zot kontinyen anmenn sa, i nou kreolite, i nou langaz - eski lafason ki nou kwi manze? Eski lafason ki nou danse? Eski i lafason ki nou koze, ki zot dir nou i melodye e ki fer bokou dimoun entrig.

Sa i bann keksoz ki mwan mon krwar nou kontinyen pous devan. E ansanm avek *whoever* dimoun ki pour pran portfolyo Kiltir mon mazine kekfw nou kapab fer bann lankadreman enn pti pe pli fonde, ki anmenn sa laspe lasyans ek kiltirel ansanm e ki fer ki zenn i konnen ki i ete e ki mars ek son kiltir devan. Mersi.

MADAM SPEAKER

Onorab Arissol.

HON SANDY ARISSOL

Mersi Madanm Speaker. Bonn apre midi Ms Jeremie e *welcome* dan Lasanble Nasyonal. Mon anvi demann ou kestyon an relasyon avek - mon'n tann ou koz bokou lo lapros prekosyon program konservasyon.

Mwan mon kestyon i pour al dan sa lalinye parske mon anvi ganny bann keksoz konkret avek ou. Premyerman mon anvi demann ou en kestyon an zeneral parske an vi

ki la nou annan en nouvo ladministrasyon avan nou ti annan Prezidan Ramkalawan ki ti la koman Prezidan.

E i osi en dimoun ki ti kontan bann zafer konservasyon avek prekosyon lanvironnman. So mon ti a kontan demann ou ki ti ou lapros travay avek li koman Prezidan e enkli *Cabinet* Minis anvi ki la ou pour annan en nouvo ladministrasyon relasyon travay an relasyon avek prekosyon e prezervasyon.

Dezyennman ou konnen dan sak distrik, dan sak distrik nou annan bann pti landrwa sansib dan nou distrik, kot zot biodiversite i sansib.

E nou bezwen vey bann lanvironnman e Sesel nou annan en kantite bann NGO ki vey byen sa bann pti detay sirtou ler i annan bann konstriksyon.

So, mon ti an vi ki nou annan osi later i limite ozordi, Sesel so nou bezwen pran prekosyon an relasyon avek kote nou fer bann konstriksyon.

Be mon anvi demann ou zisteman par egzamp lo bann sit ki nou annan dan bann distrik, les mwan mazin par egzamp annou dir Grand Bois Anse Boileau kot i annan en landrwa sansib.

Ki ou panse dan bann konstriksyon dan bann tel landrwa e osi dan bann lezot distrik an relasyon avek konstriksyon letan nou annan sa bann landrwa sansib dan nou pei e osi en mankman teren ozordi pour konstriksyon? Mersi bokou Madanm Speaker.

MS MARIE-MAY JEREMIE

Mersi Onorab pour sa 2 kestyon byen enteresan. Premyer an premyerman pour kestyon an relasyon avek, *the previous administration*. Mwan mon'n toultan travay byen avek nou *ex-Prezidan*, nou *former President* e son Ladministrasyon, swa letan mon ti ankor dan Gouvernman dan Minister mon ti en Direkter Zeneral e alor mon ti pe travay pour mwan delivre en pe lo sa bann polisi.

E menm letan mon'n sorti dan Gouvernman mon ti pe travay avek *SeyCCAT*, mon'n toultan annan *close partenarya* avek Gouvernman bokou, annefe bokou bann program ek bann proze ki mon'n komanse letan mon dan *SeyCCAT* ti pe travay vreman, vreman pres avek Ladministrasyon Prezidan Wavel.

E personnelman osi mon annan respe pour li e mon'n

travay byen avek li, e sa i en lapros ki mwan mon'n pran letan mon pe delivre dan okenn louveraz.

Annefe Prezidan ti osi apwent mwan lo en *Board* ki li ki ti patron e lo sa *Board* mon'n ganny sans pour mwan travay enn pti pe pli, pli pres avek li menm ganny sans al lo bann *site* ansanm ek li e diskite ase ouvertman lo bann size ki ti, ki nou ti pe travay avek. So sa i mon lapros.

Dezyenmman an term bann landrwa sansib ki egziste dan distrik e ki mannyer nou pran bann desizyon letan i annan bann proze devlopman.

Sa i vreman difisil, parfwa i annan bann sit ki sa ki nou dir zot *unique* ki dan le sans napa ankor lezot landrwa kot ou pour ganny sa kalite ekosistenm, sa kalite laplant, sa kalite servis ekolojik ki ganny trouve dan sa landrwa.

E dan sa bann lenstans desizyon i vin pli difisil e alor la ou pour bezwen balans antre devlopman pour ed lapopilasyon oubyen mentenir sa.

Me parfwa, par kont i annan bann lenstans kot *ok* sa *site* i spesyal me selman sa ki trouve la i annan detrwa lezot landrwa reprezantatif ki nou kapab annan sa bann sa bann

ekosistenn parey e dan sa lenstans la i annan bann konpromi ki ganny fer.

E alor dan sa bann lenstans la, nou pran bann desizyon konpromi me i pa en zanmen en *blanket approval*, kot zis ou vini ou dir wi fer sa ki ou anvi me i vin avek bann kondisyon.

Bann Lalwa lanvironnman ki nou'n fer *over the years* zot ekstrememan bon zot annan bokou bann provizyon, me selman parfwa limitasyon i se ki nou pa servi zot an zot totalite. E alor mwan enn bann keksoz ki mon toultan dir e nou servi bann resours ki deza a nou dispozisyon.

E ler nou'n fini fer tou nou bann prosedir, si i bann lenpak ki nou kapab viv avek pour lefitir, nou pour kapab regard nou zanfann demen e dir nou'n pran desizyon ki pli byen alor la nou'n pran sa bann desizyon.

Si nou pa kapab reponn sa bann kestyon avek sa kalite konfidans, mon mazin i sa lenstans ki nou pran desizyon baze lo prekosyon e nou dir non annan fer enn pti pe plis *homework*, annou gete kwa ki nou kapab fer *and then come back to those decisions*. E sa i toultan rekomandasyon e mon lapros ki mwan mon pran. Mersi.

MADAM SPEAKER

Onorab Roucou.

HON MICHEL ROUCOU

Mersi Madanm Chair. Bonn apre midi Ms Jeremie en zanfann Mont Fleuri, mon konn li vremen byen depi lanfans nou konn kanmarad. Annefe Ms Jeremie mon kestyon i pour ou se ki anvi ki ou en zanfann Mont Fleuri ou'n ne e grandi Corgat Estate, e souvandfwa nou war poudir bokou dimoun i panse poudir laplipar bann zanfann, ki'n grandi Corgat Estate i annan en bout negativ avek zot.

Be ou en legzanp pour tou espesyalman bann madanm. Ki mesaz ou anvi anvoy avek bann zenn ki spesyalman i sorti dan distrik Mont Fleuri sa bout Corgat Estate?

E osi en mesaz pour bann dimoun la deor ki toultan annan sa panse, poudir tou dimoun ki sorti Corgat Estate, zot annan sa bout negativ anti-sosyal petet i annan keksoz pour fer dan bann aktivite ilegal. Ki mesaz li menm li ou ti a kontan pase pour tou le de parti li menm li? Mersi.

MS MARIE-MAY JEREMIE

Mersi Onorab. Wi mon fyer ki mon'n sorti Corgat estate. Konm dir bann dimoun enn ler

mon'n sorti *from the hood of Seychelles*. Me selman mon pa'n zanmen les sa vin en baryer pour mwan dan okenn a okenn moman dan mon karyer profesyonnel.

Annefe mon toultan koz lo la avek bann dimoun ki mon rankontre, e ki mon pros avek. Pour mwan mon parkour mon krwar mon'n kapab siksede aköz mon annan disiplin, mon sorti dan en fanmir ki vreman solid.

So mon'n ganny sa lankadreman familyal ki'n fer sir ki zot in toultan *put me to tasks*. Fer sir ki mon responsab e ki osi mon'n ganny edike. So letan nou koz lo ki mannyer nou kapab ed dimoun ki dan sa bann sityasyon pour epanouir pour sorti. Ledikasyon i reste en keksoz kle.

Letan ou ganny ledikasyon ou kapab sorti dan bann sirk visye ki ou paran ek zot paran in viv ladan e alor ou kapab fer pli mye. Sa ki nou dir *creating generation wealth for education* e mon krwar fortman ladan.

So sa i pour toultan mon mesaz ou pa ganny definir par ou bann sityasyon kot ou grandi, kot ou sorti e si ou krwar dan sa ki ou ete ou annan konviksyon dan sa ki ou ete, ou pour al vreman lwen.

E mwan enn sa, *am a proof of* letan ou travay dir, letan ou ganny sipor, letan ou pa bliye kot ou sorti, letan ou toultan annan respe pour dimoun ki'n ed ou. Aköz mwan mon konnen poudir mon karyer, mon pa ti pour la si mon pa ti'n ganny bann loportinite pour mwan epanouir. E alor sa i bann keksoz ki mon pour anvi anmennen pour bann lezot zanfan ki kekfwä zot santi zot en pe dezavantaze par ler.

E mwan mon pour enn sa bann dimoun ki pour pouse pour fer sir ki nou bann zenn i annan bann striktir ki ed zot pour zot kapab sorti *whether it be* dan, kekfwä dan bann lenstans lapovrete, bann fanmir kase.

E osi kekfwä bann probleman sibstans ki pe afekte zot e anpes zot pour zot *become the best version of* zot lekor. Mersi.

MADAM SPEAKER

Onorab Aglae.

HON EGBERT AGLAE

Mersi Madanm Speaker. Mon a dir bonn apremidi Madanm Jeremie. Felisitasyon pour ou lapwentman e nou pe war en zenn profesyonnel, byen ankadre. E mon swete ki safwasi lot kote latäb i lev son

lanmen pour donn ou sipor pour siport nou bann zenn profesyonnel.

Mon keston mon'n war poudir ou annan sa *background* sa lekspertiz, sa konpetans kot i koncern *climate change*, sanzman klima ki i en topik global ozordi. E menm dan nou bann zeyon finansyel kot i koncern Bidze a lavenir.

I annan bann konponan *climate change* ki pour antre. Me nou – bokou lanfaz dan lepase in ganny mete lo sirtou parey bann adaptasyon *coastal management* ki i ankor en *issue*. Mon anvi konnen petet de lavan aköz *climate change* i bezwen form par nou lavi tou le zour prezan.

Petet ki ou pe panse pour al enn pti pli devan ankor kot nou pour bezwen kapab kapte menm bann fanmir, bann lakour pour kapab edik zot premyerman, e an menm tan annan bann petet bann *Scheme* a lavenir kot i koncern *climate change*, kot okenn bann evantyalite adaptasyon, swa dan lakominote kot en Lakour li menm, i kapab fer pour ede osi konbat bann mitigasyon ki annan pour fer avek sanzman klima? Sa i enn.

Dezyenmman an vi ki si ou ganny sa portfolyo sa bout lanvironnman. Anvi ki *Planning*

Authority dan bann desizyon pour aprouv bann plan. I annan reprezantasyon Lanvironnman ladan. Eski ou pour pare ou menm ou aköz parfwa i annan bann desizyon difisil kot i koncern bann proze ki pour fer. Kot nou pa war en repet, kot en Minis ki ansarz en portfolyo lanvironnman lo en size, lo size Assumption, ki pa ti konnen ki pe pase. *Ok*.

So eski ou menm ou, ou pour reste *on the ball* lo sa bann size pertinan kot i koncern devlopman Nasyonal pour fer sir ki i anliny avek bann *best practices* ki a okenn moman nou bann teritwar, nou bann zil, menm isi Mahe pa ganny afekte par bann proze ki al kont bann lespri soutenabilite e sanzman klima? Mersi. (*Relax*).

MS MARIE-MAY JEREMIE

Mersi Onorab pour sa 2 keston. Sa premye pwen ki ou'n koz lo la, pour mwan mon war sa koman rezilyans kominoter.

So letan ki ou regard bann aksyon kolektif ki nou kapab fer pour sanzman klima bokou, toultan nou get lo kote ok Gouvernman pour fer bann proze lakot pour vin fer adaptasyon, pour vin fer *rock armoring*, pour vin anmas later.

Me i osi annan bann lezot fason ki pe ganny promote dan bann kominote enternasyonal e osi dan bann Pti Leta Zil kot nou anmenn kominote, nou pour fer bann aksyon ki nou apel parey bann *Ecosystem-based adaptation* kot i bann fason enn pti pe pli *soft* ki nou kapab angaz nou kominote osi, pour zot kapab protez zot propriyete.

Swa zot pran bann mezir ki mwen koute, pour zot osi kapab prezerv zot landrwa, zot ganny edike lo bann fason ki zot kapab konstrir zot lakour pour li vin mwen vilnerab avek bann lenpak ki pour annan dan lefitir.

Kekfwa ozordi vre zot propriyete i byen, i pa pe ganny afekte. Me selman dan lefitir i annan bann prozeksyon ki dir ki kekfwa sa landrwa ki zot ete pour vin vilnerab.

Alor i annan bann gidans ki ou kapab anmennen pour donn ledikasyon bann kominote pour zot osi bouz devan letan nou pe koz lo en lanvironnman ki rezilyan nou toultan mazin osi nou bann kominote ki rezilyan. Akoz zot osi alor zot ava kapab epanouir e zot bann lenvestisman ki zot fer ozordi i pour kapab *stand the test of time* pour lefitir.

E mon mazine i annan bann *Scheme* ki nou kapab koz lo la. Pour lemoman mon konnen i annan bann *Scheme* ki annan pour fer avek mitigasyon.

Savedir nou pe koz kekfwa bann pti *loans* pour dimoun met *solar panels* kot zot, sa i plis lo sa laspe mitigasyon. Me selman si nou pe koz lo adaptasyon mon mazine i bon pour annan en konversasyon lo la pour kapab komans regarde kekfwa ki bann lentere ki bann manm piblik i annan, ki manm kominote i annan. Kekfwa osi bann *NGOs* i kapab osi aport en pe soutyen lo la pour gete ki bann nouvo *Scheme* ki nou kapab entrodwir.

Dezyennman lo kote *Planning Authority*, lanvironnman i enn bann partener kle dan sa proses ki trouve anba sa *Planning Act* kot tou bann desizyon i bezwen ganny sa ki nou apel *environmental authorization*.

E parfwa i annan bann lenstans ki mon konnen kekfwa i annan bokou kontansyon, i annan bokou bann *back and forth* ek bann e desizyon pa neserman fasil.

Me mwan dan tou portfolyo kot mon'n ete, dan tou travay ki mwan mon'n ete mon pa en dimoun ki kontan zis siny

dokiman ki mon pa konnen ki pe pase lo la.

E mon mazine ki si annan bann gro proze ki signifikan ki pour annan reperkisyon gro lo lepep lo mon pei mon pour pran mon responsabilite pour sa *seat* ki mon pe pran e si mon'n dir wi ki mon pe antre dan sa plas mon mazine ki mon pour fer sir mon pour amenn responsabilite, mon pour annan rannkont aköz i annan bann mezir ki'n ganny met an plas pour fer sir ki mon pe *monitor* byen, ki bann dimoun dan mon Minister pe fer, e ki sa bann desizyon ki pe ganny fer otour mwan osi pa pe afekte mon abilite pour mwan delivre lo bann keksoz ki pou'n met devan mwan.

Alors si pour ariv en lenstans kot mon pour bezwen pran en desizyon ki ferm mon pour fer li e *of course* dan en fason responsab e ki pour annan bon *track record* aköz mon'n fer sa desizyon e fer sir ki bann desizyon *sound* ki mon pe pran e ki mon kapab mentenir lentegrite letan ki mon sorti dan sa desizyon. Mersi.

MADAM SPEAKER

Onorab Savy.

HON DOMINIC SAVY

Mersi Madanm Speaker. En bonn apre midi, tou dimoun dan Lasanble bonn apre midi Ms Jeremie e bonn apre midi tou dimoun a lekout.

Ms Jeremie mon kestyon i troun anver en keksoz ki nou trouve ase souvan konmela. Bann travayer etranze ki *extract* nou lakot, sirtou dan *weekend* nou vwar sa bokou Providence en pe partou lo Mahe. Zot menm eksplwat nou larivyer partou Takamaka zot arive, zot eksplwat nou bann resours dan nou bann larivyer e parfwa bann resours i ase limite.

Mon pe zis anvi konnen ki petet ou pe mazine pour vin avek pour elimin sa pratik ou petet kontrol sa pratik dan lefitir? Mersi.

MS MARIE-MAY JEREMIE

Mersi Onorab. Sa anefe i en keksoz ki mon'n deza pas ladan letan mon ti dan, letan mon ti ankor travay dan Minister dan divizyon konservasyon. Me en keksoz ki nou ti toultan remarke se ki, i ti napa an plas parey letan sa bann dimoun i vini dan zot Kontra ki zot pe mete.

I annan posibilite pour nou entrodwir bann fason, bann *checks and balances* ki nou pa zis depann lo Minister Lanvironnman pour fer sa

enforcement. Akoz parey ou kapab konstate konmela dan pei i annan en kantite *expatriate* e avek kantite resours ki dan Gouvènmman i annan.

Menm si ou annan bann zofisye ki fer *enforcement*, zot pa pour kapab toultan ariv dan tou sa landrwa. Me si i annan bann lezot *check and balances*, ki pe ganny fer kekfwa avek zot anplwaye ki i pe *raise education and awareness* avek zot bann travayer. Me ki osi annan bann penalti, dan bann lenstans ki zot ganny tyonbo ki kapab kekfwa kout zot, kekfwa zot lanplwa, en *warning* en keksoz koumsa ki pour dekouraz zot pour zot fer sa.

E apre osi *then* lo kote lo *policy* ek *enforcement then* i annan *room always* pour *step up*. Ler dimoun i *call* i raporte ki i annan sa bann keksoz ki pe arive, pour nou reakte, pour nou reasir dimoun ki nou konsernen ek sa bann keksoz e ki nou *actually* delivre lo la.

So pour mwan sa i enn bann aksyon ki kekfwa mon mazine nou kapab met an plas si mon ganny - mon ganny sa portfolyo. Akoz en kantite fwa sa bann dimoun letan ou enterakte avek zot, zot dir ou zot pa ti okouran poudir *you know it's not allowed*, alor i

montre ou poudir i annan lespas pou nou fer enn pti pe pli byen ladan.

So, mon mazine nou a kapab *tackle* li koumsa. Mersi.

MADAM SPEAKER

Onorab Grandcourt.

HON ALVIN GRANDCOURT

Mersi Madanm Chair. Byenveni Ms Marie-May Jeremie. Mon kestyon i lir konm swivan.

Ms Jeremie ou leksperyans dan konservasyon lanvironnman koman en lans losean ed devlopman ek Lalwa i en gran larises pour nou pei. Nou remerci ou pour tou sa servis, pour tou sa letan. E *it's only fitting* ki ozordi ou la devan nou.

Mon bann sitwayen Grand Anse Praslin e mon osi an partikilye i en dimoun ki tre pres avek lanvironnman. Etandonnen si ou ganny sa portfolyo, bann zabitan i souvan eksprim konsern lo mank aksyon konkret dan proteksyon lanvironnman lokal, bokou i ganny dir me selman napa aksyon.

Devlopman dirab e soutyen bann pti biznes ki depan lo resours natirel direktman ou endirektman. Antan ki en kandida pour vin en Minis e ki ou plan pour asire

ki bann zil parey Praslin, i benefisye direkteman avek ou travay dan Gouvernman e ki ou pour fer pour adres bann mezir ki adres bann bezwen spesifik tel ki lakot, *landfill*, *waste management* eksetera pour bann kominote zil?

MS MARIE-MAY JEREMIE

Ok. Mersi Onorab. Toultan – mon mazine ler mon ti dan Minister, toultan ti vreman annan enn pti group dimoun lo Praslin e La Digue ki ti pe travay pour Minister.

E parfwa mon konnen ki zot ti pe santi zot enn pti pe *left out*. Akoz i napa bokou zot, e mwan enn bann keksoz ki mon konnen i pour enn bann aksyon ki mwan mon pour pran si mon ganny mete dan sa portfolyo.

I pour rod en fason pour *empower* plis nou bann zofisye ki pe travay plis lo Praslin ek bann *inner island* pour fer sir ki zot, zot santi zot ekipe pour zot kapab delivre. I vre ki parfwa letan – espesyalman letan zot pe fer *enforcement*, landrwa i ptipti, tou dimoun i konn zot.

So *sometimes* vre ki zot santi zot enn pti pe dezavantaze. E alor lapros i pour rod fason ki mannyer, ou pour kapab anmenn pli soutyen e mwan menm mon fer sir ki mon reste angaze pour

kontinyelman vin la avek zot, e fer zot war ki zot pa tousel.

E sa bann travay ki zot pe fer i enportan, i *as important as* bann travay ki nou pe fer isi lo Mahe ek dan tou zil lo Sesel. E alor sa i enn bann komitman ki pour fer.

E alor sa i pour ede ki bann aksyon ki nou pe dir i vin pli konkretize. I pa pour vin *ok* nou'n donn ou en notis me nou'n dir ou fer keksoz me solman apre napa *follow through*.

I zis bann dimoun kekfwa ki zot pa santi ki zot annan sa bagaz e osi sa bann resours ki zot bezwen pour al devan. Alor sa i lafason ki mwan mon krwar nou kapab fer pli byen. Mersi.

MADAM SPEAKER

Onorab Hoareau.

HON JOHN HOAREAU

Mersi Madanm Speaker. Bonn apre midi madanm Jeremie. Mis Jeremie plito. Mon pe prezimen ou pour pran en portfolyo dan lanvironnman me mon pa konnen *for sure*.

Mwan mon le demann ou en kestyon enn pti pe larz, enn pti pe lo Konstitisyon li menm. Lartik 35 Konstitisyon i *recognized, state i recognized equal wages, for work of equal value*.

Mon ti a kontan konnen parske ozordi zour i annan enn pti pe en mekontantman ant lapey ki bann Seselwa pe gannyen avek lapey ki bann etranze i vini i gannyen pour fer menm louveraz.

So mon ti ava kontan konnen si ou vin Minis dizon pour Lanplwa, dizon oubyen ou ganny portfolyo ki annan pou fer avek travay an zeneral.

Kwa ki ou pour fer pour remedye en pe sa sityasyon pour anmenn - ki par ler i anmenn en sours fristrasyon pour sirtou pour bann zenn *graduate* ki antre dan travay? Mersi.

MS MARIE-MAY JEREMIE

Mersi Onorab. Sa pwen ki ou leve i enn ki *come up* ase souvan dan bokou diferan sekter, me pa zis lo kote global *even* dan Sekter Lanvironnman kot mon'n travay toulezour nou koz lo la.

Si mon ti pour ganny mete dan portfolyo ki annan pou fer avek Sosyal, enn bann premye keksoz ki mon ti pour kontan pour mwan konpran i ki bann kriter ki pe ganny servi pour nou etabli saler.

Si kriter i baze lo kalifikasyon, lo merit, lo bann target performans ki nou *monitor*. E ki nou kapab

demontre ki sa dimoun ki pe sorti aletranz pe kapab delivre a en nivo bokou pli eleve ki sa Seselwa, *then* dan sa ka i a *deserve* pour li ganny son saler pli o.

Be si dan en lenstans ki en Seselwa i pe fer menm keksoz, mon krwar i bon revwar pour fer sir ki i annan ekitabillite dan bann polisi lo saler ki nou fer.

Parfwa sa diferans osi i vin atraver bann lezot benefis ki bann travayer *expatriate* i gannyen. E sa i fer ki kekfw *then* i kree sa fristrasyon avek dimoun. Me selman nou bezwen kapab eksplike.

Dan tou lenstans bann polisi ki nou met an plas, nou sipoze kapab eksplike avek nou bann *stakeholders* dan nou sekter ek nou bann travayer akoz ki i koumsa.

E si nou pa kapab onnetman eksplik en dimoun kwa ki diferan e dan sa bann lenstans mon mazine ki nou sipoze kapab revwar e kot i nesaser fer bann sanzman pour nou kapab *increase* prodiktivite avek motivasyon ki bann *staff* i annan. Mersi.

MADAM CHAIR

Onorab Clarisse.

HON DENISE CLARISSE

Mersi Madanm Speaker. Bonn apre midi tou koleg Onorab, bonn apre midi Ms Jeremie. Mon krwar ou prezans apre midi la entelektyelman ou CV, i tou depikte ou menm.

E mwan mon kestyon enn pti pe pli leze, par apor a tou bann kestyon ki'n ganny demande, ou'n vin avek sa karizma ou'n kapab reponn ou kestyon *fluently*.

E pour mwan san dout parey ou'n dir menm ou bann reprezantasyon enternasyonal bann *Board* ki ou asiz lo la i koz pour li menm. E i annan 2 mo ki ou'n servi depi letan ou'n komans ou prezantasyon ou menm ou koman endividi, apre letan ou'n anmenn ou bann konversasyon se ledikasyon ek responsabilite.

Ki mwan personnelman mon osi mon met bokou lanfaz lo la e pour mwan nenport ki portfolyo Minister ki ou pe antisipe ki arive demen si arive ou ganny nominen koman Minis, i de mo, de keksoz ki pour bezwen ganny soulinyen a tou moman.

E pour mwan mon annan de kestyon en pe vitman, sirtou parey koman ou koman en madanm. Eski ou krwar sa sans koman en madanm ki ou gannye i annan ki ekitab, ki nou madanm nou gannye

petet zeneral konpare avek bann zonm anliny avek bann pozisyon kle lo kote pei?

E osi ki mannyer ou pour servi sa loportinite ki ou pe gannye, pour *empower* e osi motiv sirtou bann zenn fiy la deor. Onorab Roucou in fer lanfaz lo kote Mont Fleuri Corgat Estate me selman i enportan pour bann madanm, bann zenn fiy la deor, ozordi vwar poudir posibilite potansyel pour mwan avans devan i annan.

So sa i mon 2 kestyon. Mersi Madanm Speaker.

MS MARIE-MAY JEREMIE

Mersi Onorab. Koman en madanm, Sesel parfwa letan nou koze nou dir napa sa bann *issues gender*, me selman sa i baze lo diferan persepsyon avek diferan *settings*.

Letan ou lo en *level mid management*, i pa tro en problem me parfwa dan serten sektor i egziste, kot espesyalman pour en madanm en zenn madanm, i pa toultan fasil pour ou penetre aköz i annan bann fraternite ki'n ganny etabli.

E alor *sometimes it's there*. Mon'n santi sa selman plis, lo mon bann ekspozisyon rezyonnal lo kontinan, sa

mon'n santi li vreman, vreman for.

E en keksoz ki'n toultan permet mwan pour mwan kontinyen e pour mwan pa *give up*, i si laspe ki mon konnen sa ki mon anmennen lo latib. Ou bezwen konnen sa ki ou ete, ou konn ou potansyel, e ou osi konn ou limit. E ler ou vin avek en konfidans me selman ki pa arogan, i fasil pour dimoun kapab respe ou.

E *once* ou etabli respe, ler dimoun in respe ou, i fasil pour ou travay avek zot menm si zot bokou pli vye ki ou, menm si zot annan bokou pli leksperyans ki ou. Me zot pour toultan donn ou en sans pour ou koze.

E alor sa i mon gidans ki mwan mon pour donn bann lezot madanm Seselwa - ki anbisye, ki anvi al pli devan e ki anvi travay dir pour son pei, servi byen bann loportinite ki donn zot. Rekonnet zot abilite, rekonnet lentegrite dan zot abilite e apre osi pa bezwen vin arogan.

E sa i en keksoz ki mon espere ki si mon vin Minis mon pour kapab reste sa Marie May ki mon ete, mon a grandi, mon a grandi dan keksoz ki mon pour aprann, me selman mon personnalite, i pa en keksoz ki mon ti a zanmen voudre ki i sanze. Mersi.

MADAM SPEAKER

Onorab Conrad Gabriel.

HON CONRAD GABRIEL

Mersi Madanm Chair. Mon dir bonn apre midi Ms Jeremie, mon vreman privilezye pour war ou ankor. Mon'n travay ansanm, mon'n ganny sans travay ek ou. Mon pa dout ou abilite. So mon *congratulate* ou lo ou *nomination* pour *Minister's position*.

Nou'n travay ansanm kot nou'n war nou dan diferan lokasyon mwan mon'n Botanik ou, ou'n sitye *Aarti Chamber, Minister's Office* en lot landrwa.

So an ka ou ganny sa nominasyon pour vin Minis eski ou pour fer li ou priyorite, pour fer ki en batiman i ganny konstri pour ki Minister Lanvironnman i vin *under one roof*, pour nou pli byen kapab *manage* keksoz e sa i a ed ou Minister petet mon pa konnen si ou pour ganny sa Minis fer ki donn en pli bon servis popilasyon e pei an zeneral i a benefisye?

E mon dezyenm pwen eski ou santi ki Sesel in fer ase, *or* pe fer ase pour protez nou pei kont bann lefe sanzman klimatik e petet kwa ki ou pour fer diferaman? Mersi Madanm Chair.

MS MARIE-MAY JEREMIE

Mersi Onorab e zis parey mwan i vremen en loner pour mwan osi pe travay avek ou ozordi la pe koz avek ou. Wi Minister Lanvironnman pour en kantite lannen nou bann lofis in eparpiye, in eparpiye partou, e mon pa kapab dir ki sa i pour enn bann aksyon priyoriter ki nou pour fer.

Me selman i annan diferan lezot fason ki ou kapab fer sir ki ou reste konekte avek tou ou dimoun, dan tou zot bann lofis kot zot ete. Fer sir ki mon en Minis ki *accessible* avek mon bann staf e mon konnen ki bann *issues* ki zot pe, ki zot pe pas ladan.

E si pour nesaser e i pour annan resours ki pour ganny met dekote pour ede pour annan en batiman kekfwa sa i ava en desizyon ki ava ganny pran apre, me selman mon pa nesaserman krwar avek tou bann lezot proze kekfwa sa i ava nimeron en koman en priyorite.

Me selman nou kapab rod fason, pour fer sir ki staf i reste konekte, zis parey nou travay for ansanm bann aktivite sosyal osi par ler i kapab fer ki staf i reste konekte e zot toultan pe travay ansanm *regardless of* zot lokasyon.

Dezyenmman lo kote sanzman klima. Parey mon'n dir oparavan Sesel i annan en kantite defi an term bann lenpak ki relye avek sanzman klima e sa i pour pran bann aksyon kolektif. Gouvernman li tousel i pa pour kapab *achieve* tou sa ki nou pour bezwen fer. I ava rod bann finansman, i ava anmenn la a dispozisyon pei.

Me selman koman en pei, nou menm nou bann pep nou pour bezwen rod en fason ki mannyer nou kree rezilyans, e *that's the only way* nou pour kapab bouz devan.

Sekter prive i annan en rol vremen kle pour li anmenn en bon pe sa lenvestisman ki pei pe rode, pour nou kapab adapte avek sanzman klima. E alor enn mon bann lapros i pour fer sir ki nou anmenn tou dimoun ansanm avek nou, ki Gouvernman i ouver son laport pour travay avek sekter prive, bann NGOs ek tou bann abilite ki annan dan pei.

E *it's the only way* ki mwan mon krwar nou pour kapab fer sanzman e fer keksoz diferaman. E sa i pour kree *accountability* aköz Gouvernman pou'n ouver son lekor pour li kapab delivre. Mersi.

MADAM SPEAKER

Onorab Romain.

HON GEORGES ROMAIN

Mersi Madanm Chair. Bonn apre midi Ms Jeremie, mon'n ganny sans pe demann kestyon en pe lo dernyen, dernyen. Mon'n ekout ou byen e ou bann larepons i vreman, vreman byen e mon napa dout ki ou pa pour vin en bon Minis.

E alors mon kestyon e anvi ki nou konnen dan *public service* i annan bokou travayer byensir be i annan travayer ki travay vreman dir, travay vreman byen. E i annan osi ki parey nou dir trenn lipye.

Anvi ki ler mon pe ekout ou, ou en dimoun ki vreman annan en ou *background*, ou en dimoun ki'n vreman toultan pe travay dir, ler ou pou ganny elekte koman en Minis dan ou Minister.

Ki ou pour fer ki mezir ki ou pour met an plas, pour fer sir bann ki travay byen, byen. Sey kontinyen pous zot pour zot kontinyen delivre me bann ki trenn lipye, ki bann mezir ki ou met an plas pour fer sir ki manm piblik la deor i ganny en bon servis?

Apre vitman dernyen kestyon mon ti a kontan demann ou. An vi ki ou *expert* dan lanvironnman. Nou tou nou konnen ki Sesel i ganny

gete koman en sanpyon dan lanvironnman. E nou konnen *former* Prezidan Wavel Ramkalawan, i en dimoun ki toultan ler i *travel* i kontan defann Sesel lo kote lanvironnman.

Dan zis kekfw de laliny ki ou kapab, ki ou pour fer si ou pran portfolyo Minis Lanvironnman pour mentenir ki Sesel i en sanpyon dan lemonn lo kote lanvironnman? Mersi Madanm Chair.

MS MARIE-MAY JEREMIE

Mersi bokou Onorab. Mon a sey enn pti pe vitman, lo kote ki mannyer nou sipor oubyen nou travay avek bann dimoun ki travay dir. E ki mannyer nou fer sir ki nou pa pe anmenn bann *dead weight* parey nou dir.

Dan tou bann landrwa ki mwan mon'n travay espesyalman letan mon'n zwenn SeyCCAT la, nou fer si ki nou annan bokou *accountability to ourselves, to our leaders* e mon osi mon annan *accountability to the people* ki mon travay avek.

E ki mannyer nou fer sa? Nou toultan etabli bann endikater, ki montre nou letan nou pe fer byen e letan ki nou pa pe fer byen.

Dan manifesto anba portfolyo Lanvironnman par

egzanp i annan serten bann endikater ki'n ganny mete, e sa bann endikater i pa zis pour sa dimoun ki pour asiz a latet sa Minister me osi pour tou dimoun ki pe travay dan sa Minister.

Alor ou pour bezwen kapab demontre ki mannyer ou pe kontribye lo *delivery*. Letan ou en *public servant*, ou la pour servi piblik an premye, pour servi piblik e pour fer sir ki bann louvraz ki'n ganny anmennen kot ou, ou pe delivre.

E alor letan dimoun i travay dir, nou sipoze kapab *être* rekonesan, fer zot konnen selebre ki zot pe fer sa ki byen. E letan nou pa pe travay byen osi, nou bezwen kapab dir zot osi ki zot pa pe fer byen.

E si i ariv bann lenstans kot zot pa pe delivre ou'n koz ek zot ou'n dir zot, ou'n sey anmenn zot, ou'n anmenn tou sa bann resours ki zot in demande pour zot fer zot fer zot louvraz e zot pa delivre malerezman dan sa bann lenstans ou pour bezwen annan bann desizyon ki ganny pran.

An term ou dezyenm keston lo mentenir Sesel koman en sanpyon lanvironnman, sa i en keksoz ki pres, pres, pres avek mon leker. Akoz Sesel i fer en kantite e

nou'n *build over the past decades*, en repitasyon kot letan ou debout lo en platform koman en dimoun dan Sekter Lanvironnman ou koz lo Sesel dimoun i vire i get ou, dimoun i ekout ou e sa i en privelez ki fodre nou kontinyen *and the only way* ki nou kontinyen ganny sa respe i se ki nou fer bann keksoz ki nou dir nou pour fer.

Si nou dir nou *commit* pour nou fer bann aksyon nou bezwen fer. Donn ou en legzanp, Sesel in fer en kantite global an term nou losean nou'n protez 30poursan nou losean.

La in ariv sa lenstans kot nou pare pour nou komans enplimant en *manage* sa nouvo landrwa. Lemonn i get nou lemmonn i espere. Alor Sesel i bezwen delivre e koumsa ki ou kree *accountability* aköz ler ou dir ou pour fer en keksoz ou fer e dimoun i respe ou e koumsa ki ou mentenir ou repitasyon. E alor koumsa ki mon santi ki ou sipoze travay. Mersi.

HON SANDRA SULTAN

Mersi Madanm Chair. Bonn apre midi Ms Jeremie. Apre ki mon'n obzerv ou CV, mon'n war ki ou spesyaliz plis dan lanvironnman.

E parey ou konnen poudir portfolyo Lagrikiltir in souvandfwa ganny antase avek Minister Lanvironnman. Si sa i pou leka sa voyaz, eski ou santi ki ou pou kapab donn menm latansyon e sipor Departman Lagrikiltir?

E mon dezyenm kestyon i, ki sipor ou pou donn Lekol Lagrikiltir, vi ki ziska ozordi zot pa ankor kapab ganny li en nouvo direkter? Mersi.

MS MARIE-MAY JEREMIE

Mersi Onorab. Lagrikiltir i en portfolyo ki vreman larz, ki vreman enportan e ki parfwa ase difisil pou *handle*.

E letan i ganny mete ansanm avek lanvironnman, parfwa i *even* vin difisil akòz i annan bann desizyon ki pa toultan alinyen. Akòz i en sekter devlopman e dan Minister Lanvironnman ou annan lobzektif konservasyon.

Si sa portfolyo i tonm ansanm avek lanvironnman, mon mazine ki nou pou bezwen travay kolektivman avek bann lezot Minis osi, pou fer ki nou pe kapab delivre lo sa bann pwen ki'n ganny mete lo manifesto an term lagrikiltir.

I annan en kantite lanfaz ki pe ganny mete lo prodiktivite, lo *self-sufficiency* pou anmenn en pe abilite pou pei tir son

depandans lo ban lenportasyon ki ganny fer. Sa i *both* pour *livestock* ek *crops*.

E mon mazine ki si mon ganny sa portfolyo mon pou bezwen travay for pour mwan kapab *meet* sa bann lobzektif ki'n ganny mete ladan.

Me selman parey ou kapab konstate, mon pa pe kapab konfirman akòz mon pa ankor konnen ki mannyer sa portfolyo i ete.

Be i pou en travay kolektif. Mon konnen ki mon pa pou travay mon tousel ki si mon ganny sa.

An term sa dezyenm pwen ki ou'n fer lo sa dimoun ki pa ankor ganny *recruit*. Evidaman sa i en keksoz ki mon pou bezwen regard ladan. Konpran son *history* akòz i koumsa.

E la apre ki mon a kapab pran desizyon. San konn konteks ek bann lenformasyon ki otour sa size, i difisil pour mwan pronons mon lekor lo la. Mersi.

MADAM SPEAKER

Onorab Adelaide.

HON FRANCOIS ADELAIDE

Mersi Madanm Chair. Bonn apre midi Ms Jeremie. Dabor, felisitasyon pour ou nominasyon. Ms Jeremie,

mwan mon kestyon i petet i senp en.

Vi ki ou parey Onorab Roucou i dir, ou en zanfan Corgat, me la ou pe viv dan Baie Lazare.

Petet, ki mannyer ou pou ed nou distrik? Akoz bann dimoun pe demann mwan la, be i ti a bon nou *vote* pour sa madanm.

Selman demann li ki mannyer i pou ed nou distrik? Konmsi, ki ou bann lobzervasyon anvi ki Baie Lazare pe devlope e kote ou kapab antre ladan?

E vi ki ou konnen ki Baie Lazare i en distrik ki nou kontan bann *item* lokal, byensir i annan 2 ki mon pa a koz lo la.

Me selman eski ou ti form parti sa tim ki ti met en *ban* lo dizef zwazo? E si wi, eski lannen 2026 nou pou gannnen, ouswa...? Zis eksplik nou mannyer keksoz i ete. Mersi.

MS MARIE-MAY JEREMIE

Mersi Onorab. Mon mazine okenn bann aktivite oubyen bann program ki pou ganny fer dan distrik Baie Lazare pou bezwen ganny fer an *close* partenarya avek ou.

E mon espere ki i ava bokou – i ava annan bann ki *actually* a sorti kot ou. E ki si mon okip sa plas konman

Minister Lanvironnman, mon a kapab ed ou pou egzekite. Me selman i annan en bon pe keksoz ki nou kapab fer dan distrik, lo lakot.

I annan en bon sa bann proze semen ki'n fini. E alor i pou annan en bon travay reabilitasyon pour sa bann landrwa kot in ganny afekte avek bann konstriksyon.

Alor sa i kekfwa enn bann landrwa priyorite ki mon ti a kontan kekfwa met lo ou latansyon pour ou kapab konmans travay lo en lankadreman pou fer sa.

E mon osi *then*, mon a kapab gete ki mannyer mon donn mon soutyen e mon letan. Mon fer en kantite travay volonter an deor mon lespas konman en profesyonnel. E alor sa osi kekfwa i ava en keksoz ki mon ava enterese pou antre ladan.

Dezyenmman lo bann keksoz ki annan pou fer avek dizef zwazo. Letan mon ti ankor dan Minister an 2022, zis avan mon sorti sa Polisi ti ganny anmennen devan *Cabinet*. E mon ti enn bann dimoun ki ti fer bann resers.

Nou ti fer sa *census* an 2021 ki ti etabli vre leta bann Golet dan Sesel e ki ti'n desann avek en nivo alarman. E sa i en keksoz ki mon konn tre byen. E

i ti zistifyab a sa moman pour Gouvernman pran en desizyon responsab. Boner mon'n koz en kantite lo sa laspe pran prekasyon. E Gouvernman ti pran en desizyon baze lo en prensip prekasyon letan i ti met sa *ban* lo dizef zwazo. E i ti enn ki ti fonde lo lasyans e avek resers.

Mon mazine ki ti'n met en peryod 5 an pou revwar. E kekfw enn bann aksyon ki nou ava rekomannde i se ki nou revwar kot nou ete. Eski nou annan amelyorasyon apre ki sa bann mezir i ganny met an plas?

Akoz ki tou mezir ki nou mete dan lanvironnman i bezwen ganny revwar *periodically* pou fer sir ki zot pe servi sa *purpose*. Alor nou a revwar, nou a gete.

E si i annan *improvements*, Gouvernman i ava pran en desizyon responsab, ki si kekfw i a met en koltar. Si i pou dir kontinyen pour ankor en pe letan.

Sa i pou en desizyon ki pou ganny pran kolektivman avek bann lezot koleg Minis, pou fer sir ki i anliny avek bann Polisi ki Gouvernman pe anmenn devan. Mersi.

MADAM SPEAKER

Nou ava pran 2 dernyen entervenans. Onorab Gill apre Onorab Georges.

HON CHURCHILL GILL

Mersi Madanm Chair. Bonn apre midi Ms Jeremie. Mon kestyon pou baze lo en seksyon dan ou CV. Sa bout *skills and proficiencies*. E lo la mon le tous sa *Environmental Policy*.

Management of protected Areas.

Science to Policy, research into management and policy.

Ozordi Sesel nou deza annan Polisi kote sa bann *areas* ki ganny touse dan ou CV. I deza la. Me selman depi ler nou'n konmans sesyon avek ou la, bokou kestyon in leve e trwa kar dan sa bann kestyon zot pe fer sorti konserne. Menm si sa bann Polisi i la.

E i annan legzanp ki'n sorti. Par egzanp lo *landfill*. E i vre, nou annan Polisi lo *landfill*. E eski sa Polisi i adekwat konman en mezir, oubyen i adekwat pou soutenab pour en rezilta pli byen?

Lot legzanp osi ki'n sorti se *Assumption*. Ozordi ou'n dir nou pou dir i annan bann –premyerman *IEA*. I annan Seksyon *IEA* pour bann devlopman dan bann landrwa sansib.

E an menm tan pour *oversight*, nou sipoze annan bann NGOs. I annan en departman dan Gouvènmman menm kot sa IEA i ganny aprouve, ki zot osi zot sipoze pe fer swivi. Apre i annan sa seksyon – sa bout kot sa devlope i antre.

Mon premye keston se, si nou annan tousala, *still* nou war problem i arive. Prezan vi ki mon keston parey mon dir ou in sorti dan sa Seksyon Polisi.

Eski si ou ganny mete dan sa portfolyo Lanvironnman, petet i pa ti a neser kot sa bann Polisi lo sa bann *areas* ki mon'n nonmen, petet i ganny revwar en *comprehensive revision* kot i a kapab reponn bann *challenges* ozordi?

Akoz parey nou tou nou konnen. Si nou pilye touris i ankor pe fer byen, an gran parti nou lanvironnman ki pe kontribye ladan.

Savedir i montre nou si nou ankor pe ganny sa bann *challenges*, nou bezwen bouz en lot *level* an term ki mannyer nou protez nou lanvironnman.

Enn, pour nou kontinyen sa premye pilye lekonmi kontinyen *thrive*, an menm tan grandi.

E prezans Polisi se sa ki mon krwar ki si ou vin dan sa

portfolyo, pour nou asire tou sa bann keksoz i tonm an plas, si nou pa devret fer en *comprehensive review* lo tou sa bann Polisi, *given* ou leksperyans ki ou annan dapre ou CV? Mersi.

MS MARIE-MAY JEREMIE

Mersi Onorab. I annan detwa – i annan bann detwa *steps* ki pou vin avan ki ou pou *embark on a policy review*.

E enn bann aksyon an premyer ki labitid ou pou fer, ou pou bezwen evalye lenplimantasyon sa Polisi. Eski in ganny enplimante? Eski sa bann paramet oubyen sa bann endikater ki ou ti'n mete in ganny *zwen*?

Si ou kapab reponn wi, i pou dir wi nou'n enplimante, i annan. Me selman *still* nou pa'n *achieve* nou bann lobzektif. Alor la i bann pwen ki ou bezwen fer sir ki ou al rekonmanse.

La ou ava revwar, ou a dir *ok*, nou bezwen gete si sa Polisi i ankor relevan avek bann *issues* aktyel. Eski sa problem ki nou ti pe sey *solve* avek sa *policy* letan nou ti ekrir li i ankor egziste? Eski i ankor relevan?

E si i non, alor i montre ou ki i ler pour ou *innovate* pour ou reget konteks. Akoz tou Polisi i ganny *anchor* avek en konteks,

avek en *issue* ki ou pe sey redrese.

E si ou lapros ki ou pe pran dan ou Polisi pa pe ed ou pour ou ganny ou bann larepons, alor ou bezwen rod en lot fason pour ou fer keksoz. E koumsa i pou vini.

Alor avan ler ki ou fer sa revi konpreansiv parey ki ou pe dir lo Polisi, ou bezwen ganny en konpran pou gete si keksoz pe marse e si sa bann *challenges* i kapab ganny *surmounted without changing the policy*.

Be si non, la aprezan ou a fer e nou konmanse. E tou Polisi, de baz pour nou fer Polisi fodre i annan konsiltasyon. Akoz sa fason ki ou pou reste konnekte avek bann *issues* ki dimoun dan lakominote, ou bann *stakeholders* e tou dimoun dan sekter pe santi.

E la apre ou kapab devlop bann aksyon ki ou pa pou bezwen fer ou tousel. Akoz si dimoun i ansanm ek ou letan ou pe met an plas bann mezir, alor zot pou ed ou pour ou fer sa.

Me selman apre osi lo kote Gouvernman, en keksoz ki toultan pou reste en *challenge* ki kekfw nou pou bezwen rod fason pour nou sirmonte, i *enforcement*.

Letan ou'n fer Polisi, Polisi i enform Lalwa. Lalwa i bezwen ganny enplimante e *enforced*. E parfwa sa i sa mayon ki pli difisil pour ou gannnen. E alor tousala i mars ansanm.

Polisi i en keksoz ki vremen enteresan, me selman toultan fodre ou pe delivre lo la. I pa kapab zis bann Polisi ki nou fer ki nou met laba 5 an. Apre nou zis vini nou revwar, nou pa fer naryen avek. Mwan mon krwar dan *let's get it done, and let's get it done right*. Mersi.

MADAM SPEAKER

Onorab Georges.

HON BERNARD GEORGES

Mersi Madanm Chair. Bonn apre midi *Mademoiselle* Jeremie. Taler mon pou – si Madanm Chair i donn nou permisyon koze, mon pou koze. Me mon ti anvi pran sa loportinite – mon napa kestyon pour ou.

Mon ti anvi pran sa loportinite pou felisit ou pour ou nominasyon lo lapar nou *Caucus* isi dan Lasanble e lo mon par personnel.

Mon ti anvi dir ou ki sa i en laprev ou konpetans e ou travay dir. I en loner pour mwan personnelman, pour nou lo sa kote lata. E si Madanm Chair i permet mwan, mon a met sapo

SIF en pti kou e dir i nou loner osi lo nivo *SIF*.

Nou ti anvi dir ou ki ou annan nou siport. E nou swet ou tou le meyer dan sa fonksyon enportan ki ou pe al pran. Nou napa okenn dout ki ou pou desarz li *to the best of your ability* e ki ou pou fer nou pei fyer. Mersi e felisitasyon ankor.

MS MARIE-MAY JEREMIE

Mersi bokou Onorab. Mon vreman rekonesan e mon apresye sa. Mersi.

MADAM SPEAKER

Si napa okenn lezot kestyon, nou a dir Ms Jeremie mersi e nou a eskiz li dan *Chamber*. Nou pou osi sorti dan *Committee Stage*. Deba i aprezan ouver lo Mosyon. Onorab Labonte.

HON ANDY LABONTE

Madanm Chair, mon pa pou long. Ou konnen ler ou ti ganny elekte konman Speaker, mon ti ekout ou *interview*.

E rezon mon dir sa aköz ler mon'n war Ms Jeremie in antre, mon'n lir son CV. E ler in konmans reponn bann kestyon.

Ou konnen i en laprev ki la deor i annan bokou dimoun ki kalifye, bann nouvo figir. E bann dimoun ki onnet. Bann

dimoun ki ou kapab kont lo la, ki annan lentelizans.

I en legzanp ki i annan bann nouvo lespri, nouvo figir ranpli avek lenerzi. Byen edike. Lentegrite, respe. E bann bon valer is ou le, ki in dekrir.

So, i pa en politisyen. I en teknokrat. E sa i laprev ki i enn bann meyer kandida si ou le ki mwan personnelman mon pou dir ki'n vin devan nou ziska prezan. E mon krwar sa i legzanp ki petet Gouvernman US ti'n merit pran avek bann lezot kandida ki'n vin devan nou.

E mon konnen poudir mon konvenki ki pep Seselwa la deor i kontan ler in tann madanm – Ms Jeremie reponn bann kestyon. E alor mon pou dir li felisitasyon.

E mwan personnelman mon pou donn li mon *full* sipor ki parey *LOTO* in dir lo kote latab isi, mon krwar nou pans menm parey. So, avek sa de mo mon pou dir mon vreman apresye sa kandida ki'n vin la devan. Mersi.

MADAM SPEAKER

Onorab Naidu.

HON SATHYA NAIDU

Mersi Madanm Speaker. Zisteman lo menm laliny avek mon koleg Onorab Labonte. Ou

konnen pli boner nou'n war plizyer CV ki'n demontre konpetans.

Me a lafen dizour ozordi lo nivo *leadership* an sa ki konsern sa Sesel ki nou le vwar, fodre ki nou annan dimoun ki annan lentegrite. Ki travay dan en fason ki zis, onnet e senser. E dan sak repons ki sa *mademoiselle* ki'n vin donn nou isi dan Lasanble, in demontre nou sa.

E alors, san okenn dout, mwan mon pou lev mon lanmen avek lafyerte. Akoz i en zanfan Sesel ki'n travay dir pour li ariv kot in arrive. In demontre son konpetans dan bann diferan rol ki li in deservi.

E piblik Seselwa la deor lo tou lede kote parti politik ki zot siporte, i annan bann bon lopinyon lo li. E alors mon panse ki Lasanble Nasyonal ozordi i kapab tonm lo en konsansis pour premye fwa, dan tou sa bann non ki nou'n war. Sa enn i pou resevwar sipor inanim.

Akoz i en nouvo figir. Avek en nouvo figir i annan lenerzi ki vin avek. E mon santi ki se sa ki nou elektora la deor i le.

E san okenn dout, mwan mon pou donn li tou sipor *and I'm looking forward to the road ahead* kot nou kapab travay ansanm. Mersi.

MADAM SPEAKER

Onorab Roucou. Non. Onorab Georges? Onorab Georges.

HON BERNARD GEORGES

Mersi Madanm Speaker. Finalman zot in anmenn en Minis ki vo lapenn. Mersi bokou.

(laughter)

(APPLAUSE)

HON BERNARD GEORGES

Madanm Speaker, mon pran laparol apre midi pou dir ki mannyer nou zwaye e ki mannyer nou santi nou fyer avek kandidatir nominasyon *Mademoiselle* Jeremie pou pran en plas dan sa nouvo Gouvernman.

Parey mon'n dir li taler, nou napa okenn dout ki i pou en Minis ekstraordiner e i pou delivre dan en fason zis, enparsyel e profesyonnel.

Sa nou tou nou konnen. Nou tou nou'n vwar. Me set en madanm. Set en *mademoiselle* konpetan e ki konn son size, e ki'n delivre a perfeksyon dan tou sa ki in fer.

E mwan mon kapab dir sa akoz mon konn li personnelman e mon'n annan sa privelez pou travay a son kote

depi plizyer lannen.

Nou'n deservi ansanm lo *Board Island Conservation Society*. Nou'n servi ansanm lo *Board Farquhar Foundation* ki Fondasyon *Farquhar* ki mon *still* annan loner pour mwan *Chair*. E lo – natirelman lo *SIF* ki pour lemoman mon ankor *Chair*.

Annefe, mon profite la pou dir ki *SIF* i en *training ground* ekstraordiner. Akoz dan sa 8 Minis ki nou'n ganny ziska prezan, 2 i sorti kot *SIF*. Alor zot vwar pour zot menm ki mannyer sa lorganizasyon, sa lenstitisyon, sa fondasyon i lev standar dan domenn lanvironnman. Me osi dan domenn *management* isi Sesel.

Mademoiselle Jeremie i en dimoun parey mon'n dir, konpetan e kapab. Me plis ki sa, i en dimoun senser e i en dimoun onnet. E i en dimoun ki annan en *joie de vivre* ekstraordiner. Mon konnen i pa pou *mind* si mon dir la.

Sak fwa ki nou deplase nou al lo en zil, li i kontan asiz deryer dan avyon. Pandan tou sa letan 2erdtan edmi ler nou al *Assumption* pour nou Aldabra, pandan 2erdtan edmi ou tann zis *Mademoiselle* Jeremie pe riye deryer. Sa se son fason fer.

I *entertain* dimoun. I annan en latmosfer pozitiv ki

ekstraordiner. E mon konnen ki i pou anmenn sa dan son travay ki i pe vin fer.

Me plis ki sa. E bokou plis ki sa, set en dimoun ki'n annan en karyer kantmenm son laz ase ba. In annan en karyer ekstraordiner dan sa domenn ki nou espere ki i pou ganny demande pou vin travay ladan dan sa nouvo Gouvernman.

Set en madanm, set en manmzel ki annan en fitir ekstrememan *bright* devan li. Set en dimoun ki nou konnen nou pou kapab fye lo li pou pran bann desizyon ki korek. Parey in dir la apre midi lo sa size dizef zwazo.

In fer nou konpran tre byen ki ou bezwen konmans avek lasyans. E apre se bann syantifik e bann teknokrat ki anmenn en desizyon devan *Cabinet* pour *Cabinet* pran. E nou vwar –

E la mon bezwen dir. Eski mwan mon bezwen dir sa. Nou vwar se koumsa ki Gouvernman Ramkalawan ti travay. I pa'n pran en desizyon koumsa pou dir dizef zwazo nou pa pou aksepte.

In demann ek syantis, syantis in vin devan *Cabinet*. *Cabinet* in diskite e desizyon in ganny pran. E nou ekspekte, e nou espere ki sa nouvo Gouvernman ava fer parey. Pa

zis dan domenn lanvironnman avek *Mademoiselle* Jeremie. Me dan tou bann domenn ki zot pou administre.

Madanm Speaker, mon napa gran keksoz pou azoute ankor. Sof en keksoz. E la mon ti a kontan – mon pa'n anvi gat sa latmosfer par demann sa postilan ki ti la devan nou apre midi sa kestyon.

Me mon pou donn zot en *warning* ki enn bann keksoz ki mon pou demande byento. E zot konnen aköz. Aköz i annan *at least 2* Manm dan sa Lasanble ozordi ki'n gognard mwan ler mon ti dir sa.

Mon pou demann li dan enn mon bann premye kestyon, vin devan Lasanble eksplike. Si *cat and rat eradication project* Aldabra i vo lapenn oubyen si i pa vo lapenn.

E zot ava ekout zot prop Minis rann zot, zot repons ki zot ti riye ler mwan mon ti anmenn devan Lasanble. Sa mon promet zot. Enn bann premye kestyon ki mon pou demann Ms Jeremie ler i vin isi devan Lasanble.

Alor Madanm Speaker, mersi bokou pou donn mwan laparol. Lo nou kote mon fyer poudir ki sa enn kandida, *Mademoiselle* Jeremie pou ganny nou sipor. E nou felisit li e nou swet li tou le meyer dan son karyer. Mersi bokou.

(APPLAUSE)

MADAM SPEAKER

Onorab Lemiel.

HON SYLVANNE LEMIEL

Mersi Madanm Speaker. Mon a dir bonswar tou dimoun ki pe ekout nou, 6er en kar ozordi swar Vandredi.

Nou fini avek en lasirans sorti kot *LDS* ki finalman zot in dir nou ki nou'n anmenn en kandida ki zot pou siporte.

En kestyon petet Madanm Speaker. Mon kontan ki ozordi Onorab Georges, enkli bann lezot Manm dan *LDS* ki pe deside pou siport Madanm Jeremie, Ms Jeremie, ki mon vremen kontan zot pe anmenn zot sipor pour en madanm ki tre konpetan, talante. Tre entelizan e ki annan en pasyon pour lanvironnman li menm.

Me selman i domaz ki, wi finalman nou'n anmenn sa kandida. Me i domaz ki *LDS* pa ti war en tel kandida ek sa kalite kalib e potansyel pour zot met dan zot Gouvernman zot osi.

(APPLAUSE)

HON SYLVANNE LEMIEL

Madanm Speaker, letan nou'n ekout Ms Jeremie, nou'n vwar i

en prodwi sa sistenm ledikasyon ki nou'n annan.

Nou'n dekouver osi ki in annan en gidans son paran ki'n tre solid. E i en zenn madanm ki'n sezi bann loportinite ki'n vin devan li. In etidye. E in devlop li dan son karyer profesyonnel.

Nou'n annan en dimoun ozordi devan nou. 38 an mon krwar i dir i annan. 37 an? 38 an, i en zenn e ki i en dimoun ki kapab enspir lezot zenn. I en lenspirasyon pour lezot zenn.

E ozordi mon krwar tou bann dimoun aze. E sirtou bann ki'n fer grandi Ms Jeremie. Bann ki'n dan son kominote kot in viv. Bann *teachers* ki'n *teach* li ki ozordi zot annan laz, mon krwar zot tou zot fyer letan zot get Ms Jeremie ozordi ki mannier in performen dan sa Lasanble.

Depi o komansman letan mon ti pe get bann kestyon, e larepons ki Ms Jeremie ti pe donner. Sirtou bann kestyon ki lo kote LDS ti pe demann li, mon ti santi petet Madanm Speaker ki i ti annan en – Ms Jeremie ti pou gannien sipor lo kote LDS.

E mwan mon dir – en keksoz osi ki Ms Jeremie in fer sorti avan mon fini. Sa nesesite ki ler in reponn kestyon Onorab Adelaide, ki in fer sorti ki

lenportans travay avek bann *community leaders*.

Savedir in montre ou ki i enn parmi sa bann dimoun ki'n pas devan nou, ki pou fer sir ki zot travay an pros kolaborasyon avek kominote. E ki sa bann keksoz koumsa i pou anmenn pei pli devan. I pou anmenn distrik pli devan.

E i fer ou war poudir i en dimoun ki *believe*. I annan sa krwayans. Fort krwayans ki kominote ki donn solisyon pour problem. E i en Minis ki konpran osi forte kominote.

E sa mon *welcome* sa tre byen. E mon ti ava fer en lapel avek tou sa bann Minis ki pou vini dan sa *Cabinet*, pour ki zot osi zot fer sir zot konekte avek bann *leaders* dan kominote. Zot fer sir ki zot osi zot travay pre ek bann *leaders* dan kominote. Pa zis antre dan nou distrik fer sa ki zot anvi, parey ti pe pase avan.

Me annou reste konekte. Annou enform bann *leaders* letan i annan en keksoz. Annou *involve leaders* dan bann desizyon. Pa parey mon war in arive dan mon distrik laba Maison Royale, in ganny mete *without discussion*.

I enportan diskisyon avek bann *leaders* Madanm Speaker. E la Ms Jeremie i enn sa bann dimoun ki'n fer sa sorti tre

fortman ki'n dir ki i annan sa nesesite e i war sa nesesite pou li *involve* li avek bann *leaders* dan distrik. E mon dir *chapeaux* a Ms Jeremie.

E i reste mwan zis pour mwan demann tou Manm pour zot donn sipor e *vote* pou aprouv nominasyon Ms Jeremie dan pozisyon Minis dan sa nouvo *Cabinet*. Mersi Madanm Speaker.

MADAM SPEAKER

Mersi Onorab Lemiel. Nou pou aprezan pran *vote* lo Mosyon.

In accordance with Articles 63(1) and 69(2) of the Constitution, this Assembly approves the proposed appointment by the President of the Republic of Ms. Marie-May Alice JEREMIE to the office of Minister.

Tou Manm ki *vote* pour Mosyon? Mersi. E set alors ki Mosyon in ganny aprouve an linanimite. 30 *vote* pour Mosyon.

Nou'n ariv a lafen nou sesyon pour ozordi. Nou pou aprezan *adjourn* ziska Mardi 9er bomaten.

(ADJOURNMENT)

